









龍門子題辭

本朝翰林學士承旨金華宋濂撰其自序曰濂學於三  
十年世不我知不徒兄其一割之用其兄大小器曰山  
者韓曰四時曰八極曰十二夜行言台港曰民說家世  
也應二十有四緒以接一燭之氣號之曰義道說曰  
之下庶幾有好之者按此書成於王臣丁酉當元帝  
乳幼德澤非加於時欲垂空言以詔來世此志士所  
志氣所激一書路  
有言凡處王臣者多所與聞公之  
大元子劉龍若夫宋濂金華蘭溪人  
公之序也





龍門子題辭

本朝翰林學士承旨金華宋濂撰其自志曰濂學道三十年世不我知不能見其一割之用於是入小龍門山著書曰四符曰八樞曰十二微符言合樞言奧微言緼也總二十有四篇以按一歲之氣號之曰凝道記百世之下庶幾有好之者按此書成於至正丁酉當元季紛亂傷德澤弗加於時欲垂空言以詔來世此志士所深悲也然晚年遭際

聖明出入幃幄輔導青宮凡建置號令多所與聞公之志蓋略見施行矣未爲不遇也若夫宏辭鉅議照映簡編則有全集在茲不能以盡公之奇也



龍門子全集卷之二 龍門子題辭畢

龍門子全集卷之二 龍門子題辭畢

龍門子全集卷之二 龍門子題辭畢

龍門子全集卷之二 龍門子題辭畢

龍門子全集卷之二 龍門子題辭畢

龍門子全集卷之二 龍門子題辭畢

龍門子全集卷之二 龍門子題辭畢

龍門子全集卷之二 龍門子題辭畢

龍門子全集卷之二 龍門子題辭畢

龍門子全集卷之二 龍門子題辭畢

龍門子題辭畢



百家類纂卷之十一

儒家類

龍門子



龍門子采苓山陽二三子從之龍門子采已登磐石而憇  
焉龍門子仰瞻俯睨洋然若有得者乃賦白雲之歌歌曰  
白雲如旗兮于彼中林矣我采我苓兮實獲我心矣孔子  
不出兮麟曷從來矣舍旃舍旃兮我將何依矣歌罷復北  
面而嘆旁有進者曰夫子何嘆也非聖曷師非經曷窮坤  
翕乾張地拓天通夫子之學其既充矣乎陶鎔禮樂折旋  
陰陽有目有綱蔚爲文章夫子之文其既昌矣乎籠絡宇  
宙充牣覆載大入無外小入無內夫子之道其既備矣乎  
方今六合塵冥膠膠紛紛鳳皇不來虎豹成羣生民遘屯



如水之溺如火之焚曾不足以自存夫子不一引手援之  
古之君子亦若是乎龍門子曰子不聞楚獨孤氏之事乎  
獨孤氏有二女焉皆有傾國之色時楚君不貴色國人化  
之咸棄而不顧年踰二十無與爲媒妁者或說女曰女子  
有家人之願也子將失時矣西鄰之子美而豔盍自往從  
之乎女曰妾聞人之所以異於物者禮焉而已矣無是則  
禽獸也苟不以禮妾死不往也區區一女子尚以死守禮  
子曾謂學先王之道者乃不由禮乎尚父不見西伯老于  
渭水之濱耳孔明不三顧終于隆中之墟耳況又不爲尚  
父孔明者乎曰非是之謂也人有言曰冒赤日而勞者不  
擇蔭而休行百里而饑者不擇水而爨今民生在疚雖被



髮纓冠往救之可也尚得安席而獨寢乎夫禮有變有常  
非執一之謂也今有人焉籩豆靜嘉肴核維旅方執爵獻  
酬雍容於堂序之上而火起寢室間夫子以爲將勺客乎  
抑滅火乎必以爲且滅火也夫執爵獻酬禮之常也火起  
輒救禮之變也禮者中而已矣常固中也變獨不可謂之  
中乎不然是子莫之執中也夫子自任以斯道之重而子  
莫其行五尺童子竊爲夫子耻之龍門子曰是何言歟君  
子之任道也用則行舍則藏在易困之初六則曰臀困于  
株木入于幽谷三載不覿象曰入于幽谷幽不明也言君  
子困而無自出幽之勢也泰之初九則又曰拔茅茹以其  
彙征吉象曰拔茅征吉志在外也言時旣泰則君子志在



上進也君子未嘗不欲救斯民也又惡進不由禮也禮喪則道喪矣吾聞君子守道終身弗屈者有之矣未聞枉道以徇人者也

晉人有終胥氏阨於貧窶益無斗儲拋上無完衣與婦謀曰雍樂成行賈以饒張氏賣漿而致千萬郅氏灑削列鼎而食翁伯販脂家累千金亦在人自力耳古語有言天下熙熙皆爲利來天下攘攘皆爲利往子安得獨死貧乎頗聞山西饒材竹穀纁旄玉石山東多魚鹽漆絲聲色予將貨百金而學賈焉其婦悅而聽之終胥氏去三年所向輒不利其憔悴益甚楚人有芊熊氏好使氣凌踐同類衆譁然弗從共起而折辱之芊熊氏恚曰彼非能辱我也辱吾



之無勢耳淮陰起於亡虜絳侯出於織薄樊將軍興於屠  
狗古今若是者何可勝數子顏面支體人爾冠裳佩劔人  
爾飯菽飲水人爾何以異彼哉彼能而我不能愧也於是  
漚觴自誓曰所不能取金印如斗大者有如是酒言已拂  
衣徑去徧詣五侯之家高門懸薄無見禮者如是者亦三  
年流離困頓愈有所不堪一旦會終胥氏於逆旅各言其  
故相與流涕不止逆旅主人怪而問之二人者以實對逆  
旅主人反覆譬曉終不悟乃謂之曰南山之陰有白鹿先  
生者能於物理推見至隱盍往質之乎二人者收涕而往  
且歷陳艱苦之狀白鹿先生笑曰嘻何子愚之甚也子不  
見大鵬之家乎塊視金寶布視綺繡穹房邃館淒竹和絲



自謂可以傳無窮身死肉未寒子孫已有操瓢而乞者矣  
又不見權貴人之門乎金章焜煌紫綬赫輦啗咤可  
使山岳震盪海水起立曾未幾何一跌而赤其族矣嘻何  
子愚之甚也且子身有至寶乃反不自知乎二人相顧駭  
曰何謂也曰範圍至道妙契天符初無聲臭不分遠近非  
至寶與其博無際其厚無涯其高無上其深無下非至寶  
與函天包地載陰負陽日月同明鬼神同妙非至寶與不  
為堯存不為桀亡終古特立不遷不變非至寶與二人欣  
然笑曰吾二人竊方覺矣於是如獲萬金之資上公之爵  
而歸

齊公子嗜古器物聞有藏者棄千金購之寘於一室中飯



於是寢於是非是弗飽也弗安也賓至輒一陳之以爲樂  
龍門子謁之公子出梁山銷一三牛彝一壽亭侯印一連  
環紐一關内侯印一橐駝紐一曰此漢物也復出銅權一  
鐵劔一曰此秦物也復出仲姑義母匜一楚姬寶盤一鞞  
琤珩璜各一曰此周物也復出伯益鬲一曰此商物也復  
出武丁敦一曰此夏物也出已面洋洋有矜色左右譽之  
室内之人又從而和之咸嘖嘖曰吾聞世有博雅君子愧  
未識公子真其人哉龍門子獨默默不言公子異而問之  
曰僕不敏竊不自料以好古爲事服儒服而來過者即請  
觀焉觀畢無不假顏色而賜之一言者夫子獨不言不咲  
將物非真邪抑有說乎龍門子曰物固真耳第公子所藏



者三代秦漢之器非古也曰如此不爲古無已則有虞氏之敦乎曰有虞氏之敦亦未古也曰其軒轅氏之九鼎乎曰軒轅氏九鼎古則古矣未爲至也公子笑曰然則庖犧氏之物乎曰然庖犧去今數千載矣其物尚有存者乎曰有之曰孰有之曰予有之公子錯愕四顧謂左右曰夫子自謂有庖犧時物我等當願走伏庭下借一觀之洗凡目焉龍門子曰未易觀也是物也非尊非壘非鼓非鐘八角垂芒煒煒煌煌上配星文契陰與陽百神翼之呵禁弗祥是人文之所祖也是鎮天下之神寶也有之則治無之則亂未易觀也請齊三日然後見之公子嗜古甚即如戒行齊齊已求見龍門子曰未可也形貌雖潔而志慮尚未一



也公子迎復齊三日而求見焉龍門子曰未可也志慮雖一而神未泰也公子乃存心虛無上與神明居如是又三日復再往龍門子曰可矣乃設几布筵寘寶積其上藉以文錦列籩豆菹醢舉觴灌酒漿各再拜而興啓積視之乃八卦也伏羲氏之易也

龍門子閔世蕪穢思神交千載之上無一刻忘去夜方寢忽夢上登清都祥飈郁如卿雲五色如龍文鳥章經緯乎上下少前有宮巍然中有丈夫偉甚月角日準河目龍顏脩上而趣下末僂而後耳視若營四海望之如仆就之如升旁從羣弟子皆華冠象佩裳衣檐如也丈夫起東行其容煦煦然溫其體翼翼然恭其聲恂恂然和周旋則合乎



規之圓折旋則中乎矩之方弟子拱而趨先後以齒若鴻  
鴈成列不亂龍門子見之嘆曰世乃有斯人乎哉其威德  
之備何其異於人也其聖人乎哉予然後知羣山之培塿  
而岱嶽之爲尊也衆鱗之雜遝而神龍之爲宗也諸律之  
不齊而黃鐘之爲木也吾誠得與斯人游雖卽死無憾矣  
其子弟有招之者曰爾爲誰龍門子曰越西宋濂也曰爾  
何以知丈夫之爲聖人也曰以其德容知之也曰然丈夫  
之爲聖人也其旋如乾其轉如坤其明如日其變如雲其  
疾如雨風其妙如鬼神非聖人而何哉爾慕之而不學之  
何也曰豈不願學馬力不足耳曰聖人去世二千年矣爾  
今所見者殆其神陟降帝之左右者耳爾安得與游爾若



願學焉吾常有以告爾也爾心中有聖人焉與丈夫無毫髮異爾能念以終始之是亦丈夫而已矣龍門子泠然而寤因語門人曰聖人在吾身耳何勞外慕哉

龍門子曰晉人有好利者入市區焉遇物即攫之曰此吾可羞也此吾可服也此吾可資也此吾可噐也攫已即去市伯隨而索其直晉人曰吾利火熾時雙目暈熱四海之物皆若已所固有不知爲爾物也爾幸與我我若富貴當爾償市伯怒鞭之奪其物以去傍有哂之者晉人戟手罵曰世人好利甚於我往往百計而陰奪之吾猶取之白晝豈不又賢於彼哉何哂之有

龍門子曰海中有寶山焉衆寶錯落其間白光燁如也海



夫有得徑寸珠者舟載以還行未百里風濤洶簸蛟龍出沒可怖舟子告曰龍欲得珠也急沉之否則連我矣海夫欲棄不可不棄又勢迫因剗股藏之海波遂平至家出珠股肉潰而卒越西有山氓鑿井得裹蹄金者在法民間發土藏必聞之官否則且有罪人有發氓事者官捕氓索金氓隱金斷其陰而亡嗟夫天下之至貴者身爾人乃貴外物而喪其身身死雖寶奚用焉何其惑之甚也雖然世人死利者太半豈特二豎哉

或問龍門子曰天下之物孰爲大曰心爲大曰吾聞物之大者山則有嶽水則有海耳未聞心之爲大也傳有之心重一十二兩中有七孔三毛盛精汁三合主藏神此固甚



小也然則何爲其大也龍門子曰居吾語汝以形論之其  
小固若是其無形者則未易一言盡也曰何也曰仰觀乎  
天清明穹窿日月之運行陰陽之變化其廣矣大矣俯察  
乎地廣博持載山川之融結草木之繁蕪亦廣矣大矣而  
此心直與之參混合無間萬象參列而莫不備焉非直與  
之參也天地之所以位由此心也萬物之所以育亦由此  
心也能體此心之量而踐之者聖人之事也如義堯舜文  
孔子是也能知此心欲踐之而未至一間者太賢之事也  
如顏淵孟軻是也或存或亡而其功未醇者學者之事也  
董仲舒王通是也全失其心而唯游氣所徇者小人之事  
也如盜跖惡來是也然而此心甚大也未易治也未易養



也歛然而西忽焉而東其妙不測而乘氣機出入者也苟失正焉翩然而蜂起瀟然而泉湧有不可殫名者矣是故孔子叙書傳禮記刪詩正樂序易彖係象說卦文言作春秋何莫不爲此心也諸氏百子之異戶出則汗牛馬貯則充棟宇雖言有純疵學有淺深亦爲此心也心一立四海國家可以治心不立則不足以存一身使人人知心若是則家可顏孟也人可堯舜也六經不必作矣况諸氏百子乎曰心之大敬聞命矣學者何所用功而能充是乎曰周公孔子我師也曾子子思吾友也易詩書春秋吾器也禮樂仁義吾本也刑法政事吾末也四海之大無一物非我也一物不得其所吾責也夫然故若天之覆也地之載也



不知孰爲天地也孰爲我心也亦一而已矣曰夫子之言  
美甚人之自狹者則小人而已曰然一失則小人也再失  
則夷狄也三失則禽獸也人而禽獸也惡足與言夫心哉  
曰然則養之又有要乎曰有曰何謂也曰懼其炎而上也  
則抑之恐其降而洿也則揚之察其遠而忘也則存之度  
其陋而小也則廓之慮其躁而擾也則安之審其滯而沈  
也則通之視其危而易搖也則鎮之是謂七術納乎中而  
式乎軌者也納乎中而式乎軌舍敬何以存之曰聖人之  
學如斯而已乎曰止是而已矣欲損之非有餘也欲加之  
非有虧也亦止是而已矣

龍門子曰小雪後陽一日生一分積三十日陽生三十分



而成一畫故爲冬至小滿後陰一日生一分積三十分而  
成一畫故爲夏至陽積六畫而爲乾乾當四月其中氣謂  
之小滿者滿不可大也大則亢矣積陰六畫而爲坤坤當  
十月謂之陽月者陽不可無也無陽則純陰用事矣國家  
欲長治而不亂者其思戒盈滿乎其思崇陽而抑陰乎

段干氏問龍門子曰秦漢以來正學失傳至宋而復盛因  
願竊有聞也幸歷以告我金陵之學何如曰穿鑿聖經而  
附會已說甚者竊佛老之似以誣吾聖人之教學顏孟者  
固如是乎又其甚者一假功利以搖動天下利源一開魚  
爛河決而莫之禁如此尚可爲國邪予嘗謂亡宋天下者  
自金陵始也曰然則無一髮可取乎曰確執堅信澹然不



爲位勢所動是則何可及也所惜者學之疵耳曰眉山之學何如曰其文辭氣燄有動搖山嶽之勢蓋其才甚高識甚明舉一世皆奔走之恨其壹徇縱橫捭闔之術而弗知先王之道士之輕佻浮誕者恒倚之以爲重禮義廉恥則棄去而弗之恤使其得君其禍天下有不在金陵下也曰東嘉之學何如曰東嘉之學人或不同大抵尚經制而求合乎先王攻禮樂以振拔乎流俗二者亦一道也第其致力忘大本而泥細微而見諸行事者皆繳繞膠固而無磊落俊爽之意徒以辭章論議馳騁於一時蓋其所失也其立言純懿而弗背者傳之千百世可也曰永康之學何如曰氣豪而學偏者也使其當今之世擁百萬兵馳騁於天



下堂堂之陣正正之旗實有一日之長是何也其智數法術往往可馭羣雄而料敵情而剛烈之氣又足以震撼而翕張之其能成功宜也若論先王之道德一怒而安天下之民則瞢乎未之見也曰金溪之學何如曰學不論心久矣陸氏兄弟卓然有見於此亦人豪哉故其制行如青天白日不使纖翳可干夢寐即白晝之爲屋漏即康衢之見實足以變化人心故登其門者類皆緊峭英邁而無漫漶支離之病惜乎力行功加而致知道闕或者不無憾也曰橫浦之學何如曰清節峻標固足以師表百世其學則出於宗杲之禪而借儒家言以文之也儒與浮屠其言固有同者求其用處蓋天淵之不相涉也其可混而爲一哉金



溪之學則又源於橫浦者也攷其所言蓋有不容揜者矣  
曰金華之學何如曰中原文獻之傳幸賴此不絕耳蓋粹  
然一出於正稽經以該物理訂史以叅事情古之善學者  
亦如是爾其所以尊古傳而不敢輕於變易亦有一定之  
見未易輕訾也當是時得濂洛之正學者鼎立而爲三金  
華也廣漢也武夷也雖其所見時有不同其道則一而已  
蓋武夷主於知行並進廣漢則欲嚴於義利之辨金華則  
欲下學上達雖教人入道之門或殊而三者不可廢一也  
嗟夫龍亡虎逝而孽狐爲之雄山摧獄仆而培塿爲之大  
氣宇猷猷四分五裂之弊今乃實蹈之矣寧不爲鄉學之  
一慨哉



客有號伊祁子者難龍門子曰司馬遷良史之才也歷代作史者咸宗之然其謬誤甚多難以一二數矣以帝王世次言之稷契皆帝嚳之子也同仕於唐虞契之後爲商自契至成湯凡十五世歷五百餘年稷之後爲周自稷至武王凡十五世歷千一百餘年王季蓋與湯爲兄弟而世之相去乃六百年何無稽之甚邪曰是固然矣使司馬遷不生上下數千載事可爲世之法戒者未必能若是之備也子舍其大而病其小何哉世遠載籍失傳惡能必其無謬也書伊訓曰成湯既沒太甲元年則是太甲繼成湯矣孟子乃曰湯崩太丁未立外丙二年仲壬四年始爲太甲以曆考之若於湯之下益以六年至今之日則羨而不合矣



子尚敢以病遷者病軻乎伊祁子曰奚爲而不敢也君子之學大則窮乎天地小則盡乎纖微孟子既有謬誤當言之奚爲而不敢也戎狄是膺荆舒是懲僖公事也則以爲周公生事之以禮死葬之以禮祭之以禮孔子言也則以爲魯子戎車三百兩虎賁三百人見於牧誓者甚明也則以爲虎賁三千人漢水固注之江而汝與泗則入淮而淮又入於海見於禹貢者甚詳也則以爲決汝漢排淮泗而注之江若是之誤當言之奚爲而不敢也曰夜氣之說亦有誤者乎曰否仁義之陳亦有謬者乎曰否子何不擇其不誤不謬者而學之哉子所言是以博聞強記待孟子以博聞強記待孟子則陸澄夏侯榮可稱亞聖矣有間伊祁



子咲曰予過矣予過矣

龍門子曰勇之於學者其猶舟之颿馬之策歟舟非颿則不疾馬非策則不進人非勇則不立是則勇者作聖之階梯也泰山雖高勇欲登之則必凌絕頂萬里雖遠勇欲行之不至則弗止也孔子之所以聖勇而已魯子之所以賢亦勇而已不然魯子何以自曰吾嘗聞大勇於夫子云然則欲學孔子魯子者其大勇矣乎

龍門子曰人行仁義而惡衣服者是素櫝蘊玄珠也外若賤而內實貴人徇利欲而美冠裳者是芳綺覆糞丸也外雖馨而內實臭

龍門子曰人之生也必以三代之士自期必以三代之事



自任庶不負於七尺之軀若隨小夫呻吟於佔畢間陋甚矣哉

龍門子曰人子之身非人子有也父母之體之分也雖曰異形實一身也身之聽命者心耳心欲左焉而身從之心欲右焉而身又從之至前後皆然無相違者也父母譬則心也人子譬則身也此義苟行世豈有不順之子哉雖然身且不敢有况身外之物乎世復有因財而逆父母之命者其丈夫也哉

龍門子曰象以牙而成擒蚌以珠而見剖翠以羽而招網松以明而致藝犀以角而就烹麝以膺而被獲雉以采而受羈當今之世士欲以文自著者盍視此數者以爲戒哉



丁鴻問於龍門子曰君子何以處貧也龍門子曰安之曰  
安之未能也請問其次曰忍之曰忍之之道奈何曰茅茨  
土墼視如華袞飛甍之麗柴車蹇乘視如文茵飛黃之良  
垢表敝屣視如繡裳朱舄之珍藜羹糗飯視如五鼎八珍  
之美醜妻惡妾視如毛嬙西施之艷則羨念不生矣是忍  
之之道也忍之久則自然矣能自然則安矣虞丹子在傍  
聞之啞然笑曰吾處貧四十年矣居之以道德乘之以仁  
義被之以禮樂飽之以忠信友之以廉潔雖凍餒瀕死者  
數四未嘗啓齒一言蓋驩然若有晉楚之富不知所謂貧  
也是何也心無愧怍也苟有一毫外慕之念則愧怍生矣  
愧怍生縱富貧也况實貧乎哉夫子盍以是告之而徙陳



說彼區區者不亦慎乎龍門子曰子以君子之事望恒人其不可也夫

龍門子曰陰中有陽陽中有陰非相同也而自同同也非相有也而自有有也非相生也而自生生也皆自然而已火性至熱也而蕭丘有涼燄焉水性至寒也而華陽有溫泉焉驗之物化參之天運皆自然而已所以聖人作易一本之自然何容心哉

龍門子曰人之大欲無過於飲食男女蓋人之生也非男女構精氣何由而化非飲食之養氣何因而續哉二者於人切矣苟不以禮制之小則身喪而家毀大則國削而天下亂故聖人於頤卦初九則曰舍爾靈龜觀我朶頤凶靈



龜之爲性蓋不嗜食者也六四則曰顛頤吉虎視眈眈其欲逐逐無咎虎之爲性蓋交有時者也人能如不嗜食之龜交有時之虎則知自養矣何飲食男女之足患哉

士有挾貴與文而以傲物自居者來見龍門子其氣洋洋然其貌斤斤然其聲鏗鏗然龍門子與之坐默然如不能語者士忽呼曰位尊而才高亦爲人所禮乎龍門子曰否位尊非所禮也才高亦非所禮也唯足乎德可爾位不稱其德是鶴乘文軒也才不命於德是馬失轡御也人方且賤之斥之絕之安取所謂禮乎曰然則德足以驕人乎曰德足以服人亦不足以驕人聖帝如堯舜聖王如禹湯文武聖相如周公聖師如孔子亦不過盡人道爾所以無足



驕人者德尚不足以驕人况挾貴與文而傲物者乎傲乃凶德傲物則失人失人則喪已喪已則名削名削則禍將作矣傲安可長哉士乃氣索神沮而去

龍門子曰漢儒說經固多不可企及但專門之習勝未免蔽固而不能相通其能脫畧傳註而深求經意者自宋儒歐劉石孫諸公始諸公啓之伊洛繼之而益加精在篤行而已矣譬之於食有耕之者有種之者有刈穫舂挽之者有炊之者有實於簞而獻之者吾徒但食之而已政不必立異以爲名高也

龍門子曰蒙鳩棲於葦苕之顛澗毛生於絕壑之下非其高下固爾殊也其自取之也君子於其所學可不慎哉



龍門子曰天地之秘洩之者其庖犧氏乎天地之道一陰一陽爾庖犧畫一奇象陽一偶象陰自是卦爻生焉文王重之周公辭之孔子翼之而易道著矣易道著而天下之變盡矣五經之用不同其理皆本乎此爾大哉易也五經之源乎大哉庖犧也至道之宗乎

龍門子曰以刑驅人者殘以勢凌人者怨以利誘人者爭以言欺人者悖以知御人者愚以巧勝人者拙此六懲也葆醇屏累所以全身積誠著行所以感物內外無愧所以事神敬身樹德所以訓子上下邕穆所以肥家威嚴莊重所以却侮此六行也惡莫大於離心美莫大於畏獨凶莫大於自賢吉莫大於集善樂莫大於順天憂莫大於悖德



此六則也明在自虛強在自卑危在自安敗在自盈敬在自持賊在自驕此六治也慎六德尊六行式六則守六治學者之事過半矣

秦人有申生者饑餓於燕甌屢生塵矣權貴人移粟起之且薦于上以漸至於言官權貴人勢衰申生輒背去別附相國相國惡權貴人欲劾之申生久與之游甚習遂歷疏其陰事疏已往告權貴人曰御史將不利於公予雖同列弗能獨沮即沮不過以死爭於公亦無益爾奈何權貴人曰子幸告我是弗後我昔日之心也吾悉出七寶于庭幸子賂免之申生收以歸越四三日復哭而往權貴人問之弗荅益加慟權貴人大驚曰將赤吾族耶申生乃徐曰公



哲士豈不自知而必俟予言也申生蓋利其貨欲勸自殺以滅禍權貴人中其計自經幾絕左右救之獲免明日文出但黜還田里無他異也權貴人上馬去連呼申生之名者三自是燕人無不穢申生之行未幾其身見殺官簿錄其家龍門子聞而嘆曰人心之險有如是哉太行之欽巖巫峽之暴迅殆康莊耳其初用計以殺人卒乃自殺其身是尚無天道哉

龍門子曰大學之要在於三綱八目孔氏既著于經曾子之門人又以所聞而爲之傳綱與目之名無有所謂本末者何必傳以釋之自知止而後有定及聽訟吾猶人也至此謂知之至也二條實釋致知格物之傳蓋未嘗闕也



龍門子曰兵不可以易言也言固誇矣如實何昔李元平  
初從關播喜爲大言嘗論兵鄙天下無可者一日將兵汝  
州李希烈一笑而縛之噫世之高談孫吳驚動四筵者其  
能免希烈之縛者幾希

龍門子曰天有五貫地有五類五貫行乎上五類載乎下  
則天地昭矣人君法之則天下平矣何謂法之其明則日  
照月臨也其喜則祥飊卿雲也其怒則迅雷驚霆也其生  
則甘雨零露也其殺則毒霜虐霰也是法五貫者也其靜  
則墮山喬嶽也其涵則巨浸大川也其序則井邑方州也  
其限則內夏外夷也其養則飛潛動植也是法五類者也  
天有至醇地有至熙君有至則天失其醇萬物喪精地失



其無萬物弗登君失其則四極不立統而言之大化縕乎  
神大序昭乎天大機合乎中其發甚微宇宙之廣莫之或  
違其端甚直彌綸上下罔有差忒長稍大矛見之失其利  
崇墉深隍見之失其固陰謀秘計見之失其防大法至刑  
見之失其嚴擯而充洞然而有容窈而默淵乎其莫測古  
之善治天下者得此而萬事畢矣

龍門子晨出見兩夫操挺與刃逐虺甚急龍門子問曰虺  
傷爾乎曰否虺迫爾乎曰否曰然則子何以逐之如此其  
急也曰彼受形爲虺晝夜常思毒人吾幸不被觸爾設觸  
之其有不迫我而傷我者乎誓當盡殺之乃止曰是固然  
矣子知虺蛇之爲害而不知人虺之害物尤暴也曰何謂



人虺曰厚貌深情禍機莫測是人虺也斜睨傾聽伺人陰私是人虺也睚眦之怨必逞其欲是人虺也布機陳筭以中以陷是人虺也子尚可盡殺乎曰吾固不能盡殺或遇之將何以禦之乎曰淬仁義之刃持禮樂之挺以俟彼將俯首而逝縱毒將焉施乎曰吾聞之也殺蛇虺者無恕心以其殘物而逞也况人象而蟲質者乎奈之何縱之逝也曰彼人耳不自知其至於虺也其至於虺也欲刼之也先王之教若興豈不能反之人乎吾傷之爾憫之爾奚忍殺之哉

龍門子曰趙蕤有云天陰陽半人善惡混然陽晝六時曉昏皆爲陰所侵其用事唯四時而已卦六爻初上皆無正



位其用事亦四爻而已故善人少而惡人多誠哉是言也是故光風麗日之時常寡濃陰暄霾之日常衆鸞鳳騶虞間世一覩而鵠鶚蛇虎遍于郊藪伊傳周召之臣千載不冉出而莽卓巢溫恒接武於朝大者如此則小者又可知也不知天道果何如耶

公孫氏曰古之人有云自孔子沒卓然名世之儒漢四百年楊雄氏而止爾唐三百年韓愈氏而止爾如董仲舒鄭康成王通孔穎達之徒非無益於後世也仲舒倡災祥之說王通襲聖人之迹康成穎達守區區訓詁之文皆非楊韓氏比也龍門子曰鄭孔名數之學耳不足與議斯道董仲舒純儒也王通明儒也韓愈正儒也若楊雄則駁儒也



曰曷謂駁曰豈有不駁而事莽者乎司馬公喻爲日月過矣曰三子者能盡合孔子之道乎曰仲舒頗窺道之本原韓愈能識道之大用王通極知治道尤高爽有見謂其盡合孔子之道則皆未也

龍門子曰積書之多其無出於隋之嘉則歟乎書凡三十  
七萬有餘卷未幾多散亡不存悲夫雖然梟夔稷契其所  
讀者果何書哉淵騫游夏其所習者果何書哉脫有之未  
必若是之多也後世百倍於古而立德造行反或不如豈  
非心散於博聞技貪乎廣蓄而弗能一乎夫然故雖甚散  
亡奚必深悲哉但得六籍存亦足矣

龍門子與二三子出游仰視霄漢嘆曰非天地孰覆載耶



非日月孰照臨耶非孔子孰明五倫耶使世無孔子生民之類其滅久矣夫

龍門子曰作史者不爲楚義帝立本紀而以項羽當之其失爲不知統不書呂氏滅秦牛氏易晉而復以嬴司馬言之其失爲不知義作史者亦難乎哉

龍門子卷終



說林題辭

說林者 本朝大司馬四明張公時徹之所著也公夙  
抱奇質蚤第英科德望文章雄視一世固藝苑之宗工  
辭林之鉅匠也所著有芝園集流布海內共以爲寶其  
見於諸家評者詳矣茲編名說林蓋奇而又奇不惟文  
字醇雅且多有補於世教真子書之粹者也公自叙云  
或謂宋潛溪著龍門子僅以九十日故其文多厖劉文  
成著郁離子成之歷載故其文偉澤余之詮綜有年矣  
於凡三才之紀萬物之情罔不悉備聊竊附於作者之  
列敢曰有補世教云哉噫卽公斯言可以占其志之所  
存矣



陽明先生集

卷之四

一

前

沈氏心學



百家類纂卷之十二

儒家類

說林

辭命林

宋公陳侯蔡人衛人伐鄭圍其東門鄭莊公使行人辭於宋公曰孤不佞不能和其四隣以爲君憂使赫然辱於敝邑孤無所圖罪謹使下介以請夫自孤之學主宗廟社稷也亦惟先世之顯盟是共是以罔敢失隊頃者公子馮之辱也其以成穆公之讓而致國於君也孤惟昏姻之國館而賓之亦惟君故之以豈敢有所利焉如以馮爲討也是使穆公不得撫有其子而宣公貽謀之不終也孤誠不忍聞惟君圖焉且衛人之惡天下莫不聞敝邑雖小菟乘簡



卒以俟君命號令朝至孤必夕發以從君後今舍曰弗問而移師於蕞爾之鄭孤竊惑焉君如聽於孤反兵而誅衛則君之義也孤之願也其曰不然孤將率其父兄子弟觸執事之左轂而死之使天下後世知君以定弑逆之衛而合諸侯以翦鄭也孤雖亡亦有辭於武王成王矣君其圖焉宋公不能對乃解四國之師

周桓王四年使凡伯聘於魯戎伐凡伯於楚丘以歸王以讓衛曰昔我先王之制諸侯也敵國賓至關尹以告候人爲導司徒具徒司寇詰姦而防其不意其貴國之賓至則以班加一等益虔至於王吏則皆官正蒞事載在彙常頒之列國世世守之無有廢也叔父密邇甸服謂當率先諸



侯以藩屏周余與二三卿士日有望焉今凡伯者非他余之命大夫也以魯國之故告諸宗廟受玉帛以出而戎得逞於叔父之近郊僂而執之是委成命於草莽也叔父若不聞余一人不足恤獨不念武王成王之烈而一旦蔑棄之有如弁髦其何守土之爲夫戎何猷之有王室而陵之矣又何有於衛余一人之憂亦叔父之憂也若微寵於武王康叔詰兵振旅而問罪於犬羊之戎則惟叔父其或不念不圖而委罪於余一人亦惟叔父余一人何敢固焉齊桓公伐楚歸執陳轅濤塗會諸侯之師侵陳陳使使乞成曰大國有命曰其率賦乘以南將致介於荆寡君不敢康與其一二陪臣先後奔走以從君於羈紲豈有貳也楚



之帖也召陵卒盟諸侯皆返其國陪臣濤塗恐三軍之衆也舍止無所而一二邊吏不足以供芻秣大國將以爲討率然計曰兵而出於東方觀兵於夷而歸其可此非敢有他也無亦謂陳之削弱鮮茲耄倪不足以薦頸於斧質也而欲祈頃刻之命不虞君之督過之也濤塗而就執矣江黃之師加焉陳之君臣旣知其罪早夜震動曰大國方懷攜而字弱庶其赦我乎而辱七國之師以臨於郊盡陳之地不足以張帷幕君如援桴而鼓之如以石投卵也殺弗碎矣惟君徼福於我虞帝而不殄其明祀賜濤塗以爲陪臣則惟命謂濤塗罪在同盟不可中釋也而歸諸寡君告諸社而僇之亦惟命寡君與一二陪臣草舍於郊謹備牲



牢以俟

晉趙孟逆公子雍於秦欲以爲君旣而背之敗秦師於令狐秦康公使人讓趙孟曰先蔑之來也曰寡君新棄社稷國之人聚而謀曰孺子夷臯方在襁褓恐不足以承七鬯隊我文公襄公之烈以爲君憂願徼福於君奉公子雍而戴之死且不朽我諸大夫曰有君而求君將安用之晉無信也不如弗聽寡人曰豈其寘君而不如奕棋乎其謀之審矣寡人遂遣雍也又懲呂卻之難而與之徒衛以入亦惟晉社稷之故豈私有所賴焉行且入也而旋復背之曰國有君矣言焉而食縱二三子不以爲意其若四方之諸侯何寡人與二三臣方且圖之曰晉曲甚矣如而自葵也



必將謝我以文辭薦我以玉帛牢醴芻粟勞軍於境上而乞盟於寡人晉之罪將可說焉不是出也而乃潛師以襲我賓而寇之又何謂乎夫有君而求君一逆也求而背之二逆也我以好往而報之以兵三逆也三者有其一難以得志於諸侯而況兼而行之乎寡人規之國未定而伐之不仁乘人之喪不武以詐禦詐不信尤而效之不忍爲也歸且休矣二三子共速圖焉葵苟襄也願以兩國之賦相見於境

衛孫文子甯會子出其君獻公鄭子產貽書與范宣子曰國之所以立禮爲大禮之所以立君臣爲大先王執則天下霸者糾虔四方率是物也衛侯在位十有八年矣行父



與殖執圭繫組而事之親則股肱之臣也君有違也當  
右僂力而彌縫其闕不可則委曲諷喻自牖而納之約又  
不可則致邑與祿而去之不忘其思曰庶幾君之或寤而  
反予乎今徼寵樹私駢首以僂公臣身之不出而君是焉  
出則是臣有國也追車及於境而射矢及於輶衛侯瀕死  
而僅免其去弑也有幾僑之聞故也語於心曰晉方以禮  
合諸侯而吾子實先後之必將告於王室討二子而復其  
若旦夕且至矣不虞計之未有所決也而又聽中行獻子  
之言欲因其亂而成之是知火之爲灾而又膏之也能無  
灼乎今諸侯之國多矣上下交替而紀法不張其爲殖與  
行父夫豈少也二子而莫之懲也孰將不爲二子哉從而



誅之是有二命也擇之不問則是相戕賊無已也此而爲君不亦難乎僑也聞之禮禁亂之所由生猶坊止水之所自来也防而棄之是自速之亂也大夫而出其君矣陪臣亦且出其大夫而又孰能禁之吾子縱不爲晉計獨不爲子之家計乎夫以大治小義也以順加逆正也宣昭令聞以不忘先烈吾子何弗爲焉詩曰君子如怒亂庶遄已願吾子之一怒以已衛亂也

智伯帥韓魏之甲以攻趙氏晉陽之城垂拔趙襄子乃使人見韓魏之君曰無恤不佞不能事社稷宗廟以爲君憂無所逃罪然自昔先世徼天之靈得與君之先公翼輔晉室盟及子孫無相害也無恤不能事君豈遂不可訓誨不



虞君之深過之也夫趙之與韓魏猶一體耳趙朝亡韓魏必夕覆夫智氏何猷之有君若不念無恤獨不爲君之宗廟社稷計乎無恤聞之東方有魚其名爲鰈比目而後能行南方有鳥其名爲鷦鷯比翼而後能飛西方有獸其名爲麋與邛邛鉅虛比肩爲之齧甘草以食卽有難也邛邛鉅虛負而走北方有比肩民焉迭食而迭望中有枳首蛇焉此非獨其性慈愛也相輔以用相資以生其爲彼也亦爲我也今韓魏之於趙豈異是哉患之剥膚謂君必將倚智氏而角之以撫有三晉獨奈何噓其燄而膏之乎夫趙之滅在旦夕矣滅趙而有利於君則爲之如其不利盍姑存之乎削其土地使得奉社稷君之賜也不然而辱在倍



臣則惟命又不然而降爲奴隸亦惟命君其試垂察焉韓  
魏聞之大懼繼以張孟談之言乃反兵攻智伯而殺之遂  
滅智氏

諫說林

季武子出見絕流而漁者下令欲鞭之曰噫甚矣子之貪  
忍也漁者曰主君欲法小人則旣知罪矣盍姑自主君始  
可乎自主君之治魯也農夫力耕其穀粟無弗輸於廩者  
婦人織作其布帛無弗入於宮者商賈所貿易其貨財無  
弗登於府者山谷冶鑄其噐物無弗歸於宮者聚歛無藝  
威福在已魯侯徒擁虛位而百官不得其職是主君竭澤  
而漁矣何罪乎絕流哉



漢武帝問東方朔曰國何如而治矣朔曰罷市其可乎帝  
曰百工之事莫能相兼四民之用缺一不可故日中爲市  
有無交易以相濟也若之何罷之朔曰國有三市而交易  
不與焉私納諸侯陰比將帥輦輸金幣關通賞罰馮陵威  
福而得志於其外是謂以外市也請謁貴戚結托宦官延  
譽於左右陰竊上柄而主不知是謂以內市也希望意旨  
雷同附和狐媚固寵祈求恩澤因以植樹黨與濁亂紀綱  
是謂以上市也三市行而國欲治者未之有也帝曰善乃  
下請謁之禁開直言極諫之路

衛靈公居而問左右曰朝之臣誰最愛寡人者左右曰其  
彌子瑕乎君寢則寢君興則興君食則食君飲則飲君喜



則喜君怒則怒不幸君有纖芥之憂則食不甘味坐不安  
寢必豫而後已愛君者誠莫如瑕矣乎公子家進曰左右  
之言非也夫彌子瑕者君之賊也奚在其爲愛壺宅木而  
居之死生不離焉遊其腹心而飽其脂膏久則空而覆矣  
夫瑕亦若是而已矣無已則史魚乎君所謂可而以爲否  
焉君所謂否而以爲可焉惟其義不惟其同蹇蹇諤諤以  
繩君之闕而納諸衷君譴不恤君䟽不怨是厚爲其君而  
薄爲其身者也無已則蘧伯玉乎靖恭以事上忠信以宰  
物苟便於君而利於民則導而行之便於民而拂於君則  
委曲而通之務得百姓之歡心以事一人是社稷之衛也  
斯二子者之愛君也孰與瑕哉人有言曰佞幸醜毒不可



通也藥石針艾不可厭也君其試加察焉靈公默然

唐明皇生日有獻寶鑑爲賀者張九齡因進千秋金鑑錄  
帝覽之謂九齡曰世之治也用賢其亂也以不肖卿言知  
人有道乎九齡對曰人不易知知人亦不易使人之相去  
也若鵠之與烏也易知也若葵之與莧也易知也惟其若  
茅蕝之與藁本蛇床之與蘼蕪則不可得而辨矣是故大  
毒若甘大詐若信大貪若潔大佞若忠是茅蕝與藁本之  
類也人主一不加察而誤用之反表爲裏倒上爲下國其  
能無危乎帝曰嗟時李林甫嚮用九齡蓋陰斥之而明皇  
不悟卒致天寶之亂

或說條侯曰伍胥與范蠡孰知乎曰范蠡知矣曰商鞅與



范睢孰知乎曰睢勝鞅也曰君侯之知范蠡也豈非以其  
知越王之長頸烏喙不可與共安平也而逃之五湖以遠  
害乎曰然曰君侯又謂睢之勝鞅也豈非以其能推荃澤  
以自代而免於車裂之禍乎曰然曰然則君侯之所以自  
爲計也不如其論二子者也曰客之言謬矣彼四子者其  
所事殘忍之君也而其居則傾危之國也僕逢賢聖之主  
而生太平之世庸語此不祥乎客曰君侯誠不自量獨不  
見夫芻狗乎方芻狗之未陳也盛以華篋被之文繡主人  
踵步而拜尸祝潔齋以將之不敢睨視也及其已陳也行  
者踐其首脊柴車礫而過之蘇者取以爲爨而已今君侯  
已陳之芻狗也輒而爨之者至矣而猶以爲無虞乎且夫



質的張而弓矢至焉林木茂而斧斤入焉物之理也功高者忌威震者疑人之情也胥鞅之違不自以爲安乎而終於碎首而齏骨者何也且君侯獨不記許負之言乎不聽旣而景帝積猜於條侯乃以事下獄不食五日而死

齊景公問於晏子曰寡人朝計事於朝二而得一焉晝計事於宮三而得一焉夕計事於寢五而得一焉用心彌勞其智彌詘無亦寡人之固陋不足開邪抑出謀忌於過者乎晏子對曰過乎哉過乎哉夫心也者神明之舍而萬事之管也潜天而天潜地而地圖王而王圖帝而帝變化於須臾而彌綸乎遠邇者也是惟不思而已矣孰有思而不得者乎今計事而不當則衡度之弗式而測鏡之未詳也



亡箴者終日求之而不得其得之也非日益明也締而見之也心之於慮也亦然是故以宮視朝則宮爲肆矣以寢視宮則寢爲肆矣方其嚴也則神明內宅汎應而不迷其肆也則氛曷交侵求詳而益眩此豈心之有二乎王欲詳事無亦致其精而已矣

楚懷王使屈原求令尹之材三年而未有舉者乃以讓屈原曰楚國天下之雄也令尹高位也封土百里車徒百乘至厚富也戟指垂涎而欲一染王之鼎者豈直一人哉然而未有至者其故可知也鳥之麗毛棘喙者鳥畏之魚之哆口刀鬣者魚畏之人之辯言利口者人畏之是以君子避三端武士之兵端一避也文人之筆端一避也譏夫之



舌端一避也今王之庭其爲棘喙刀鬣也多矣呼吸之間  
錮鏤行焉孰肯以頸嘗之乎

或問於石瀆子曰人之惡孰爲大曰懷諫爲大曰人之禍  
孰爲先曰懷諫爲先曰何以明其然也曰昔郭君出亡謂  
其御者曰吾渴欲飲御者進清酒曰吾饑欲食御者進乾  
脯梁糗曰何備也御者曰臣儲之久矣爲君之出亡而道  
饑渴也曰子知吾且亡乎何不以諫也御者曰君喜道腴  
而惡至言臣欲進諫恐先郭亡是以不諫也陳轅頗爲司  
徒賦封田以嫁公女有餘以爲已大噐國人逐之出奔道  
饑渴其族轅咺進稻醴梁糗服脯焉喜曰何給也對曰噐  
成而具曰何不吾諫曰懼先行也由是觀之二氏之懷諫



一也而其失國亡家亦一也向使御者與族人之言得入豈無有以彌縫其闕而固其宗祊乎不是迪也而淫回昏濫以盈其欲其未亡也自謂無所得亡也而惟石言之爲忌則孰肯投其所惡以速戾于厥躬乎鄒孟氏曰不仁者可與言哉安其危而利其災樂其所以亡者自古以來以是而殄世者多矣豈惟郭公與頗哉

### 政治林

令狐嬰爲蜀郡太守患民之弗率也懸之厲禁峻其刑誅捕吏日攫于鄉民跼足側目踐園棘者相屬也而姦愈不治謗書盈于市門剽竊徧于四境嬰謂法之弗棘也乃益務猜苛求虎吏以爲爪牙玄瀆先生踵門而告曰夫水之



深也魚鼈生焉若激而躍之則鱗介之族無弗駭矣山之  
茂也鳥獸歸焉若翦其樛翳張之且簞則羽毛之族無弗  
駭矣惡其弗靜也而施毒設罝日求而不已也彼有引類  
而去耳寧能坐而就死乎不惟是也鳥窮則啄獸窮則攫  
將鼃鼃虎狼皆爲患矣夫民之智力非特魚鼃禽獸也而  
善政善教則其山與澤也故示之以好惡而民不爭導之  
以禮防而民不越其猶未也則隨其情而輕重法之其孰  
有不率者乎孰與絞絞棘棘如捕狸君鼠之爲哉且子不  
聞晉國之故乎晉君患國之多盜也使郄雍司盜察眉睫  
之間而得其情千百無遺一焉盜遂患雍而殺之盜卒不  
止繼用趙文子之言使隨會知政而群盜奔秦豈非用法



之炯鑒哉嬰曰嬰不佞不能和其民人以爲先王憂敬聞命矣請得而改圖焉

閭東丈人問於壺丘先生曰今之牧其諸異乎昔之牧與何昔之民安而今不安也先生曰非有他也牧牛者以牛牧牛牛乃得肥焉牧羊者以羊牧羊羊乃得澤焉夫牧民者亦若是而已矣是故順其欲惡恤其災害課其樹藝均其賦歛節其力役省其追呼脩其禮教平其訟爭一不幸有水旱之變則捐倉廩以賑之此所謂以民牧民者也昔之人行之矣突未黔也而萌倖進之圖席方煖也而肆苞苴之欲廣納結以求援巧逢迎以媚上把陰事以漁貲舞文法以掠譽不利於身雖誘之譴魯不爲也苟有利焉蒼



鷹乳虎猶將甘之此所謂拂民從欲者也今之人行之矣  
民安不安此其繇也昔齊有閭丘先生者見於宣王賜之  
田不租不拜賜之無徭役不拜曰此非人臣所敢望也願  
大王選良富家子有修行者以爲吏平其法度如此臣少  
可以得壽焉春秋冬夏振之以時無煩擾百姓如是臣可  
少得以富焉願大王出令令少者敬長長者敬老如是臣  
可少得以貴焉今大王幸賜臣田不租然則倉廩將虛也  
賜臣無徭役然則官府無使焉此固非人臣之所敢望也  
此以民牧民之說也於乎司牧者其敬念之哉

漢武帝窮奢極慾賦役繁興民不堪命汲黯諫曰臣聞先  
王之爲政也上順天時中因地利下遂民心是以國祚得



長焉反是必危是故有一熟之田有再熟之田一熟之田而再種之必不可得收矣再熟之田而三種之亦不可得收矣何者地力已竭也有一年之樹有十年之樹有百年之樹一年之樹五穀是也十年之樹果實是也百年之樹材木是也若期材木於十年必不可得材矣期果實於一年必不可得實矣何者時未至也今神仙封禪土木甲兵之役無日無之自公卿以至庶民無弗征也自舟車以至間架屠酤無弗稅也是竭地力而課之易歲月而取之其能濟乎臣之里有東園氏者好養猴猴日衆而無以爲食也盡搜山林之橡栗猶不足以給之或曰曷不爲去猴之得計也有西封氏者好養鶴鶴日衆而無以爲食也盡徵



川澤之蟲魚猶不足以給之或曰曷不爲去鶴之得計也  
人以爲忠言今陛下之宮庭以至於國都詭名而冗食者  
奚啻千萬其爲鶴與猴也甚矣柰何不亟去之乎

漢明帝厲精圖治自宰輔以下無不數易焉曹褒諫曰臣  
聞爲治猶作室也家之作室也鳩材礱石埴埴陶聚良  
工而構之累歲得成焉加以塗墍飾以丹雘室煥然美矣  
一旦疑楹之蠹也而易之杙桷桷案靡不動搖焉然楹實  
不蠹而易之者則善蠹之木也未幾而又易之則衆楹皆  
動矣又未幾而易之膠合益踈湊薄不密棟其能獨固乎  
卽有塗墍丹雘室不得全美矣今夫國家之用人也大者  
其棟也其次則衆楹也其次則杙桷桷桷也小蠹之不忍



而數場庸將異乎且夫木之材也植之巖壑滋之雨露震之以風霜積之以歲月多者數百年其次亦數十年而後成楹棟之用若輕廢置之則木之中材者不若是數數也後來者必不幾矣矧有愈乎臣又喻之家之有長也亦必信其子弟任其童僕以分幹百役若朝夕怒而更之胥將巧幻以文其不及而外人莫不有易心其何家之能爲惟陛下審察之

火之燠也終不如日之暴也水之沃也終不如雨之潤也霸功之利人也終不如王道之澤物也是故衣食旣足則施予可無捐也杠梁旣成則乘輿可無濟也華夏旣奠則安攘可無施也信義旣行則盟會可無脩也



唐肅宗謂楊綰曰今天下弊矣上下交騖於利日孳孳焉  
譬諸河決之不可復障也將何道以制之綰對曰亦在禁  
奢而已矣彫文刻鏤非益於居室也而作室者必先焉錦  
繡纂組非益於衣服也而製衣者必先焉笄弁極珠貝之  
麗膳羞窮陸海之珍故昔之費一而今之費百矣昔之費  
十而今之費千萬矣若之何其無貪也曰然則何以止之  
曰昔者齊王好紫國人皆尚紫齊王患焉曰紫貴甚矣國  
用將不堪將若之何晏子曰王惟無好紫也則不禁而自  
賤矣王乃朝而去紫曰吾惡其臭也國人遂不服紫是故  
後宮衣不曳地露臺惜百金之費文帝之所以治漢也妾  
不衣帛馬不食粟季文子之所以治魯也是故止貪莫如



禁奢禁奢莫如自君相始誠能不作無益害有益則奇技淫巧不復至矣誠能不貴異物賤用物則遠近珍怪不復至矣時乃陳之軌物立之表極以風示四方莫不從風而靡又何貪之足患乎

公孫大夫問於玄澤先生曰今天下弊矣間又有甚者焉狐鼠之怪白晝肆行鬼蜮之奸遇物則螫此其小者也萑蒲聚黨剽掠通衢犬豕豺狼脯人之肝而飲其血此尚其小者也梟獍相夷而父子之性滅矣牝牡瀆亂而夫婦之道苦矣紕臂閱牆而兄弟之倫喪矣狎信爭噬而朋友之交薄矣有司惡其然也笞敲擊斷接踵就斃而犯禁無忌此豈令之不嚴而刑之不亟乎抑民之無憚於死也玄澤



先生曰胡然哉古有言水行者表深使人無陷治民者表  
亂使人無失禮者其表也先王以禮表天下之亂今廢禮  
者是去表也故民迷惑而陷禍患此刑罰之所以繁也三  
尺之岸而虛車不能登也百仞之山任車登焉何則陵遲  
故也數仞之牆而民不踰也百仞之山童豎馮而遊之陵  
遲故也今夫世之陵遲亦久矣蓋亦亟樹其表乎舍之不  
圖而謂以刑罰而已矣也則李斯且優於治秦而裴蘊不  
難於安隋矣又何先王禮防之貴哉

豺狼之賊物易知也而鬼蜮之賊物不易知也螟螣之害  
稼易知也而稂莠之害稼不易知也兵刃之殺人易知也  
而政事之殺人不易知也是故暴如商鞅者殺人偏如安



石者殺人急如束薪者殺人緩如弱水者殺人察如燭淵者殺人苛如聚蝟者殺人布令不信者殺人操法不審者殺人圖患不遠者殺人

議論林

楚人行市而攫金市伯繫之以詣縣令縣令怒而鞭之召監史問曰白晝而攫於都市罪若何監史對曰法當黥令曰若是其輕乎此不軌之徒也必寘之死監史曰法不可以死也今楚國之盜多矣豈惟夫哉關通左右剌探陰事而脅取其貨譬諸猘犬遇物則嚙之此廛市之盜也操持長短變幻簿書陰竊公帑而漁獵民貲可入而不可出此官府之盜也網利以媚人樹黨以釣譽貨若川流而毒如



蝟積民怨而不恤千國之紀而上莫之聞此百官之盜也  
讒諛比肩佞幸爲市喜則加諸膝怒則墜諸淵賄之入也  
蜚廉爲旦奭交之踈也隨夷爲跖蹻賞罰無章而綱紀日  
斁如蟾蜍之蝕月而螟螣之敗苗此王廷之盜也是之弗  
問而規規於攫金之夫真猶舍豺狼而捕狐狸養梟獍而  
驅蚊蚋也豈三尺之平哉縣令不能奪乃黥攫金者而遣  
客謂張祿先生曰君廁中之竄鬼也折脅捫齒膚體不能  
自完卷簣而飲溺不知其幾矣一說而幸秦王裂地封侯  
而佩相國之印計不下席謀不出廟堂坐制諸侯而功極  
於天下何前詘而後伸若此乎張祿先生曰若何見之晚  
也夫尺有所短寸有所長湛盧干將天下之利器也陸剗



犀象水斲蛟鯨使之與管豪決背出昧其便必不能勝管  
豪也黃戎鬻膝天下之駿馬也使之與貍鼬試於釜竈之  
間其便必不能勝貍鼬也神鵠大鵬一舉而千萬里使之  
與燕伏翼試之堂廡之下櫨棟之間其捷必不能勝燕伏  
翼也夫懷竒抱智之士非少產也用之則爲虎不用則爲  
鼠自古及今先困厄而後隆顯者多矣豈獨一睢哉

石濱子曰瓠所以濟溺也然而以之載物則沉藥所以攻  
疾也然而以之養生則死是故管仲晏子之權謀用之於  
定霸足矣而終不可以圖王張湯趙禹之文法用之於擿  
奸幾矣而終不可以厝理

石濱子曰物之貴賤在人而人之貴賤在己昔晏子之告



魯子曰今夫車輪山之直木也良匠揉之其圓中規雖有  
槁暴不復羸矣故君子慎槩括和氏之璧井里之棄也良  
工修之則爲存國之寶故君子慎所修今夫蘭木三年而  
成湛之苦酒則君子不近庶人不佩湛之縻醢而價匹馬  
矣非蘭木美也所蕩然也願子之必求所湛也嬰聞之君  
子居必擇居游必就士所以辟患也汨常移質習俗移性  
不可不慎也此貴賤在已之說也

螽似蛇蠶似蠋人見蛇則驚骸見蠋則毛起然婦人拾蠶  
而漁者握螽曾不爲意利之所在皆爲貴育矣今夫穢人  
之所甚惡也夢穢者得財而人之於賄也兢兢焉棺人之  
所甚忌也夢棺者得官而人之於官也兢兢焉皆拾蠶與



握蠶之類也。彼濱死而知蓄財之禍，臨刑而思牽犬之樂，何及哉。

味之美者，洞庭之鱖、東海之鮑和之美者，陽濮之薑、招搖之桂、衣之美者，吳之織羅、蜀之文錦、色之美者，鄭之間、姬衛之曼姬、珍玩之美者，南粵之珠貝、交州之犀象、士之美者，仁義之鴻儒、道德之王佐、苟可以飽，雖無異味，無害於其口；苟可以溫，雖無麗服，無害於其體；苟可以娛，雖無艷色、珍玩，無害於其目。惟道德仁義之人，不至則百蠹交作，四體不寧，而國之危如累卵矣。是故秦帝之阿房，不如堯之土階；齊景之美服，不如禹之惡衣；齊桓公以管仲則治，而以易牙則亂；唐明皇以姚崇、宋璟則治，而以李林甫



楊國忠則亂

石瀆子曰貪也者其殺身之阱乎貪色死色貪酒死酒貪盜死盜貪鬪死鬪貪獵死獵貪漁死漁此人情之所共明也貪祿死祿貪位死位貪權死權貪賄死賄貪名死名貪計死計此人情之所易暱也是故商鞅之車裂也黃歇之刺死也主父偃之夷僇也石季倫之滅亡也崔浩之族誅也大夫種之賜劍也此豈其智之弗明哉情有所暱而弗能忍耳猩猩獸之好酒者也大麓之人設以醴尊陳之飲器小大具列焉織草爲履勾連相屬也而置之道旁猩猩見則知其誘之也又知設者之姓名與其父母祖先也一數而罵之曰奴欲害我乎已而謂其朋曰盍少嘗之慎



毋多飲可矣相與取小噐而飲罵而去之已而取差大者而飲又罵而去之如是者數四不勝其唇吻之甘也遂大嚼而忘其醉醉則羣睨嬉笑取草履而着之麓人追之相蹈藉而就繫無一得免焉其後來者亦然夫猩猩智矣惡其爲誘也而卒不免於死貪爲之也於乎古今之死貪者多矣豈獨一猩猩哉

季氏之專魯不在昭公之逐而在於文子恭儉之日田氏之篡齊不在簡公之弑而在於桓子厚施之時故曰兵莫憐於志干將爲下

古之善興功者脩脛者使之踏鑿強脊者使之負土眇者使之准偃者使之塗各有所宜而工役齊矣古之善治民



者士不得離於學農不得離於田工不得離於肆商不得離於市各安其業而民志定矣

治已者脩小節用人者貴大畧故崑山之玉不留塵垢丹穴之鳳不爭腐鼠貞士以之牛蹄之涔不能生鱸鮪而蜂房不容鵠卵當國者審之陳仲子立節而餓死接輿逃楚聘而易姓名申徒狄抱石而沉於河鮑焦棄疏而立槁此潔志行而忘功名者也顏咏聚梁父之大盜也而爲齊忠臣段干木晉國之大駟也而爲文侯師孟卯妻其嫂有五子焉相魏以寧其危而解其難景陽淫酒被髮而御於婦人威服諸侯此屈小節以伸大畧者也故守已欲嚴而用人欲廣忠恕之道也



人事林

楚州犁伯善相人國人尊之擬諸姑布子卿襄王召而問之曰朕聞荀卿非相以爲古之人無有也今子之相以何術而神乎州犁伯曰臣非能相相也能相人之行也其人敦龐質厚者富其人弘毅疏通者貴其人豈第寬舒者壽其人靜嘿溫良者安然而有不然者則什而一二矣其人譎詭佻達者貧其人曲鄙黷濫者賤其人蕩散彊暴者天其人險側刺銳者危然而有不然者則什而一二矣故臣之相人也望其顏色聽其論詞察其履行審其交游觀其父子兄弟則美惡之情判矣是故吉凶脩短可得而定矣知此而已也則堯長舜短禹跳湯偏臯陶色如削瓜伊



尹面無須麋傳說身如植鰭周公體如斷菑將以何相斷之乎故臣非能相相也能相人之行者也

桐溪公子學釣於碣洋老人凡三年而辭歸碣洋老人曰子其盡釣之道乎夫釣不以手遇而以目遇不以目遇而以神遇者也若沉若浮若來若去若存若亡若取若棄魚之遊也其臻臻乎而喁喁乎而潏潏乎有所至有所不至有所疑有所不疑疑吾之精平吾之氣而委隨以需之釣以魚而不以我者也然吾更有以語子欲其多獲也置寡焉欲其大獲也置小焉無所不獲者則無所獲而已矣桐溪公子如旨而往無不得意焉一日得鯉魚長九尺大五六圍鱗鬣金映將烹之其夕鯉見夢曰子自以爲得釣之



道也而我以子爲非得釣之道也夫善釣者求人之所不  
爭取天之所不禁是以利厚而名全焉堯舜以德釣民湯  
武以仁義釣天下孔子以道釣千萬世皆是道也而後之  
人莫知之孫吳以兵革釣蘇張以口舌釣申韓以刑名釣  
陳平以陰謀釣莽操以詐逆釣其得之也喉吻未膏而敗  
不旋踵是釣禍而不釣福者也今我與子皆天地之生物  
也素非有憾也而以詐取之必欲磔其肩脇碎其尻腦齧  
脂膏而飽焉殘忍日甚而愆孽滋豐天其終釋誅乎桐溪  
公子寤而大懼出鯉而浮之江折竿毀綸絕不復釣  
養生者未必得生而君子之於養也兢兢焉不敢輕父母  
之遺體也修德者未必得福而君子之於德也兢兢焉不



敢獲天地之降衷也然無伐天和則疾疢不作無反天常則裁害不逢此其常也有不然者則定命之不移者也故文中子曰北山黃公其善譬也先寢食而後鍼藥汾陰侯生其善筮也先人事而後說卦

鑒戒林

齊有大駟積貨如山堆金成丘富踰高國益務侈靡以逞其欲食客且數千人其一人尤爲愛幸憂其主之弗寤也從容說曰以僕視君宜無弗得意者僕請爲君致崑崙之玉合浦之珠以飾宮室帷帳縱橫相錯熠燿有光君其願之乎曰幸甚曰僕請爲君致蜀都之錦吳肆之羅西域之文罽南夷之刻鏤以備後宮之用君其願之乎曰幸甚曰



僕請爲君致燕趙鄭衛之女皆如白台美如曼姬以薦御  
寢席君其願之乎曰幸甚曰僕請爲君求西旅之獒百越  
之鷹渥洼之神馬以馳騁田獵之樂君其願之乎曰幸甚  
曰僕請爲君易楹柱以梅檀施杙桷以文繡金之玉之丹  
之漆之儼若蓬萊之宮君其願之乎曰幸甚曰僕請爲君  
徵歌舞于四方咸池承雲九韶六英日以娛其耳目君其  
願之乎曰幸甚曰此皆君之所易具者也然僕復有請焉  
玉卮而漏可以盛水乎曰不可三寸之管而無當可以實  
粟乎曰不可曰然則君之所欲非直漏卮與無當之管也  
竭君之水不足以充之竭君之粟不足以實之君其得無  
悔乎主人審思而應曰微子之言僕死且不寤敬聞命矣



乃散遣賓客盡變奢靡之行

或問今之毀譽有因乎曰毀無端也譽無端也安得謂之有因曰然則無因乎曰毀者人也毀人者亦人也譽者人也譽人者亦人也安得謂之無因曰蜚廉而謂爲旦奭也隨夷而謂爲盜蹠也其有因乎亦無因乎曰有因也亦無因也子不見夫物乎謂鷺之爲鵠猶可也而今謂鳥之爲鵠也謂驢之爲馬猶可也而今謂鹿之爲馬也此以爲有因乎然人以爲鵠也從而鵠不復知其鳥也人以爲馬也從而馬不復知其鹿也此以爲無因乎豈惟物哉閭閻白台天下之美麗也而或以爲嫫母也曲逆處子天下之陋惡也而或以爲施嬙也人妍則妍人媼則媼此非容之有



變易也人心回惑而視聽之不審耳是故君子之處世也能爲且爽而不能必人之不蜚廉能爲隨夷而不能必人之不盜蹠毀也譽也又何計焉

或問於公孫咸曰爲善而得禍有諸曰有之曰爲惡而蒙福有諸曰亦有之然則福善禍淫之說抑又何也曰天地有常位而有時乎塞也謂塞者其常乎位者其常乎日月有常明而有時乎蝕也謂蝕者其常乎明者其常乎是故腴田沃壤樹之五穀則生樹之蘭蕙則生樹之松柏則生樹之桃李則生其長養必茂其成實必蕃此非其種之獨異也亦非有異術以灌溉之也所因然也若磽田瘠隴則異是矣其樹之也未必能生也其生也擁腫拳曲木不中



於材料稗粗糲穀不登於豆此非其種之獨異也亦非  
溉之不力也所因亦然也是故積善之家猶之腴田沃壤  
也雖有不昌焉者鮮矣積不善之家猶之磽田瘠壤也雖  
有昌焉者亦鮮矣是故鄭罕氏之後亡也宋樂氏之以宋  
升降也此福善之徵也鄭伯有之死于羊肆也子皙之尸  
於周氏之衢也齊慶封之殲於朱方也楚費無極與鄢將  
師之滅族也此皆禍淫之徵也

或問於嚴君平曰壽夭禍福可前知乎曰可曰天可使壽  
貧可使富賤可使貴乎曰不可文帝不能富鄧通貧安可  
使富也武帝不能侯李廣賤安可使貴也良醫之子多死  
於病良巫之子多死於鬼天安可使壽也然則子之爲人



卜也與人子言依於孝與人弟言依於悌與人臣言依於忠抑又何也曰良農不以水旱廢耕良賈不以折閱廢市是故績學修行能爲可貴而不能必貴也然而貴常在我矣勤生嗇施能爲可富而不能必富也然而富常在我矣節性葆和能爲可壽而不能必壽也然而壽常在我矣是故君子而貧賤命也使其爲小人焉昏夜乞哀猶然貧賤也幸而爲君子則其自取也小人而富貴亦命也使其爲君子秉義持禮猶然富貴也不幸而爲小人則亦其自取也取也離舒謂禹微仲曰天下有至險予知之乎禹微仲曰嘗聞之矣羊腸之坂九折車不得遵軌馬不得舒嘶仰睇則目爲之眩俯矚則神爲之悸斯至險乎曰非也太行之山丹



壁刺天絕壑千丈妖草怪木之所蕃陰雲夏雪之所積猛獸不能宓其腰飛鳶不能造其腹斯至險乎曰非也呂梁之水懸崖千仞巨瀉雷奔而劒石巉巖驚濤矢激而漁人股慄斯至險乎曰非也溟渤之波瀕洞浩漾黃流浴日怒沫春天鷗鵬斃裂其側蛟龍蕩射其前沿渦則舟不能出觸礁則技不得施斯至險乎曰非也曰藏鉞魚膾伏甲樂宮禍機起於造次生死變於頃臾斯至險乎曰似矣而猶未也曰然則何以明之曰弄威福以亂刑誅至險也碁鬼域以施毒螫至險也設機阱以陷無辜至險也張罝網以弋貲貨至險也蜜口劒腹賊人而人不知至險也有一于此猶懼賢良之屏跡也而况兼而有之乎



玄冥子曰今天下之妖有五而物妖不與焉刻鏤土木以爲果餌禽蟲飾之丹青加以金縐主人糞除而陳之雜沓賓筵粲爛室庭可悅而不可啗此之謂食妖輿隸而首縉紳之冠臧獲而被綺縠之服男子之帽高倍其面婦人之衣長掩其裳金織施於絺綌藻饋加於廁牖此之爲服妖道德不師周孔文章不則六經勦佛老以爲博逞鈎棘以爲竒以徑超頓悟爲絕學以博聞廣見爲習迷穿鑿經傳非毀程朱此之爲學妖峻刑罰以漁貲飾虛文以賈譽縱豪右而剝善良踈縉紳而狎徒隸以寧郅爲英雄鄙龔魯爲寬縱薄隨夷爲孤介譽跼蹐爲才諛官以賄遷罪以貨免此之謂政妖冠裳而禽犢骨肉而仇讐弱者爲鬼域強



者爲豺狼對門相盜親戚相暴上下相欺父子相疑反表以爲裏訕白以爲黑此之謂俗妖五者繁興莫或變革將風俗日頹而治理日斁國之灾極矣彼草木禽蟲之妖又何足以爲異乎

博志林

人情貴鵠而賤鷄鷄近也貴犀象而賤馬牛馬牛近也惟人亦然寺隣之人不重僧而野人重僧非僧之教行於野人而不行於隣人也野人遠而隣人近也廟宿之丐不畏鬼而社氓畏鬼非鬼之靈能威於社氓而不威於宿丐也社氓遠而宿丐近也惟賢亦然秦始皇重韓非恐其不得見也非旣至則聽讒而誅之漢武帝重相如恨不與同時



也相如旣至則踈而遠之惟文亦然蔡邕得王充論衡而  
寶之秘不以示人世遠故也張竦得楊子雲太玄法言不  
屑一觀與其人比肩故也

山之怪曰魍魎物之怪曰魑土之怪曰羶羊水之怪曰罔象  
木之怪曰畢方火之怪曰遊光金之怪曰清明人亦有之  
嬌奴佞婢讒間骨肉此一家之怪老胥猾史弄法舞文此  
官府之怪受賕骹法變亂彝常此臺省之怪奸闖出入與  
虜爲市以敗爲勝以功爲罪此邊鎮之怪倒持泰阿竊弄  
威福陽施陰設忠佞易置此朝廷之怪天下有道則衆怪  
潛伏天下無道則衆怪繁興有家者不脩其德有國者不  
修其政而欲怪之無作不可得已



古之善相馬者寒風是相目齒麻朝相頰子女厲相目從  
忌相髭許鄙相脫投伐褐相胸脇管青相臍脰陳悲相股  
脚秦牙相前贊君相後凡此十人者皆天下之良工也見  
馬之一徵也而知節之高卑足之滑易材之堅脆能之長  
短其術不同其于知馬一也人亦有徵相人者或以洞微  
察幽或以應變不滯或以博物洽聞或以強幹辨治或以  
飭躬匪懈或以執節不回或以敦行孝弟或以守道嫉邪  
或以臨財介潔或以憲古立言其道不同其于知人也一  
學之於人大矣善學者以一日兼十日以一年兼十年以  
一人兼十人不善學者反是故騏驥天下之疾走也一日  
而千里若伏櫪而不馳則遊蟻過之矣鷗鵬天下之捷飛



也瞬息而千里若戢翼而不奮則鷦鷯過之矣士人之學何以異於是昔甯越中牟之鄙人也苦耕稼之勞謂其友曰何爲而可以免此苦也其友曰莫如學學三十歲則可以達矣甯越曰請以十歲人將休吾將不敢休人將臥吾將不敢臥十五歲而周威公師之夫矢之速也而不過二百步止也步之遲也而百舍不止也以甯越之材而久不止其爲諸侯師豈不宜哉今人之爲學也人未休而先休未臥而先臥恃美質而耽安安此猶迅矢之止於百步者也欲免終身之勞得乎

懼蟬者務在明其火非不愛火也所以疑而致之也釣魚者務在勞其餌非不愛餌也所以誘而利之也沐者必墜



髮而沐不爲止以所去者少而所以利者多也嬰兒齟齬則疾號而齟不爲止以其所小苦而易其所大便也兕虎在於後隋侯之珠在於前而弗及掇非不愛珠也先避患而後就利也逐鹿者不顧兔非不欲兔也以鹿之爲利大也決千金之貨者不爭銖兩之利非輕捐銖兩也以千金之貨重也

古之聖人多矣或以德聖或以才聖或以藝聖神農聖於藥黃帝聖於兵后稷聖於耕垂聖於工夔聖於樂大撓聖於曆蒼頡聖於書巫咸聖於卜師曠聖於音奕秋聖於奕養由基聖於射易牙聖於味扁鵲聖於醫九方臯聖於馬造父聖於御風胡聖於劍之數聖人者其大小不同其偏



全不同其貴賤不同其聖於藝一也

狸頭愈瘋鷄頭已瘻蚩散積血斷木愈齧此類之相推者也鵠矢中蝟爛灰生蠅膏能殺鼈漆見蟹而不乾此類之不推者也厲利劒者必以柔砥擊鐘磬者必以濡木鞞強必以弱輪此不相類而相濟者也陶人棄索而車人掇之屠者棄銷而鍛者拾之齧齏在頰則好在頤則醜繡以爲裳則麗繡以爲冠則譏此有所宜而有所不宜也胡人見廣不知其可以爲布越人見毳不知其可以爲旃此有所通而有所不通也鐵不可以爲舟木不可以爲釜鉛不可以爲刀銅不可以爲弩此有所適而有所不適也埏埴以爲器審木以爲舟鑠鐵以爲刃鑄金以爲鐘因其



質也駕馬而馳服牛而耕鷄以司夜狗以守門因其性也是故聖人之治天下也非能強人之無也因其所固有者而已矣禹鑿龍門闢伊闕決江濬河東注之海因水之流也后稷糴草發菑糞土樹穀使五種各得其宜因地之勢也后夔作樂伯夷興禮義和授時以正君臣以親父子以和夫婦以交朋友相生相養相使相事賞以勸善罰以禁奸皆因民之欲也

小人之欲殺君子其常也然有幸而不死有不幸而死則天也故公孫弘擠董仲舒相膠西盧杞使顏真卿諭李希烈李逢吉遣韓愈如叛藩呂夷簡誘富弼往契丹蓋皆欲殺之也其後三子皆免而真卿獨死天也若漢末諸賢死



百家類纂卷之十三  
於黨錮之禍唐末諸賢死於甘露之變皆天也秦檜將終  
猶起大獄惡張浚李光胡寅等五十三人異已謀欲殺之  
會檜死而諸賢不及於禍亦天也然則君子之處小人何  
如得去則爲否之君子儉德避難不得去則爲遯之君子  
不惡而嚴此明哲保身之道也故古之人臣殺其身而有  
益於君則爲之若主昏政亂權姦虎噬而欲以口舌救之  
無益於君而駢首就戮是非智者之所爲也

昭諭林

畏途十殺一人則父子兄弟相戒也必盛卒徒而後出爲  
欲全其生也今夫麗容澤體衽席之畏途能殺人甘口潤  
喉醪醴之畏途能殺人丘金積玉貨財之畏途能殺人逸



駑長驅輿馬之畏途能殺人便佞善柔交游之畏途能殺  
人薄功厚享祿食之畏途能殺人乘高據危官爵之畏途  
能殺人高談哆議口舌之畏途能殺人辨駁刺議文章之  
畏途能殺人宴安酖毒居處之畏途能殺人知戒其一而  
不知戒其十知盛卒徒之防而不知嚴心志之防往往墮  
身喪家而莫之或戒也可謂智乎

人情莫不畏患而不知所以備患患之所由生也莫之有  
端也患未生也而圖之雖中人猶能致其力患已至也而  
救之雖聖智莫能運其籌自古及今其已事可睹也是故  
江水之始出於岷山也可褰裳而越也及乎濫瞿塘下洞  
庭駑石城經丹徒洪波浴日巨浸春天雖起三軍之衆弗



能禦也鴻鵠之未乎於卵也一指之可殘也及其筋骨之已就而羽翮之所成也則背負青天膺摩赤霄翱翔乎忽荒之上彷彿乎虹霓之間雖有勁弩微繳蒲且子之巧亦弗能加也是故君子爲善若恐不及備禍若恐不免蒙塵而欲無昧涉水而欲無濡不可得也

知道者不感知命者不憂故君子之爲善也不能使福必來其不爲非也不能使禍必不至福之至也非其所求故不伐其功禍之來也非其所生故不悔其行昔孫叔敖三得相而不喜知其所自致也三去相而不悔知非已之罪也彼竇嬰失勢取禍於杙根賈誼長沙傷生於鵬鳥其亦異乎孫叔敖之爲矣



井之冽也爭飲之其垢也人棄之花之鮮也爭翫之其悴也人歆之紵之弊也不如布絲之汙也不如麻文冕之禿也不如縞冠繡裳之黝也不如褐服膾炙之腐也不如畦蔬秬鬯之臭也不如村酤是以君子貴於日新也

假喻林

玄符子曰天下有三危少德而多寵一危也才下而位高二危也無功而有厚祿三危也昔王黼爲相當宋之全盛寵倖冠於一時窮極富貴置大榻於寢室用金玉爲屏綺翠爲帳環以小榻十數擇麗人而居焉恣爲淫樂日夜不已所知或規之曰此危道也不見夫所謂飛蛾者乎粉羽翩翩飛繞燭上以物驅之旣去復來如是者或五六或七



八終於隼首爛額必期於死又不見夫鷦鷯乎掠茅莠以爲巢綴以絲麻房戶甚飭也懸於蒲葦之上自以爲安矣一旦振以飄風枝折巢敗能無墮乎今君之所托不異蒲葦也聲色之害不啻膏火也而乃日崇而不已欲無及得乎不聽未幾而禍作身首異處併滅其家

買馬者不論馬之才力而以色物毛澤爲議則過都歷塊之足不至矣售玉者不論其廉直溫粹無瑕者而以大小徑廣爲議則連城傳國之寶不至矣論士者不以九德六行而以言貌爲議則伊尹仲山甫不立於朝矣方小人之求進也竊廉潔之行襲忠信之名匿情市譽以幸其一售及其蒙寵倖而據要津也則志意遂移而故態盡見寧復



有前日之修飾哉是故鳩傳隼翼其類則似也而其質則非也羔披豹皮其表則似也而其裏則非也稗之主於麥田也猶然麥矣穗之見也而後知其非麥莠而去之不亦晚乎

用有所宜有所不宜物之情也智有所至有所不至人之性也劍戟不長於縫緝而可以剗牛馬刀剪不可以剗牛馬而長於縫緝小大之用殊也銅皆出於石鑄彝鼎則貴鑄錢鎛則賤絲俱生於蚕作繒則賤作錦則貴精粗之用殊也釜槩之於量也不能以容其所不受尋墨之於度也不能以及其所不至盈縮之用殊也人若嗜腐則熊掌不以爲美人若逐臭則芝蘭不以爲芳好惡之情殊也寸鮪



汎濫於蹄涔之中則謂天下無四海之廣芒蜴宛轉於果核之內則謂天無八極之大通塞之性殊也故惟聖人能以一心觀萬心以一身宰天下

操行林

或謂河汾子曰吾子明天人之紀修帝王之道自以為侔伊呂而薄管晏矣今三光不明四極不立烝庶皇皇弗克朝夕奈何不建只尺之勲而徒事於簡編之論述乎河汾子默而不應久之對曰夫人有所能亦有所不能此其罪不在我矣今夫千鈞之石置之峻坂之上繩可以下九仞而頓之於平陸則百人亦不能舉矣萬斛之舟遡於滄溟之中片帆可以去千里而蕩之於汙池則只尺亦不能



旋矣故烏號之弓不能無弦而射萬石之鐘不能無槌而  
鳴勢使然也管仲可以霸齊而季友不能以強魯傳說可  
以昌殷而孔子不能以興周亦各有所遇耳何獨至於予  
而疑之

君子遇君子則引類而升幸其相濟也小人遇小人則張  
牙而噬惡其軋已也故商君暴矣而公子虔殺之穰侯寵  
矣而范雎擯之李斯智矣而趙高戮之武安善魏其而卒  
誅魏其惠卿附安石而卒傾安石此非當前者智之不足  
也恣睢以逞而不知人之議其後也其在後者亦非有不  
釋之讐也爭食則信爭巢則搏而勢不相容也故蛇食百  
物而螂蛆能涉其腹螂蛆食蛇而蝸牛能醢其軀是皆以



百家類纂 卷之十二  
毒相勝者也

華都子謂玄冥先生曰蓋聞神霄須二耀以揚光后土待  
四瀆以導滯故華蟲藻火必資五色之章咸夏韶英必合  
衆音之奏今天下一統萬國咸賓天子懷側席之慕宰相  
効推轂之誠而子乃竄蟄岩壑采擷松苓執匹夫之諒節  
而忘達人之遠圖不已過乎且鸞鳳不翔乎太清麒麟不  
步於靈囿又惡覩文章與瑞應哉先生曰胡然哉瓦釜不  
以代犧尊燕石不以充圭璧噐不相爲用也藜藿不以爲  
鼎寶毛罽不以緝華袞物各有宜也頑夫固陋托跡丘園  
久矣野食於豐草之中逍遙於長林之下木石之與居麋  
鹿之與友豈知有所謂旂常鐘鼎者哉若使矯翼天衢希



光紫闕是使魚目竊價於隋珠而駑駘逐步於絕影也  
將及乎且子獨不見河干之樹乎丹檣罌其枝洪濤蕩其  
根而童豎又折以爲鞭箠此非與人有仇怨也蓋所居者  
然也華霍之檀欒嵩岱之松柏下根通黃泉上葉干青雲  
猿猱巢其巔而虎豹窟其廕千秋萬歲不逢斧斤之患此  
非與人有親愛也所居亦然也僕雖不敏安能舍靈龜而  
與雞鶩爭食棄隆幹而與舜華比榮乎

有學於鬼谷先生者問曰學之道何先曰事神爲先其人  
乃曰走祠廟求神而事之立如叅坐如尸潔齋敬禮無不  
至也先生曰子之爲此誤矣吾所謂神非冥冥之神也方  
寸之謂也今夫足履平地徑咫尺而廣半互而進之無弗適



百家類纂卷之二十一  
也若置榱桷於平地乘而履之則翫飈而不安移而梁之  
澗豁越者必汗溢氣奪股慄毛寒又移而架之不測之淵  
臨而擬之身足皆廢夫步武之地不過容足夷險何與焉  
而安危相判者足無改而神有變也貫蝨承蜩操舟運斤  
非有絕人之巧其神一也醉人不懼其神全也達人不礙  
其神圓也至人不憂其神安也神人不測其神運也子能  
守爾之宅凝爾之神則臨淵而渡豁不疑矣又何夷險之  
能變哉

山致其高而雲雨興焉水致其深而蛟龍生焉君子致其  
道而功名顯焉誦說堯舜致謹一介伊尹之所以致其道  
也仰思繼日夜坐待旦周公之所以致其道也下帷發憤



是不窺園董仲舒之所以致其道也傭身都養講業授經  
兒寬之所以致其道也高臥南陽不求聞達諸葛孔明之  
所以致其道也是以功顯天下而流譽丹青豈一朝夕之  
故哉今刀未習操也而臨俎以割藥未識方也而見病則  
療以美錦而學製衣以良玉而學治噐鮮不敗矣又何功  
名之有哉

玄符子曰甚哉世之衰也家有市而國都不與焉莫親於  
父子而以失業相怨莫懿於兄弟而以氣勢交陵莫昵於  
妻妾而以豐約爲悲歡莫狎於奴僕而以盛衰爲向背又  
何駟僮之足云乎故邀不治田嘗見誚讓矣身爲天子而  
與仲比力乃翁親執掃除之役此父子之市也結髮游學



四十餘年身不得遂及爲齊相遍召昆弟數之曰始吾貧時昆弟不我衣食今吾相齊迎我或千里乃與之絕毋復入門此兄弟之市也賣薪自給耻而乞去出守會稽而夫妻伏謁道左隨以詣郡此妻妾之市也從游至燕噉不得意欲去易水之上者數矣旣其貴顯賜金不及而自言此奴僕之市也於乎世之不爲此輩者少矣一家尚然又况責之交游之末乎彼魏其之引繩批根翟公之書門洩憤亦淺之乎爲見者也

### 國事林

古有言曰仕有五瘴急催暴斂剥下奉上此租賦之瘴也深文以逞良惡不白此刑獄之瘴也昏晨酣燕廢閣王事

此飲食之瘴也侵牟民利以實私儲此貨財之瘴也盛選  
姬妾以娛聲色此帷薄之瘴也此五瘴者今之士人率多  
不免然又有五瘴焉奴顏婢膝佞諛百端顛倒可否以希  
意旨此事上之瘴也以便嬖爲心腹以漁獵爲股肱而舞  
文弄法之徒蟠結左右此馭下之瘴也捃摭休廢曰不畏  
強禦引掖刁惡曰扶植善良是非不白而勸懲不行此沽  
名之瘴也以官府爲傳舍以羣黎爲胡越突尚未黔而苞  
苴是營結納權貴以求遷陟此干進之瘴也陽予而陰奪  
朝令而夕更令甲不遵鈞稽不密而吏胥得以操縱其間  
此政令之瘴也十者不除而欲民之能安政之無僻不可  
得也



漢宣帝綜覈名實厲精圖治羣臣往往有得罪者一日謂  
魏相曰朕方宵衣旰食與公卿共圖治理而績効不宣罪  
辟踵至則臣下負寡人也相稽首而對曰臣聞疑人不用  
用人不疑簡拔賢俊而委任責成未聞人主自以其身叅  
之者也制命在上動輒掣肘其何績効之能圖故拘烏獲  
之臂銖兩不能勝矣掩離婁之目崇岱不能覩矣絆綠耳  
之足尋丈不能發矣斷鴻鵠之翮藩籬不能奮矣是非凡  
衆之所共知者乎臣又聞舟之浮水也欲其木之厚也車  
之行陸也欲其輪之堅也不堅不厚工之罪也堅矣厚矣  
而石擊敗輪水戾破舟此非工之罪也陛下用人亦察其  
用心而已矣奈何以水石罪人哉



天不惟和風甘雨瑞雪慶雲而霜雹降焉地不惟五穀桑  
麻而萁稗稂莠生焉山林河海不惟龜龍麟鳳而鴟梟豺  
狼鯨鱷出焉古今豈有無小人之國哉然善理陰陽者霜  
雹不害善治稼穡者稂莠不害德及禽獸者豺狼鯨鱷不  
害何故至於人而疑之故上有堯舜則四凶不能肆其惡  
上有成王則武庚不能成其亂上有昭帝則上官桀不能  
投其詐上有文皇則宇文士及不能售其佞譬之六轡在  
手而操縱自如寧有僨轅而敗轍者乎苟無以御之而曰  
小人之不可驅除也則何以代天理物爲哉

醯不與蚋期而蚋自集腥不與蠅期而蠅自集權倖之門  
不與奸佞期而奸佞集方其挾薰天之勢張震主之威欣



喜則白骨生肉叱咤則陸地成淵奴顏獻諛駟僧可以乘  
軒狐媚售奸金王可以丘壘是以險壬之徒肩比踵接以  
求其所欲而權倖亦利之猶之蚩蚩距虛相依以爲命而  
不可解者也昔秦檜之當國也柄持泰阿以奔走天下時  
曹冠以教授爲門客王會以婦弟爲親客郭知運以讒譖  
爲逐客吳益以愛婿爲嬌客施全以劇辯爲俠客李季以  
設醮奏章爲羽客龔釜以治產爲庄客夏禩以出入房闥  
爲狎客曹詠以獻計取財爲說客此九客者縉紳切齒道  
路側目而檜方恃爲心腹爪牙此高宗所以失政而宋室  
終於不競也

好尚林

或謂玄谷先生曰蓋聞鷗鵬不戢翼於榆枋神龍不棲身於汙澤物各有所托也螫虫以春而啓戶蟪蛄以秋而揚聲時各有所乘也今海內昇平豪雋競驚丙魏推轂則台鼎同升金張借譽則青雲立致厚貨朝入跛鱉可以遊康莊寶賂通宵冰淵可以轉賜谷今吾子懷經綸之具蘊黼黻之章乃踽踽自好匿身隴畝甘雕蠹之小技而棄閎閱之鴻勲習斥鷃之卑棲而虛廟堂之棖棟意者其有遺慮乎竊爲子羞之先生曰吾子之言所謂知其一而不知其他者也今夫和璧天下之至寶也強以自獻荆斯及之矣問姬天下之美麗也不媒而嫁衆斯賤之矣且夫名之與身將孰親乎身之與貨將孰多乎如枉已以殉名亡身以



殖貨是以隋侯之珠而彈千仞之雀也取之者輕而棄之者重能不爲世人之所嗤乎

腹不飽詩書謂之餒目不接聖賢謂之瞽耳不聞善言謂之聾身不遠聲色謂之穽行不脫凡俗謂之癩此數者士人之大戒也昔張儀蘇秦同志好學迭剪髮而鬻之以相養或備力寫書或假食于路遇見墳典途中無所題記則以墨書掌及股夜還而寫之折竹爲簡剝樹皮編以爲書帙以盛天下良書鬼谷子見而異之乃卒以其術干諸侯震動天下夫二子學從橫之術而猶勤苦若是而況於學聖人之道者乎一暴而十寒翹首而望洋吾未見其有也成有士人苦志修行不殺生蟲不踐生草夜則焚香祝天久

而不懈一夕方焚香忽聞空中神人曰帝閔汝誠問汝亦  
有何欲答曰惟神之命神人曰吾欲使汝華池彌望芳苑  
連阡車馬如水僕從如雲以逞遊觀之樂何如曰不願也  
吾欲使汝積金成丘累玉爲阜困庾連廩錢繒貫朽惟子  
之所需何如曰不願也吾欲使汝丹楹畫棟綺服羅緯歌  
鐘與填箎迭奏舞女與優戲雜陳以娛妻妾以悅賓客何  
如曰不願也吾欲使汝紆紫綬佩金符旌旗前導騎卒交  
馳威靈肅於列郡號令振於方隅何如曰不願也吾欲使  
汝乘文軒曳玉珮劔履行於殿陛班行冠於百辟何如曰  
不願也然則子有何欲曰小人志不在大但願寒不失衣  
饑不廢食入山而樵入水而漁以泉石爲圖畫以巖穴爲



軒楹以清流爲甘醴以風月爲良朋出無追呼之擾入無  
怨咨之聲逍遙客與以終吾之身不亦可乎神人大笑曰  
子之所求乃上界神仙之樂汝何得而有之吾無以應子  
之求矣無已則如前數者而取一焉吾當請命于帝矣  
嚴君平賣卜成都有富人羅冲與之善問曰何故不仕君  
平曰無以自發冲爲具車馬衣糧君平曰吾病耳非不足  
也我有餘而子不足奈何以不足奉有餘冲曰吾有萬金  
子無儋石乃云有餘繆矣君平曰不然吾前宿子家人定  
而役未息未明而興晝夜汲汲未嘗有足今我以卜爲業  
不下床而錢自至餘錢尚有數百積塵盈寸不知所用此  
非我有餘而子不足乎冲大慚退而嘆曰益我貨者損我

神生我名者殺我身終其身亦不仕玄冥子曰君平之論  
有餘不足肯哉其言之也不足而自足乃其所以爲足也  
足而不自足乃其所以爲不足也故披裘負薪而不拾道  
傍之金枵腹行丐而不食嗟來之食此不足而足者也季  
氏損公室以益私家董卓治郿塢以實寶貨此足而不足  
者也君平以百錢自足誠高矣乃若聞勞佚之喻而遽絕  
仕進之心羅冲亦賢矣哉

玄冥子退耕於野韜光歛跡影響不聞於人或嘲之曰吾  
以子爲賢者也而今則知子非賢者也夫珠藏而川媚玉  
韞而山輝美之不可揜也蘭蕙不以易地改臭金石不以  
積載渝堅性之不可變也今子誦說先王之道自負希世



之珍而乃托處山林混跡樵牧公卿無推轂之疏朋舊無  
問訊之書當道不以政事見訪俗士得以氣勢相凌意者  
猶有遺行乎玄冥子曰此非子所得知也倉庚鳴春蜩蟬  
鳴夏蟋蟀吟秋蟻子戰陰物各有時也登高而建旗則所  
示者廣順風而奮鐸則所聞者遠非旗益明而鐸益響也  
所托則然也千鈞得船則浮錙銖失船則沉非千鈞輕而  
錙銖重也有勢之與無勢也吾子以炎涼之跡而爲賢不  
肖之斷案則夷齊慙於盜蹠而尼父不賢於商君矣

或問於玄冥子曰今天下敝矣好惡不公而是非無定譽  
蹠蹠而詆隨夷妍媸母而醜閭胥機阱隱於諛色干戈起  
於舌端變幻而詭隨者比比皆是也若之何無虞乎玄冥

子曰是奚患哉佞色不能悅堯之目淫聲不能入舜之耳  
人各有所志也莫仁於雨露而靡草夏枯莫厲於霜雪而  
松柏冬青物各有所植也是故冰可溶而不可奪寒火可  
滅而不可奪熱金可溶而不可奪重石可破而不可奪堅  
君子豐仁義之幹固禮義之防可生可死可榮可辱而不  
可以易一介之守彼習俗之風靡亦何與於我哉

人有言曰避禍不如避名息影不若藏形不取當時之名  
而得後世之名乃真名也斤斤徼當時之名禍且立至矣  
是故老聃潛身於柱史展季養德於士師莊周托跡於漆  
園韓康伯逃名於藥肆終無辱始邈難及矣越蠡激文子  
以肥遯留侯托黃老以辭榮亦其次焉范曄感蔡澤一言



超然高謝鄧禹見功臣多敗委遠名勢又其次也楊雄投閣而斃龔勝被徵而縊陳蕃李膺駢首就僇孔融彌衡罹死非命陸機齒劍於成都賓王被誅於武氏是皆徵當世之名者也

明術林

鼓宮而宮動鼓角而角動聲之相應也注水於地而流必先濕施火於薪而焚必先燥類之相應也山之雲草莽水之雲鱗鬣旱之雲煙火雨之雲濡絮氣之相應也故人與勤者處則偷怠之志消矣與儉者處則侈靡之志消矣與恭者處則傲慢之志消矣與仁者處則魑悍之志消矣此猶物之從其類也

凡學者定其業然後能專其心專其心然後能聽其說聽其說然後能習其藝習其藝然後能成其名昔造父始習於泰豆逢門始習於甘蠅御泰豆射甘蠅而不徒習以爲性者也習以爲性所以致遠追急也所以除害禁暴也如一以爲車一以爲舟一以爲奕一以爲斂則雖泰豆日授之轡甘蠅日授之矢亦何能傳其術乎

有道之士貴以近知遠以今知古以所見知所不見故審堂下之陰而知日月之行陰陽之變也見瓶之之冰而知天下之寒魚鼈之藏也嘗一臠肉而知一鑊之味一鼎之調也如必升九天之上而後知日月星辰則乾象終不可測矣必履八極之遙而後知山川風俗則寰宇終不可紀



矣必與鴻蒙盤古之人游而後知因革治亂則往代終不可迹矣是故君子不器

或論用相之道貴專乎曰偏聽生姦獨任成亂此專之爲害不可也曰然則貴叅乎曰車無二御舟無二師此叅之爲害不可也何以明之昔者高宗一用傳說而興殷成王一用周公而安周此專用之爲利也齊湣王一用淖齒而殞身於東廟趙主父一用李兌而餓死於沙丘此專用之爲禍也成湯兩用伊尹仲虺齊桓公兩用管仲鮑叔夫兩用臣者國之憂則是成湯不王而齊桓不霸也齊兩用田成闕止魏兩用犀首張儀使兩用而皆利則簡公不弑而魏西河之外不亡也是故人君之御臣也不恃其不吾欺

也恃吾之有不可欺也不恃其不吾畔也恃吾之有不可  
畔也

御龍之智不能馴猿以禮神農之聖不能服豕而耕性有  
所不可變也合抱之松無庸於蟬人之國如甕之繭見棄  
於裸體之邦用有所不可通也食人之虎不能吞一蝟牽  
羊之綆可以御九犍物各有所制也大明普照鼯鼠惡其  
眯目毒霧揚氛輪蛇喜其得時物各有利有不利也驂騑  
騄耳以之運磨不若蹇驢之能干將莫邪以之刈草不若  
鈎鑱之利物各有宜有不宜也千斤之象不惴虎而惴鼠  
三寸之蝎不蠹棘而蠹松物各有害有不害也惟人亦然  
是故先王之爲政也以人治人不以已治人以物制物不



以已制物

砥石不利而可以利金弊不正而可以正弓此善用無用之物也拯溺者不以尋丈之纒索而以金玉決眦者不以毫末之藁針而以鏐鉚此不善用有用之物也以刑守門以宮守宮以眇視準以瞽審音此善用無用之人也以逢蒙御車以王良操檝織錦者使之鍛攻玉者使之巧此不善用有用之人也是故明王之治天下也其人與物非加益也能以無用爲有用也愚主之亂天下也其人與物非加損也妄以有用爲無用也

處世之道莫貴於無心莫不貴於有心故以鑑見醜則善鑑以人舉疵則尤人鑑無心而人有心也虛舟之觸楫心

不怒益以一人則忿而閔虛舟無心而人有心也故天下非無信士也臨貨分財必探籌而定分以爲有心者之於平不若無心者也天下非無廉士也守重寶者必關戶而全封以爲有欲者之廉不若無欲者也

### 廣訓林

翟王使使至楚楚王誇使者以章華之臺高廣美麗無匹也楚王曰翟國亦有此臺乎對曰翟王茅茨不剪綵椽不刻猶以爲作之者勞居之者佚楚王大忤石祁子曰甚矣土木之足以亡人國也秦之二世隋之煬帝蓋可鑒也已盡天下之力竭天下之財山林不足於材木文石不足於礎甃金鐵不足於鈎鑿陶冶不足於蓋覆丹青不足於縹



繪匠氏不足於雕鏤鞭笞殺戮日驅以從事惟恐其不給也而不知咸陽之燼已伏於阿房之營四方之兵已聚於離宮之構曾不得快心極意以娛耳目之好豈不大可哀哉昔堯以土階而帝禹以卑宮而王漢文惜露臺之費而致治幾於成康此萬世君人之法也

夫純鈞魚腸之始下型也擊則不能斷刺則不能入及加之砥礪利其鋒鏑則水斷蛟龍而陸剗犀象不難也明鏡之始下型也矇然未見形容也及粉以玄錫摩以白旃鬚眉毛髮可得而察也玉堅無敵鏤以爲獸首尾成形礚礚之功也木直中繩揉以爲輪其曲中規槩括之力也夫人心之虛靈非若唐碧直木也非若銅鐵之堅厲也彼以磨



礪礪操皆足以成器而況於人乎是故君子博文以廣識約禮以脩行去其偏駁全其神明則可以治人可以宰物可以贊化育可以叅天地而天下之能事畢矣

國有四患外有疑相之臣臣有疑君之權內有疑妻之妾妾有疑嫡之子此四者國之所以危也秦之李斯漢之王莽此疑君之相也殷之崇侯虎秦之趙高此疑相之臣也周之褒姒晉之驪姬此疑妻之妾也周之伯服晉之奚齊卓子此疑嫡之子也此數君者不幸則國亡幸則國亂故曰並后匹嫡兩政偶國亂之本也

十里之間而耳不能聞帷牆之外而目不能見三畝之室而心不能知治天下者東至開梧南撫多顙西服壽靡北



懷僭耳而欲以一人之耳目心智周之不亦難乎故以天下之目視則明無弗見矣以天下之耳聽則聰無弗聞矣以天下之心知則智無弗達矣昔聖王之治天下也大撓作甲子黔如作虜首容成作曆羲和作占日尚儀作占月后益作占歲胡曹作衣夷羿作弓祝融作市儀狄作酒高允作室虞姁作舟伯益作井炎冀作臼乘雅作駕寒衰作御王冰作服牛史皇作圖臣彭作醫臣咸作筮此二十官者聖王之所以治天下也聖王不能二十官之事然而使二十官盡其巧畢其能聖王在上故也聖王之所不能也所以能之也所不知也所以知之也養其神修其德而化矣豈必勞形神而弊耳目哉



爲國者莫患乎有壅救弊者莫先於去壅是故百屋之市  
不畜噬犬八家之井不畜魃牛以有壅也善賈者不壅其  
貨善田者不壅其禾善養生者不壅其氣善導水者不壅其  
泉至於爲治而可以壅其賢乎是故去讒遠色明目達  
聰衢室之問總章之咨一饋十起一沐三握皆所以防壅  
也彼周王之使監謗者鄭人之欲毀卿校是惡其壅而窒  
之也庸將愈乎

夫君表也而臣則其影也君範也而臣則其器也直木無  
曲影欹範無端噐理之恒也故君好聲則師曠子野至君  
好色則毛嬙曼姬至君好宮室臺榭則公輸王爾至君好  
良馬則黃戎盜驪至君好善御則王良造父至君好士則



伊傳周召至惟以理督責於其臣則人主可與爲善而不可與爲非可與爲直而不可與爲枉此二帝三王之所以成盛治也

物理林

山之雲也爲草莽水之雲也爲魚鱗旱之雲也爲煙火澤之雲也爲波水此言物類之各有所感也歲欲豐而甘草先生薺是也歲欲苦而苦草先生葶藶是也歲欲惡而惡草先生水藻是也歲欲旱而旱草先生蒺藜是也歲欲雨而雨草先生藕是也歲欲病而病草先生艾是也歲欲流而流草先生蓬是也此言物理之各有所兆也石瀆子曰天之休咎也善惡恒以類徵世之否泰也灾祥必有先見



觀於此而可知也

蛇化雉化蜃鱗化蛟蟻化駒魚化龍龍化魚鼠化鴛鴦  
化鼠龍化蛇蛇化龍雀化蛤蠹化蝶鳩化鷹鷹化鳩此以  
形類化者也絮化萍苓化龜橘化枳梅化杏莧化鼈樹化  
牛稻化蜚蔬化蝶腐菌化蜂腐草化螢濕麥化蛾朽木化  
蟬此以氣類化者也狐化男雌化雄漿化黿星化肉慧化  
胡肯化人雨化血地化毛此以災異化者也杖化龍舄化  
鳧人化羊星化豕井化酒几化麕杞化犬米化丹墨化雨  
此以妖術化者也形類也氣類也災異也天爲之也妖術  
則人也天之化常有而人之化不常有天之化十八九而  
人之化十一二或曰聖人何以不化曰詩書禮樂典章刑



政莫非化也聖人之化神於道而術士之化神於妖

鳴鳩性一而慈祝鳩性一而孝烏得食而反哺鷄見食而  
呼羣騶虞不殺麒麟好生此物之有仁者也鷹能觸邪鷹  
不擊伏鶻縱煖爪之禽隼釋懷胎之鳥鴛鴦思偶而死獫  
赴類而斃此物之有義者也豺祭獸獺祭魚蜂蟻必宗其  
君睢鳩不亂其匹羔飲乳而必跪其母雉鳴鵠而必推其  
雄此物之有禮者也狼卜食向虎奮衝破蛇蟠向壬鵲巢  
面歲燕伏戊巳蝠忌庚申戒自斷其尾麝自決其臍羣鹿  
環角而外衛羚羊懸角而木棲鴛畫印而開穴鸛禹步而  
發蛇雁設奴而警察鷺偃絲而啄魚螳螂隱葉而捕蟬蜘蛛  
布網而籠蟲蛆蛆禁蛇蛭蜣轉丸溪鰲救邪螺贏祝子



狐聽冰鷁知雨此物之有智者也玄鳥以春分來秋分去  
丹鳥以立秋來立春去伯趙以夏至鳴冬至止青鳥以立  
春鳴立夏止此物之有信者也

石瀆子曰甚哉似是之足以惑人也西方有獸名曰騶虞  
其性好生出則天下偃兵人以其文之似虎也而遂以爲  
真虎也南方有鳥名曰昭明其性好亂出則天下交兵人  
以其羽之類鳳也而遂以爲真鳳也故王莽之謙恭似周  
公矣而終以居攝篡漢安石之經術師孔子矣而終以新  
法禍宋

雀性好淫名飲噐爲爵所以爲飲戒也鳩食多噎刻老人  
杖爲鳩所以爲食戒也鵲行不良借其字爲鳥履之鳥所



以爲行戒也驚性耿介盡其形於衣所以爲節訓也飾鼎以饗饗貪之戒也飾簠簋以龜庶之勸也

飾羊以爲虎其皮則虎也而其性則羊也接梅以爲桃其實則桃也而其味則梅也是故色厲者不免於內在而論篤者未必爲君子

函牛之鼎不可以烹鷄萬石之鐘不可以合舞柱之良也析之而司爨則不如赤棘矣蘭之香也刈之而飼牛則不如生芻矣明鏡便於照形其於以函食也不如簞犧牛宜於廟牲其於以致雨也不若黑蜩

魚懷珠而鱗紫鹿戴玉而角斑含其美以自澤也蓬依麻而自直蔦附木而升高取諸物以自輔也

君子與小人處則小人勝而君子不勝一善噬而一不善噬也小人與小人處則必比而不相害非其性之忘噬也各忌其爪牙毒螫而不敢發也故蟾蜍食螂蛆螂蛆食蛇蛇食蟾蜍三物相值莫敢先動是亦騎虎之義不得也

崑崙上薄穹窿下蟠厚地妖少怪木之所蕃陰雲夏雪之所積仙靈蟄藏而寶藏興發跂行喙息翹肖蠕動之類不可殫而記也滄海之波瀕洞浩漾黃流浴日怒沫春天萬川不能增其尋丈尾閭不能洩其一勺非不破舟殺物也而蛟龍黿鼉之屬蟻聚而蝨息焉以其有所隱也澧水之深千仞而不受塵垢投金鐵鍼焉則形見於外非不深且清也魚鼈龍蛇莫之肯歸也是故石田不生五穀禿山不



游麋鹿以其無所隱也

蜎蟲之衆也而不能無蛇虺毛蟲之衆也而不能無虎豹此天地之沴氣也然置蛇虺於藪澤置虎豹於山林此天地之義氣也今夫小人之生亦物之蛇虺虎豹也顧所以置之何如耳若寵之以祿秩委之以要津是以虎豹蛇虺而置之於通衢也能無噬而螫乎

馬以致遠牛以負重鷄以司夜狗以守門因其性也埏埴以爲器窬木以爲舟鑄金以爲鐘鐻鐵以爲刃因其質也陸處而耕水處而漁山處而樵谷處而牧因其地也水之用舟沙之用鳩泥之用輔山之用藁因其勢也

歐冶風胡干將莫邪所操各異其于善劍一也伯樂韓風

秦牙管青所相各異其于知馬一也汲水救火或以瓶  
或以盆盂或以斗杓或以甕瓴盛水各異其於滅火一也  
伐木取材或爲輪輿或爲梁柱或爲棺舟或爲什噐所用  
萬方其於適用一也

軸不運而三十輻各以其力旋以不動而用動也瑟不鳴  
而二十五絃應以無聲而使有聲也張琴者小絃急而大絃  
各以其類緩賤者勞而貴者逸也作樂者黃鐘䟽而衆音繁卑者疾  
而尊者舒也

定制者徇禮而不徇情故弁冕衮裳可服而不可好也太  
羹之和可食而不可嗜也朱絃䟽越一唱而三歎可聽而  
不可快也致用者貴實而不貴名故服劒者期於銛利而



不期於昆吳太阿乘馬者期於千里而不期於黃戎盜驪  
鼓琴者期於鳴廉脩營而不期於濫脅號鐘

城峭必崩岸峭必陀丘阜不能生雲雨涔水不能生魚鼈  
故邃谷長林非爲虎豹也而虎豹棲焉叢木茂枝非爲飛  
鳥也而飛鳥集焉大江淵海非爲蛟龍也而蛟龍藏焉

良馬啗粟一石飲泉一斛非潔清即不受介而馳初不甚  
疾也行百里而始奮迅行五百里而不起塵褫鞍甲而不  
息不汗若無事然此其受大而不苟取力裕而不求逞致  
遠之材也君子以之下馬者日食不過數升而秣不擇粟  
飲不擇泉攬轡未安踴躍疾驅百里力竭汗喘欲斃此其  
寡取而易盈好逞而易窮驚駘之才也小人以之

記述林

易者象也象也者像也彖者材也爻也者效天下之動者也彖之材即易之象也爻之效即彖之材也始終本末一以貫之矣如需之言湏也而六爻之中湏得其地與時則吉不得其地與時則凶比之言親也而六爻之中比得其人則吉比之匪人則凶豫一也而六爻之中當豫而豫則吉不當豫而豫則凶頤一也而六爻之中養得其正則吉養失其正則凶咸一也而得感應之常則吉失感應之常則凶遯一也而遯以其時則吉遯失其時則凶漸一也而進得其所則吉進失其所則凶艮一也而止其所止則吉止非所止則凶推之六十四卦莫不皆然執是以求之則



易之大義其庶幾乎

讀二典三謨則知禹之治不如堯舜之化矣讀湯誓泰誓則知武王之伐不如湯之放矣五子之歌其夏德之衰乎盤庚其殷道之衰乎呂刑其周道之衰乎

以文言之唐虞三代其以世而降耶蓋典謨之文明白易知夏猶承之至盤庚而始晦至周而大晦矣以治言之唐虞三代亦以世而降耶蓋堯舜之治專務德化禹猶繼之至商而禁興至周而禁密矣

詩小序不知何人所作然源流之所自蓋遠矣但傳授不能皆真而詞旨時或小舛子朱子見其然也而率以義理駁正之雖䟽釋詳明而戾于本旨者亦多矣是何也傳舊

者事多真而久或訛失者十而一二矣億斷者理雖精而  
事則否得者十而一二矣如執此而廢彼豈爲善學者哉  
胡文定春秋傳爲宋高宗而作也故其義一以尊君卑臣  
內夏外夷爲主其有不能通者亦強而合之曰美惡不嫌  
同詞曰書之重詞之復其中必有大美惡存焉蓋至是而  
聖人之意鑒矣然詞嚴而義正事核而氣充宋之文吾必  
以是爲首選乎

禮記雜出於漢儒而禮經淆矣 國朝以禮記列於學官  
用之取士而禮經亡矣昔子朱子慨禮經之淆也而爲儀  
禮經傳以儀禮爲經而取禮記與他書言禮者爲傳其於  
古禮蓋庶幾焉惜乎未成而卒而終之於門人之手遂使



後人不尊而遺經不復豈非斯文之不幸哉近若湛甘泉之二禮測亦可以相發明矣

虞氏曰禮記乃儀禮之傳儀禮有冠昏鄉飲燕聘禮禮記有冠昏鄉飲燕聘義以釋之蓋儀禮周公所作而禮記則漢儒所錄亦儀禮之流也何以言之儀禮漢初已行故高堂生傳之蕭奮蕭奮傳之孟卿孟卿傳之后蒼后蒼傳之戴聖二戴因習儀禮而錄禮記故知儀禮之流也

賦以騷爲至賈董猶爲近之若三都賦吾無取焉詩以漢魏爲準晉猶爲近之若三謝詩吾無取焉

古詩若陶淵明六朝之冠也陳子昂初唐之冠也李太白盛唐之冠也然較之於漢魏則相去遠矣蓋漢魏之詩興

而厚三子之詩薄而流漢魏之詩婉而約三子之詩直而肆漢魏之詩比興無涯而三子之詩情神畢露其可比而同之乎求其庶幾者其阮嗣宗陸士衡乎若左思之咏史郭璞之遊仙又其次也

晉之文以二陸爲至然雲非機比矣唐之文以韓柳爲至然柳非韓比矣初唐之詩以燕許爲宗然張非蘇比矣盛唐之詩以李杜爲冠然杜非李比矣學者當自得之

言文者必稱韓而不知文之衰自韓始也言詩者必稱杜而不知詩之衰自杜始也是何也古人之爲文也吐詞爲經出言成章意不屬而自屬言不文而自文亦猶日月星辰之麗天也亦猶山川草木之麗地也至昌黎則造意績



詞安排布置殆如匠者之構居室矣古人之爲詩也風雅  
頌以經之賦比興以緯之以道性情之真以達風諭之旨  
如風之動物也如水之行地也至少陵則誇多眩竒羅網  
堆積殆如庖人之充俎豆矣後之法韓者不學其變化而  
專學其鍛鍊法杜者不學其宏博而專學其艱澁夫安得  
不弊乎

莊子襲列子而爲之者也呂氏春秋襲莊列左氏管子而  
爲之者也淮南子襲莊列文子韓非子呂氏春秋而爲之  
者也

伯牙鼓琴六馬仰秣瓠巴鼓琴游魚出聽誠乎琴也養由  
基射矢中石矢乃飲羽誠乎射也伯樂相馬所見無非馬



誠乎馬也庖丁解牛所見無全牛誠乎牛也夫誠乎技者而猶若是而况誠於道者乎

先儒有言學者所以學處貧賤患難也若富貴利達則不須學也惟聖人則異是矣是故文王演易於羗里忘其爲羗里也孔子絃歌於陳蔡忘其爲陳蔡也此不學而能者也顏子簞瓢陋巷而不改其樂原憲衣敝履穿而不困於病夏侯勝坐犴狴而授尚書陸德輿謫忠州而作集驗范忠宣竄永州而體貌益康程伊川貶涪州而容髮轉勝蘇文忠謫惠州而濟施不倦張無垢謫南安而誦讀不輟此皆學而能之者也然則富貴利達果可以不學乎曰此自處困言之也其致則一也如弗學則誣上行私亂政虐下



將何所不至矣

人有以耳視者亦有以耳食者有以目行者亦有以目食者衣服未必稱於體也珍寶未必辨於目也聞人之所美而美之此謂以耳視也膏粱未必充於腹也調和未必適於口也聞人之所美而美之此謂以耳食也山川未之歷也宮室未之游也圖史之所稱而亦稱之此謂以目行也果餌之刻鏤無益於味也膳羞之朱綠無當於口也時俗之所珍而亦珍之此謂以目食也雖然此猶以形欲論也乃於道德仁義亦無不然不亦可哀之甚哉

楊文定公曰士君子一言一行無愧幽明然後無負於父母生身之恩又曰人必有躬行之實然後可以訓子孫故



不敬其身而能孝其親者未之有也不脩其身而能裕其後者亦未之有也

脩爲之功其於接宿承祭也不待勉強也而施之於妻子則忽矣操存之念其於應事接物也不易察識也而形之於夢寐則真矣故曰夜上諸夢寐晝觀諸妻子蓋妻子旣刑則修爲無所不至矣夢寐旣良則操存無所不至矣

書卽我也讀書所以盡已也敬以直內義以方外邇之事父遠之事君中盡人之性下盡物之性皆書之所具也亦我之所具也故讀書所以求盡已也故曰萬物皆備於我矣反身而誠樂莫大焉強恕而行求仁莫近焉此盡已之謂也舍是而爲學吾弗知之矣



百家類纂卷之十二  
毀我者我以無毀勝之毀亦不甚害我者我以無害勝之  
害亦不甚可怒之事以不怒勝之怒亦自止可競之地以  
不競勝之競亦自消

道家類總題

漢藝文志曰道家者流蓋出於史官歷記成敗存亡禍福  
古今之道然後知秉要執本清虛以自守卑弱以自持此  
君人南面之術也合於堯之克讓易之謙謙一謙而四益  
此其所長也及放者爲之則欲絕去禮學兼棄仁義曰獨  
任清虛可以爲治

隋經籍志云道者蓋爲萬物之奧聖人之至蹟也易曰一  
陰一陽之謂道又曰仁者見之謂之仁智者見之謂之智  
百姓日用而不知夫陰陽者天地之謂也天地變化萬物  
蠢生則有經營之迹至於道者精微淳粹而莫知其體處  
陰與陰爲一在陽與陽不二仁者資道以成仁道非仁之



謂也智者資道以爲智道非智之謂也百姓資道而日用而不知其用也聖人體道成性清虛自守爲而不恃長而不宰故能不勞聰明而人自化不假脩營而功自成其玄德深遠言象不測先王懼人之惑置於方外六經之義是所罕言周官九兩其三曰師蓋近之矣然自黃帝以下聖哲之士所言道者傳之其人世無師說漢時曹參始薦蓋公能言黃老文帝宗之自是相傳道學衆矣下士爲之不推其本苟以異俗爲高狂狷爲尚迂誕譎怪而失其真

宋蘇軾氏曰道家者流本出於黃帝老子其道以清靜無爲爲宗以虛無應物爲用以慈儉不爭爲行合於周易何思何慮論語仁者靜壽之說如是而已自秦漢以



來始用方士言，乃有飛昇變化之術。黃庭大洞之法，太上天真木公金母之號，延康赤明龍漢開皇之紀，天皇太一紫微北極之祀，下至於丹藥奇技符籙小數，皆歸於道家學者，不能必其有無。然臣切論之，黃帝老子道之本也，方士之言末也。

馬端臨氏曰：道家之術雜而多端，先儒之論備矣。蓋清淨一說也，煉養一說也，服食又一說也，符籙又一說也，經典科教又一說也。黃帝老子列禦寇莊周之書所言者，清淨無爲而已，而畧及煉養之事，服食以下所不道也。至赤松子魏伯陽之徒，則言煉養而不言清靜；盧生李少君欒大之徒，則言服食而不言煉養。張道陵寇謙



之之徒則言符籙而俱不言煉養服食至杜光庭而下  
以及近世黃冠師之徒則專言經典科教所謂符籙者  
特其教中一事於是不惟清淨無爲之說畧不能知其  
旨趣雖所謂煉養服食之書亦未嘗過而問焉矣然俱  
欲冒以老氏爲之宗主而行其教蓋嘗卽是數說者而  
詳其是非如清淨無爲之言曹相國李文靖師其意而  
不擾則足以致治何晏王衍樂其誕而自肆則足以致  
亂蓋得失相半者也煉養之說歐陽文忠公嘗刪正黃  
庭朱文公嘗稱參同契二公大儒攘斥異端不遺餘力  
獨不以其說爲非山林獨善之士以此養生全年固未  
嘗得罪於名教也至於經典科教之說盡鄙淺之言庸

黃冠以此逐食常欲與釋子抗衡而其說較釋氏不能  
三之一爲世患蠹未爲甚鉅也獨服食符籙二家其說  
本邪僻謬悠而惑之者罹禍不淺樂大李少君于吉之  
徒以此殺其身柳泌趙歸真之徒以此禍人而卒自嬰  
其戮張角孫恩呂用之之徒遂以此敗人天下國家然  
則柱史五千言曷嘗有是乎蓋愈遠而愈失其真矣

道家類總題畢





老子題辭

老子姓李氏名耳字伯陽以其耳漫無輪號曰聃楚國苦縣人也仕周爲藏室史當周景王時吾夫子年三十嘗問禮於聃歸有猶龍之歎周室旣衰老子西游將出散關關令尹喜知爲異人彊以著書遂著上下篇五千餘言而去莫知所終林希逸氏曰大抵老子之書皆借物以明道或因時世習尚就以諭之讀者但以其借諭之言皆爲指實言之所以未免有所貶議也此從來一宗未了欸案若研究推尋得其初意真所謂千載而下知其解者旦暮遇之也本朝宋景濂氏曰聃書所言大都歛守退藏不爲物先而一返於自然由其所該者廣



故後世多尊行之。如曰視之不見名曰夷聽之不聞名曰希搏之不得名曰微道家祖之谷神不死是謂玄牝玄牝之門是謂天地根神仙家祖之吾不敢爲主而爲客不敢進寸而退尺是謂行無行攘無臂仍無敵執無兵禍莫大於輕敵輕敵幾喪吾寶故抗兵相加哀者勝矣兵家祖之道冲而用之或不盈淵乎似萬物之宗挫其銳解其紛和其光同其塵湛兮似若存吾不知誰之子象帝之先莊列祖之將欲翕之必固張之將欲弱之必固彊之將欲廢之必固興之將欲奪之必固與之申韓祖之以正治國以奇用兵以無事取天下張良祖之我無爲而民自化我好靜而民自正我無事而民自富

我無欲而民自朴曹參祖之聃亦豪傑士哉薛君采氏  
曰老子之書皆性命之說多出於上古聖人之遺言故  
古者叙六家而謂之道世顧目之爲異端過矣道者修  
之身以及天下天下事無不統也後世直以道家爲養  
生耳皆予所未喻也方士之言養生者往往穿鑿於性  
命之外不知長生之道不越乎養性世儒率言知性知  
天而斥小養生不知養其性者即同於天道而不亡此  
其不聞性命之實不合聖人之道者邪傳曰禮失求之  
野聖人之道不明於世久矣學者求道而未得比老子  
於野而求之何不可者况老子古之史官孔子之所嚴  
事豈野人之比已乎按老子諸家註凡數種不具錄錄



其合於道者間出臆見稍附之章句中俟學者讀而自得焉

老子題辭畢

百家類纂卷之十三

道家類 老子

道經上篇

道可道非常道名可名非常名無句名天地之始有句名

萬物之母常無句欲以觀其妙常有句欲以觀其徼徼竅通物

所出之此兩者同出而異名同謂之玄玄之又玄衆妙之

門通結上文兩者謂有無也皆原於道故曰同出曰有曰

無故曰異名玄者深遠而不可測之意玄之又玄以深

嘆其不可測也衆妙之門言天下神妙之理皆出於斯二者也

天下皆知美之爲美斯惡已皆知善之爲善斯不善已故

有無相生難易相成長短相形高下相傾音聲相和前後

相隨是以聖人處無爲之事行不言之教萬物作焉而不



辭生而不有爲而不恃功成而不居夫惟不居是以不去

言有其有者不能有而無其有者能有之此八字最有味書曰有其善喪厥善便是此意

不尚賢使民不爭不貴難得之貨使民不爲盜不見可欲

使心不亂是以聖人之治虛其心實其腹弱其志彊其骨

常使民無知無欲使夫知者不敢爲也爲無爲則無不治

恬淡而無所思心之虛也故精神氣內守而腹實矣  
退怯而無所爲志之弱也故精力不耗而骨彊矣

道冲而用之或不盈淵乎似萬物之宗挫其銳解其紛和

其光同其塵湛兮似若存

挫其銳者摧挫芒銳用柔弱也  
解其紛者解釋紛結不繫累也

和其光者光而不耀則渾然矣  
同其塵者大同於物無所異也

吾不知誰之子象帝之先

道不知其何自而生疑若在天帝  
之先此莊子所謂自本自根也

天地不仁以萬物爲芻狗聖人不仁以百姓爲芻狗

不仁不自

有其仁也芻狗已用而棄之相忘之喻也天地之間其猶橐籥乎籥者橐之管也橐籥用而

風生虛而不屈動而愈出多言數窮不如守中何嘗容心天地之於

生物亦何嘗容心故以此喻之况用之則有風不用則無亦有過化之意數猶曰每每也意謂天地之道不容以言

盡多言則每每至於自窮不如默然而忘言

谷神不死是謂玄牝谷神者虛而無形感物而應者也關尹曰在已無居形物自著其言蓋本

於此物有生則有死谷神本自不生故不死也玄者贊美之辭牝者言為天下母也列子所謂不生者能生生不化

者能化化也此理至微學者宜深思而得之則夫天人之道死生之說皆可知矣玄牝之門是謂

天地根綿綿若存用之不勤蘇子由曰綿綿微而不絕也若存存而不可見也王輔嗣

曰欲言存邪則不見其形欲言亡邪萬物以之生故曰綿綿若存無物不成用而不勞故曰用之不勤

天長地久天地所以能長且久者以其不自生故能長生

是以聖人後其身而身先外其身而身存非以其無私邪



故能成其私

此章以天地喻聖人無容心之意夫聖人之無私初非有欲成其私之心也然而私以之

成此自然之道耳如欲成其私即有私也未有有私而能成其私者也

上善若水水善利萬物而不爭處衆人所惡故幾

平於道

矣居善地心善淵與善仁言善信政善治事善能動善時

此言上善若水也行已不爭避高處下善地也藏心微妙深不可測善淵也其施兼愛而無私善仁也其言有徵而不爽善信也治國則清靜自正善治也遇事則因應無方善能也進退存亡合於天道善時也夫惟不爭

故無尤矣

持而盈之不如其已

以音

揣而銳之不可長保

揣治也持槃水而加盈之

非無溢之道也故不如其已厲鋒刃而加銳之乃速金玉毀之由也故不可長保借物理之易見者以况下文

滿堂莫之能守富貴而驕自遺其咎功成名遂身退天之

道

邵子曰老子五千言大抵皆明物理然物理即天理也



載營魄抱一能無離乎

營魄也神也鬼精也氣也鬼以載

合而言之則營魄為一

離而言之則鬼魄為二

專氣致柔能如嬰兒乎

朱子曰專氣致柔看

它這箇是甚麼樣功夫專是專一無間斷致柔是到柔之

極處才有一毫發露便是剛這氣便粗了愚謂朱子之說

甚善老子之學天下

莫能行者此其一也

世俗之知解矣然或存而不忘則是亦妄見而已必滌除

之無使留於胃中而為真性之病也以上三者言治身之

道下三者言

治國之道

愛民治國能無為乎

任司馬溫公曰善愛民者

治國者任物以

能不勞而成

天門開闔能無雌乎

行則行也雌靜也猶夫闔也聖人之明白四達能無知乎

道雖曰一動一靜然當以靜者為本

聖人之聽政其聰明無所不見然常因萬物之情賢不肖是非使各自明而已之知不勞焉

生而不有為而不恃長而不宰是謂玄德

此章之意大抵自然而然無為自然則其心常虛故以神載鬼而不以鬼載神此聖人之事以鬼載神則着迹矣老子一書大抵只



是能實而虛能有而無則為  
至道縱說橫說不過此理

三十輻共一轂當其無有車之用埏埴埴埴以為器當其

無有器之用鑿戶牖以為室當其無有室之用故有之以

為利無之以為用吳幼清曰車載重行遠器物所貯藏室人所寢處有此車有此器有此室皆所

以為天下利也故曰有之以為利然車非轂館空虛之處

可以轉軸則不可以行地器非中間空虛之處可以容物

則不可以貯藏室非戶牖空虛之處可以出入通明則不

可以寢處車以轉軸者為用器以容物者為用室以出入

通明者為用皆在空虛之處故曰無之以為用愚按章內

雖互舉有無而言顧其指意實所以即有而發明無之為貴也

五色令人目盲五音令人耳聾五味令人口爽馳騁田獵

令人心發狂難得之貨令人行妨是以聖人為腹不為

為並目故去彼取此為腹者內養其神可長久也為目者外玩細娛反自害也呂氏春秋曰聖

人之於聲色滋味也利於性則取之害於性則舍之此全性之道也

寵辱若驚

無寵則無辱有寵而失之則有辱是寵所以為辱也人之累於寵者常若有驚悸而不得寧矣

貴大患吾身

無貴則無患有貴而慮失之則有患貴所以為大患也

何謂寵辱辱為

下得之若驚失之若驚何謂貴大患若身吾所以有大患

者為

去聲

吾有身及吾無身吾有何患故貴以身為天下則

可寄於天下愛以身為天下乃可以託於天下

夫至人者量腹而食

度形而衣取養於世不啻足矣若夫天下之富九州之養無益於生而足以為患此所以重為天下也如斯人者寄

託之以天下則天下皆蒙其利矣

視之不見名曰夷聽之不聞名曰希搏音博之不得名曰微

此三者不可致詰故混

上聲

而為一

搏執也夷希微皆虛無之意詰察也

其上

不皦

音皎

其下不昧繩繩今不可名復歸於無物

皦明也繩繩衆多也

無物其本始也在上不加明在下不是謂無狀之狀無象加晦動而為萬物終則復歸於無物



之象是謂惚恍迎之不見其首隨之不見其後執古之道以御今之有能知古始是謂道紀人之應物也不知本原自累此世之通患也惟執古以御今者以無事為真宅以有事為應跡事雖萬變而在我之不變者常一也道紀者道之綱紀蓋天下之事具本在此故也

古之善為士者微妙玄通深不可識夫惟不可識故強為之容豫兮若冬涉川猶兮若畏四鄰儼若客渙若水將釋敦兮其若樸曠兮其若谷渾兮其若濁冬涉川常難之也儼若客不敢僭也水將釋如恐陷也若樸質而無文章也若谷虛而無所藏也若濁晦而不分明也皆所謂強為之容孰能濁以靜之徐清孰能安以久之徐生井汲之多必渾木徙之數必弊人之性情有似於此除情止念則垢濁去而天光發收視反聽則精神定而真氣生日孰能者勉人之辭也保此道者不欲盈夫惟不盈是以能敝不新成虛也敝故

也保此道者其中常虛則但見故而不新此便是首章所謂常道處做而不新則千載如一日矣能如此而後為道之大成是以能做不新是一句成是一句

致虛極守靜篤

虛靜者性命之本然也故為道者必損有以之虛損動以之靜損之又損以至於虛

靜之極則私欲盡而性可復矣然虛靜者實非二道蓋未有虛而不靜而不虛者也

萬物並作吾

以觀其復夫物芸芸各歸其根歸根曰靜靜曰復命而靜

人生

天之性也守靜則能復其初動則逐物而失之此靜之所以為復命乎

復命曰常知常曰明

不知常妄作凶知常

句

容容乃公公乃王王乃天天乃道

道乃久没身不殆

此章之言蓋莊子所稱內聖外王之道也夫語王者之道其極至於王乃天天

乃道其道可謂甚大矣自非聞道之君子知反其本固不越虛靜而已矣虛靜之學成則帝王之道備於已非虛靜

之外別有餘事也茲老莊道術之大端也

太上知有之其次親之譽之其次畏之其次侮之故信



不足焉有不信猶今其貴言功成事遂百姓皆曰我然

大道廢有仁義智慧出有大偽六親不和有孝慈國家昏

亂有忠臣蘇子由曰堯非不孝也而獨稱舜無瞽叟也伊尹周公非不忠也而獨稱龍逢比干無桀紂也

涸澤之魚相吻以濕相濡以沫不如相忘於江湖

絕聖棄智民利百倍絕仁棄義民復孝慈絕巧棄利盜賊

無有此三者以爲文不足故令有所屬屬附著也凡貴本而誠者敦厚而可

久華而不實者浮薄而寡用文之不足審矣聖人知文飾之弊故令民宗附於質如下所云也見素抱樸

少私寡欲物無飾曰素木未斲曰樸見素者外見其質不加飾也抱樸者內全其真不分散也少私者省

其自營去健羨也寡欲者節其嗜好反恬淡也此意蓋謂文治愈勝世道愈薄不若還淳反朴如上古之時也此亦

一時憤世之言

絕學無憂

夫學者貴以養性而養性莫若無累今世俗之學務外以累其性情豈非飲藥以加病乎絕而



不為可以無憂矣莊子曰繕性於俗學以求復唯上之與

其初滑欲於俗思以求致其明謂之蔽蒙之民唯阿皆應聲言此二者

阿相去幾何善之與惡相去何若但僅有遲速之分然一

則為恭一則為慢其善惡之相去則遠矣事有毫釐之異

而得失遽相懸如此可不致畏於幾微之際以求免於不

善人之所畏不可不畏荒兮其未央哉衆人熙熙如享太

牢如春登臺我獨泊兮其未兆若嬰兒之未孩上言畏懼與人同此

言好樂與人異蓋畏懼者聖人儆戒之常而好樂者衆人貪欲之志也

乘乘兮若無所歸衆人皆有餘我獨若遺我愚人之心也哉沌沌兮俗人昭昭

我獨若昏俗人察察我獨悶悶澹兮其若海颺兮似無所

止衆人皆有以我獨頑且鄙我獨異於人而貴求食音於

母吳幼清曰食母二字見禮記內則篇即乳母也

萬物資道而生所謂萬物之母也故曰食母

孔德之容惟道是從孔大也自天地以至萬物凡成象成



所從出者道之為物惟恍惟惚今恍其中有象恍兮惚

其中有物窈兮冥兮其中有精其精甚真其中有信自古

及今其名不去以閱衆甫吾何以知衆甫之然哉以此

有物其中有精此即真空而後實有也其精甚真其中有

信此兩句發明無物之中真實有物不可以為虛言也道

之名在於古今一日不可去而萬善皆由此出衆甫衆美

也即天地萬物是也閱歷閱也萬善往來皆出此道也以

此者以道也曲則全枉則直窪則盈弊則新少則得多則惑

者缺故能全如月之未望是矣枉則直者屈故能信如尺

蠖之屈是矣窪則盈者謙受益也弊則新者闢然而日章

也少則得以約為紀是以得也是以聖人抱一為天下式

不自見故明不自是故彰不自伐故有功不自矜故長夫

惟不爭故天下莫能與之爭古之所謂曲則全者豈虛言

哉誠全而歸之

希言自然故飄風不終朝驟雨不終日孰為此者天地天地尚不能久而況於人乎故從事於道者道者同於道德者同於德失者同於失同於道者道亦樂得之同於德者德亦樂得之同於失者失亦樂得之信不足有不信天地之間只自然兩字可以盡天地之理希無也自然無為也謂此二字其言不多而天地之理不過如此而已

跂者不立跨者不行自見者不明自是者不彰自伐者無

功自矜者不長

舉踵曰跂張足曰跨立欲增高則反害其立行欲增潤則反害其行借易見者喻下

所云

其在道也曰餘食贅行

去聲物故惡之故有道者不處

也餘食贅行皆長物也有道者無迹有迹者則為長物矣

也曰餘曰贅莊子駢拇枝指之意也食之餘棄形之贅疣人必惡之此有道者所以不處也言不以迹自累也



有物混成先天地生寂兮寥兮獨立而不改周行而不殆  
可以為天下母吾不知其名字之曰道強為之名曰大大  
曰逝逝曰遠遠曰反故道大天大地大王亦大域中有四  
大而王處一焉人法地地法天天法道道法自然大不足以盡之又強  
又名之曰逝逝者往也不可追逐也逝不足以盡之又強而名之曰遠遠者不可近也不可得而親附也遠又不足以盡之又強而名之曰反反者復歸於根之意也此皆鼓舞之文在莊子此類尤多

重為輕根靜為躁君是以君子終日行不離輜重雖有榮

觀燕處超然

古者吉行乘車乘車師行乘兵車皆有輜重在後輜車衣車車前後有蔽所以載行者之衣食

器械以其累重故稱輜重里承上言輕重靜躁其事不同君子知其然故其行也不敢取輕疾而遠去其輜重其燕處也雖佳麗之玩在前而無所以繫累見君如何萬乘之主而以子隨其所在而未嘗失於輕躁也

身輕天下輕則失臣躁則失君



善行無轍迹善言無瑕謫善計不用籌策善閉無關楗而

不可開善結無繩約而不可解是以聖人常善救人故無

棄人常善救物故無棄物是謂襲明

襲明猶言重明謂聖人之智明而又明也

故善人不善人之師不善人善人之資不貴其師不愛其

資雖智大迷是謂要妙

列子曰聖職教化夫聖賢之任唯在教化而凡民之事正在從教天

下之道其孰有切於此哉

知其雄守其雌為天下谿為天下谿常德不離復歸於嬰

兒知其白守其黑為天下式為天下式常德不忒復於無

極知其榮守其辱為天下谷為天下谷常德乃足復歸於

樸

守保也雄剛強雌柔弱白明顯黑昏昧榮尊高辱卑下谿谷衆水所注天下盡言之也式法也凡人之剛強與

夫自見自高者求以服人而人愈不與也夫惟知剛強之不可守而守其柔弱知明顯之不可守而守其韜晦知尊



榮之不可守而守其卑下如此則自後而人先之自卑而人高之是以為天下之所歸往為天下之所取法矣常德

者柔弱晦昧卑下固恒久之德也樸散則為器聖人用之則為官長故大

制不割樸散而為器器各有宜而不能相通也官長分而為有司有司各有所守而不能相兼也

將欲取天下而為之者吾見其不得已天下神器不可為

也為者敗之執者失之司馬溫公曰為之則傷自然執之則乖通變凡物或行

或隨或虛音許或吹或強或羸或載或隳因其勢而道之者易簡而理自得也

違其性而為之者煩勞而物愈擾也是以聖人去甚去奢去泰物有固然不可強為事有

適當不可復過此老子之本意也

以道佐人主者不以兵強天下其事好還師之所處荆棘

生焉大軍之後必有凶年故善者果而已矣不敢以取強

焉果而勿矜果而勿伐果而勿驕果而不得已果而勿強

果決也用兵者但疾決而止不敢以取強於天下也詩曰不留不處孫武曰兵聞拙速未睹巧之久也果而勿矜以

下歷言善用兵者之意切矣物老則老是謂非道非道早已

夫佳兵者不祥之器物或惡之故有道者不處是以君子

居則貴左用兵則貴右

左為陽為生右為陰為死

兵者不祥之器非君

子之器不得已而用之恬淡為上故不美也若美必樂之樂之者是樂殺人也夫樂殺人者不可得志於天下矣故吉事尚左凶事尚右是以偏將軍處左上將軍處右言居上勢則以喪禮處之殺人衆多以悲哀泣之戰勝以喪禮處之

道常無名樸雖小天下不敢臣侯王若能守萬物將自賓天地相合以降甘露人莫之令而自均始制有名名亦既



有夫亦將知止知止所以不殆譬道之在天下由川谷之

於江海也

道之始本無名焉萬物既作而後有道之名制

作也是樸散而為器也此名既有則一生二二

生三何所窮已知道之士當於此而知止則不循名而逐

未矣川谷之水必歸之江海而後止萬物必歸之道而後止

知人者智自知者明勝人者有力自勝者強知足者富強

行者有志不失其所者久矣不離於真者不失其所死而不

亡者壽

龜山楊氏有言顏路之夭壽不齊何也老子曰死

知天者其孰能識之

大道汎兮其可左右萬物恃之以生而不辭功成不居衣

被萬物而不為主故常無欲可名於小矣萬物歸焉而不

知主可名於大矣是以聖人能成其大也以其不自大故

能成其大

執大象天下往往而不害安平泰

大象道也不害利也聖人守道無爲而天下自

往歸之天下既歸聖人復能利之而使之安寧均平舒泰也

樂與餌過客止道之出言

淡乎其無味視之不足見聽之不足聞用之不可既

既盡也今

有鼓樂飲食於此輒能使行者之留止爲其有聲容之美麗滋味之旨甘故也乃若道者則言之而無味視之而無見聽之而無聞曾不如樂餌之可悅然取而用之則能及天下後世而無盡

將欲翕之必固張之將欲弱之必固強之將欲廢之必固

興之將欲奪之必固與之是謂微明

微明其理雖明而實隱微也董思靖曰必

固云者言物之將歛必是本來已張然後歛者隨之此消息盈虛相因之理也

柔之勝剛弱之勝

強魚不可脫於淵國之利器不可以示人

示觀也魚能深潛則常活不可

躁動而脫於淵不爾則爲人所制而蓄害及之矣譬國能守柔則常安不可矜其威力以觀示於天下不爾則勢窮

力屈而國家不可保矣



道常無爲而無不爲侯王若能守萬物將自化化而欲作  
吾將鎮以無名之樸無名之樸亦將不欲不欲以靜天下  
將自正

### 德經下篇

上德不德是以有德下德不失德是以無德上德無爲而  
無以爲下德爲之而有以爲上仁爲之而無以爲上義爲  
之而有以爲上禮爲之而莫之應則攘臂而仍之故失道  
而後德失德而後仁失仁而後義失義而後禮夫禮者忠  
信之薄而亂之首也前識者道之華而愚之始也禮未必無忠信  
而乃忠信之薄也非以爲亂而乃亂之首也夫忠信之心  
苟壺其盛固自有不言而信者若夫卑體貌以示其敬善  
辭令以諭其誠禮文雖多而忠信之心寢以微矣故曰忠  
信之薄禮之務施報非太上貴德之意也施而不應則攘

臂而仍之鄉之揖讓適所以為爭鬭之階也故曰亂之首  
前識猶言前知前識未必非道而乃道之華也非以為愚  
而乃愚之始也夫道之至真務養其神明雖光耀天下而  
含章不發若夫用其聰明逆知治亂豫言禍福此可以驚  
世駭俗而反之身心無益也故曰道之華億度屢中是以  
遂將徂之役神於外乃迷惑之本也故曰愚之始

大夫處其厚不取其薄居其實不居其華故去彼取此

昔之得一者天得一以清地得一以寧神得一以靈谷得  
一以盈萬物得一以生王侯得一以為天下貞其致之一  
也天無以清將恐裂地無以寧將恐發神無以靈將恐歇  
谷無以盈將恐竭萬物無以生將恐滅侯王無以為貞而  
貴高將恐蹙音厥故貴以賤為本高以下為基是以侯王自  
稱孤寡不穀此其以賤為本邪非乎故致數上聲車無車不  
欲碌碌如玉落落如石致至也車者總名也隨件而數之則為輪為輶為輻為衡為軼遂無



車矣車遂為虛名矣如王如石則碌碌然落落然終不可  
易車則可有而可無玉石則一定而不可易可有可無則  
近於道虛而能化也一定不可易則不化  
矣莊子曰除日無歲亦數車無車之意

反者道之動弱者道之用天下之物生於有有生於無反

復也靜也靜者動之所由生能弱而後能強專於強則折  
矣動以靜為用強以弱為用故曰反者道之動弱者強之  
用老子之學大抵主於虛主於弱主於  
卑故以天地之間有無動靜推廣言之

上士聞道勤而行之中士聞道若存若亡下士聞道大笑

之不笑不足以為道嚴君平曰中士所聞非至美也下士  
所見非至善也中士所眩下士所笑

乃美善者也故建言有之明道若昧夷道若類音進道若退

建言古之立言也類絲節也知道至於明徹則黜其聰明  
反若愚昧行道至於進益則損之又損反若退卻造道至  
於平易則清而容物不欲上德若谷大白若辱廣德若不  
小察反若有窒礙而不均

足建德若偷質真若渝大方無隅建德者無為故若偷惰  
而不競真實者去飾故



若渝變而不新大方者不割故無廉隅之可譁大器晚成大音希聲大象無形道

隱無名夫惟道善貸且成貸者與也推以及人也有道者能與而不自有也成者道

之大成也成已成物而後謂之大成也後章又曰既以與人已愈多亦此意也

道生一一生二二生三三生萬物司馬溫公曰道生一自陽二生三陰陽交而生和三

生萬物和氣聚而生萬物萬物負陰而抱陽冲氣以為和董思靖曰凡動物背止於後陰靜也耳目口鼻居前陽

和動也故曰負陰抱陽植物則背寒嚮暖而冲氣運乎其間吳幼清曰萬物之生以此冲氣既生之後亦

必以此冲氣為用乃為不失其所以生之本人之所惡唯孤寡不穀而王公以為稱

蘇子由曰世之人不知萬物之所自生不賤寡小而貴眾

大然王公之尊而自稱孤寡不穀古之達者蓋已知之矣故物或損之而益益之而損

人之所教亦我義教之強梁者不得其死吾將以為教父

教父猶曰眾教之先強梁者不得其死當時之人雖嘗以

此為教然不知其義亦不以為最切也老子以為教父蓋



善之得善矣信者吾信之不信者吾亦信之得信矣聖人

之在天下慄慄

帖音

為天下渾

上其心

百姓皆注其耳目聖

人皆孩之

慄慄安靜也渾其心謂於善否信誕同以善信待之不分別也聖人之為此不唯躬自厚而已

亦將以至仁至誠之道而感化天下也然百姓見聖人之不分別也不測其故皆大異之故注其耳目觀聽聖人之

所為聖人則皆孩之知其無知若孩童耳

出生入死生之徒十有三死之徒十有三民之生動之死

地亦有十三夫何故以其生生之厚蓋聞善攝生者陸行

不遇兕虎入軍不被甲兵兕無所投其角虎無所措其爪

兵無所容其刃夫何故以其無死地焉

出生入死此四字一章之綱領也生

死之機有竅妙處出則為生入則為死出者超然而脫離之也入者迷而自汨沒也能入而出惟有道者則然天有

十二辰歲有十二月日有十二時十二者終始之全也十二而下又添一數便是十三分明只是一箇一字不謂之

一而曰十三此正其作文字之奇處言人之生死皆原於此  
此一者幾也即其幾而求之養之得其道則可以長生  
久視養之不得其道則與萬物同盡徒者言其類也生者  
我所以生也生生者我所以養其生也養其生而過於厚  
所以動即趨於死地此亦輕其身而後身存  
無而後能有虛而後能盈損而後能益之意

道生之德畜之物形之勢成之

管子曰虛無無形之謂道化育萬物之謂德

是

以萬物莫不尊道而貴德道之尊德之貴夫莫之命而常

自然故道生之畜之長之育之成之熟之養之覆之生而

不有爲而不恃長而不宰是謂玄德

極言道之曲成萬物之功有如此者然雖

生之而不自私雖爲之而不自恃雖君長之而任其自然未嘗宰制此其爲德非人之所能測矣

天下有始以爲天下母既得其母以知其子既知其子復

守其母沒身不殆塞其兌閉其門終身不勤開其兌濟其

事終身不救見小曰明守柔曰強用其光復歸其明無遺



身殃是謂襲常

母造化也子萬物也知有造化而後知有萬物知有萬物又當知有造化蓋言無能

生有有出於無兌口也人身則有口人家則有門皆以喻萬物所自出之地前言玄牝便是此意塞其兌閉其門藏有於無而不露也不勤不勞而成功也襲者藏也常者不易也襲常者言藏其用而不窮也

使我介然有知行於大道唯施是畏

老子自言使我少有知識行於大道惟以

夸張為畏也後世之俗大氏習於夸詐故老子自謙之甚以深警之

大道甚夷而民好徑

小路與大道相反

朝甚除田甚蕪倉甚虛

除潔好也盛修宮室以觀美然不務本而無

畜積故田甚蕪而倉甚虛

服文采帶利劍飲食資財有餘是謂盜誇非

道哉

言人不知大道而自矜聰明自誇聞見此好徑之徒也豈知至道故曰非道哉

善建者不拔善抱者不脫子孫以祭祀不輟

此二言者以喻樹德深而

守道固也子孫祭祀不輟言德盛而流澤遠也修之身其德乃真修之家其德乃

餘修之鄉其德乃長修之國其德乃豐修之天下其德乃

普故以身觀身以家觀家以鄉觀鄉以國觀國以天下觀天下吾何以知天下之然哉以此

含德之厚比於赤子毒蟲不螫音釋猛獸不據攫攫反鳥不

搏音博骨弱筋柔而握固未知牝牡之合而峻作精之至也

終日號而嗑不嗟和之至也峻赤子陰也號啼也嗑咽也

自固無欲而自作是知精有餘而非心也心動則氣傷氣傷則號而嗟故知心不動則氣和也知和曰常

知常曰明益生曰祥心使氣曰強祥妖孽也生本自然惟委之以無為可也益生

者以人而助天是為妖孽而禍其生矣氣本冲和惟守之以柔弱可也心使氣者以心而動氣是乃剛強而暴其氣

矣物壯則老是謂不道不道早已

知者不言言者不知塞其兌閉其門挫其銳解其紛和其

光同其塵是謂玄同玄同者大同於物深不可識也不可得而親不可得



而疏不可得而利不可得而害不可得而貴不可得而賤  
故爲天下貴

以正治國以奇用兵以無事取天下吾何以知其然哉以  
此夫天下多忌諱而民彌貧人多利器國家滋昏民多技  
巧奇物滋起法令滋彰盜賊多有故聖人云我無爲而民  
自化我好靜而民自正我無事而民自富我無欲而民自  
其政悶悶音其民醇醇其政察察其民缺缺醇醇愿慤也

禍兮福所倚福兮禍所伏孰知其極其無正邪正復爲奇

善復爲妖民之迷其日固已久矣復反也奇衰也后之爲政者大氏以道化爲迂濶

而甘心於刑名鏤薄之術矣民之迷其日固久豈不信哉是以聖人方而不割廉而不

歲直而不肆光而不耀

治人事天莫如嗇

嗇儉也節以制度不傷財不害民治人之嗇也如用特牲掃地而祭器用陶匏

席用橐秸事天之嗇也

夫惟嗇是以早復早復謂之重積德重積德

則無不克無不克則莫知其極可以有國

早復猶言先事凡儉嗇者未有

不足之患而豫為不足之計故曰早服早服則積累之日

久故重積德韓非曰衆人之用神也躁躁則多費多費之

謂侈聖人之用神也靜靜則少費少費之謂嗇衆人離於

患陷於禍猶未知退而不服從道理聖人雖未見患禍之

形虛無服從於

道理以稱早服

有國之母可以長久是謂深根固抵長生

久視之道

抵根也有國之母謂嗇也上一節言嗇之可以治國此一節言嗇之可以養生

治大國若烹小鮮

小鮮小魚也烹小鮮者不敢撓動恐其糜爛聖人之治大國當如是也

道蒞天下其鬼不神

聖人以道化天下民無不善鬼無明威故其鬼不神

神其神不傷人非其神不傷人聖人亦不傷人

聖人不傷人清靜不

擾是也

夫兩不相傷故德交歸焉

鬼神聖人兩不傷人則道德之美咸聚於當世如董



子所謂諸福之物可致之祥莫不畢至也

大國者下流天下之交天下之牝牝常以靜勝牡以靜為

下

下流為下並上聲以下或下並去聲○下流江海也交會合也言大國之道擬之於物如彼下流及天下之牝

也故大國以下小國則取小國小國以下大國則取大國

故或下以取或下而取大國不過以兼畜人小國不過欲

入事人夫兩者各得其所故大者宜為下

王輔嗣曰小國修下自全

而已不能令天下歸之大國修下則天下歸之故曰大者宜為下也

道者萬物之奧善人之寶不善人之所保美言可以市尊

行

去聲可以加人申言善人之事吳幼清曰嘉言可愛如美物之可鬻卓行可崇高出衆人之上

人之不善何棄之有故立天子置三公雖有拱璧以先駟

馬不如坐進此道

拱璧合拱之璧駟馬一乘之馬古者進物必有以先之駟馬陳於外而執拱璧

以將命故曰拱璧以先駟馬坐跪也獻人以拱璧駟馬此世之所謂至貴者然不如以此道與人言道之貴雖物之貴者弗如也古之所以貴此道者何也不曰求以得有罪以免

邪故為天下貴

惟此道以求所欲則必得以免有罪則必免豈非天下之至貴邪此古之人所以貴

夫此道也

為無為事無事味無味

為無為者一言已盡矣事無事味無味皆為無為之事也引而伸之

文辭之體耳夫心愈為則心愈亂國愈為則國愈擾德愈為則德愈不真道愈為則道愈不近為之之害蓋無往而不可惟易之以無為則夫數者之理各反於自然斯可以坐而得之矣昔嚴君平有言譬夫萬物之託君也猶神明之居身而井水之在庭也水不可以有為清也神不可以思慮寧也至哉言乎非知道者孰能識之大小多

少報怨以德

司馬溫公曰視小若大視少若多犯而不校

圖難於其易為大於

其細天下難事必作於易天下大事必作於細是以聖人終不為大故能成其大夫輕諾必寡信多易必多難是以



聖人猶難之故終無難

其安易持其未兆易謀其脆易破其微易散爲之於未有

治之於未亂

此言圖難於其易

合抱之木生於毫末九層之臺起

於累土千里之行始於足下

此言爲大於其細

爲者敗之執者失

之聖人無爲故無敗無執故無失民之從事常於幾

平聲成

而敗之慎終如始則無敗事是以聖人欲不欲不貴難得

之貨學不學復衆人之所過以輔萬物之自然而不敢爲

復反也聖人欲不欲者無欲以爲欲也難得之貨則棄之而不貴學不學者無學以爲學也衆人之所過則反之而不爲

古之善爲道者非以明民將以愚之民之難治以其智多

以智治國國之賊不以智治國國之福知此兩者亦楷式

能知楷式是謂玄德玄德深矣遠矣與物反矣乃至於大

順濂溪先生拙賦曰巧者言拙者默巧者勞拙者佚巧者賊拙者德巧者凶拙者吉嗚呼天下拙刑政徹上安下順風清弊絕周子之意與此章之指相近故朱子謂其言似莊老云

江海所以能為百谷王者以其善下之故能為百谷王是

以聖人欲上民必以言下之欲先民必以身後之吳幼清曰此聖人謙讓盛德非有心於上人先人而為之讀者不以辭害意可也是以聖人處上而民不

重處前而民不害是以天下樂推而不厭以其不爭故天下莫能與之爭

下莫能與之爭

天下皆謂我道大似不肖夫惟大故似不肖若肖久矣其

細也夫我有三寶寶而持之一曰慈二曰儉三曰不敢為

天下先慈故能勇儉故能廣不敢為天下先故能成器長

今舍慈且勇舍儉且廣舍後且先死矣長舍並上聲夫慈以戰



則勝以守則固天將救之以慈衛之

戰交物而動也猶莊子曰與接為構日以

心聞也守猶莊子曰純氣之守也人能以慈為主則外可勝物內可自守故曰以戰則勝以守則固救佑助也衛自

衛其身也能以慈衛天所佑也

善為士者不武善戰者不怒善勝戰者不與善用者為

之下

士吳氏以為古者車戰為士是也

是謂不爭之德是謂用人之力是

謂配天古之極

用兵有言吾不敢為主而為客不敢進寸而退尺

吳幼清曰為主

筆兵端以伐人為客不得已而應敵不敢進寸難進也退尺易退也

是謂行無行攘無臂仍

無敵執無兵

詩行上如字下音杭○無行無行列也仍就也詩曰仍執醜虜此老子贊美古語之辭謂用

兵者果能如是則雖用兵猶不用也

禍莫大於輕敵輕敵幾

平喪吾寶故抗

兵相加哀者勝矣

哀即慈也蘇子由曰聖人以慈為寶輕敵則好戰好戰則樂殺人所以幾喪吾

寶也故兩敵舉兵相加而吾出於不得已則有哀閔殺傷之心哀心見而天人助之雖欲不勝不可得

吾言甚易知甚易行天下莫能知莫能行言有宗事有君

夫惟無知是以不我知言有宗事有君謂道德也以此揆

以此著禍福成敗之應則道知我者希則我者貴是以聖

人被褐懷王王輔嗣曰知我

知不知上不知知病性之動也眩於物交之知而不察真

知上篇所謂滌除玄覽能無疵乎即此意也夫惟病病是以不病妄知者性之病

知在心斯為病矣夫惟病病是以不病也知妄知為病

而病之斯無聖人不病以其病病是以不病知不知者正

聖人無妄知之病由其以妄知

民不畏威大威至矣無狹其新君無厭其所生夫惟不厭



是以不厭是以聖人自知不自見自愛不自貴故去彼取

此

生本有定分衆人不知命故厭之惟聖人自知其生順受天命不自銜鬻而有慕外之念居本有餘裕衆人不

安土故狹之惟聖人自愛其居不擇地而安之不自尊大而有出位之思去彼取此謂去衆人之狹厭而取此止足

之道也

勇於敢則殺勇於不敢則活此兩者或利或害天之所惡

去聲孰知其故是以聖人猶難之天之道不爭而善勝不言

而善應不召而自来坦然善謀天網恢恢疎而不失

民不畏死柰何以死懼之若使民常畏死而爲奇奇邪者

吾得執而殺之孰敢常有司殺者殺夫代司殺者殺是謂

代大匠斲

音卓

夫代大匠斲者希有不傷手矣

上言殺人之無益此言殺

人之有禍吳幼清曰司殺者天也唯天爲能殺人唯大匠爲能斲木人欲代天殺人猶代匠斲木也代斲者手必多

傷以譬代殺者  
身必多害也

民之饑以其上食稅之多是以饑民之難治以其上之有  
為是以難治民之輕死以其求生之厚是以輕死夫唯無  
以生為者是賢於貴生生生之厚者後志多則勞生而害  
和平用物弘則營利而忘禍敗此  
其所以輕死也無以生為者所謂外  
其身而身存其賢於貴生者遠矣

人之生也柔弱其死也堅強萬物草木之生也柔脆其死

也枯槁故堅強者死之徒柔弱者生之徒是以兵強則不

勝木強則共拱強大處下柔弱處上共挂也荀子曰強自  
取挂兵強者則敗亡

常為弱小之所乘木強者則枝柱常為衆木之所壓嚴君  
平日天地之理小不載大輕不載重故強人不得為王強

木不得  
處上

天之道其猶張弓乎高者抑之下者舉之有餘者損之不



足者補之天之道損有餘而補不足人之道則不然損不足以奉有餘孰能有餘以奉天下唯有道者是以聖人爲而不恃功成而不處其不欲見賢聖人爲而不恃若無能者功成而不居若無功者正不欲自見其賢也此非聖人以私意而過爲謙天道當如是爾

天下柔弱莫過於水而攻堅強者莫之能勝其無以易之弱之勝強柔之勝剛天下莫不知莫能行故聖人云受國之垢是謂社稷主受國之不祥是謂天下王正言若反傳國君含垢天之道也如句踐入宦於吳而越卒以霸呂后不報嫚辱之書而匈奴和親即其效也正言若反者世俗之言但謂受辱者爲庸人今聖人之言乃如此聖人之正言非真若反也由世俗之情觀之則若反耳

和大怨必有餘怨安可以爲善

蘇子由曰怨生於妄而妄出於性知性者不見諸妄

而又何怨乎今不知除其本而欲和其末故外雖和而內未忘也

是以聖人執左契而不

責於人

契者兩書一札同而別之左契所以與右契所以取史記曰事成操右券以責蓋左契待合而與之

右契所以責取也責謂責取言聖人惟施與於人而不責取其報已有德於人而忘之則人有怨於已而忘之從可

知有德司契無德司徹  
徹謂徹法以公田與民而什一取

與人而不取於人無德司徹雖與人而必取於人也  
天道無親常與善人

小國寡民使有什伯人之器而不用使民重死而不遠徙

雖有舟輿無所乘之雖有甲兵無所陳之使民復結繩而

用之甘其食美其服安其居樂其俗鄰國相望雞犬之聲

相聞民至老死不相往來

相望相聞言其至近不相往來無求故也蘇子由曰老子生於

衰周文勝俗弊將以無為救之故於其書之終言其所志願得小國以試之而不可得爾

信言不美美言不信善者不辯辯者不善知者不博博者

不知

信言不美言之實者不假虛飾也善者不辯善其事者不事口辯也知者不博知其要者不務多識也



聖人不積既以爲人已愈有既以與人已愈多天之道利而不害聖人之道爲而不爭

抑此三者推其盡致非天與聖人莫能盡即其切近則人

皆可以與能也此固老子爲書之大指是以二篇之中蓋屢伸之至於卒章而復以是終焉烏序深哉

百家類纂老子卷終

列子題辭

列子鄭人名禦寇莊子多稱其人并取其說必有道者也與鄭繻公同時繻公殺其相子陽去春秋獲麟之歲庚申五十年矣蓋後於孔子而居孟子之先故其書多推尊吾聖人以自神其說其靜退似老聃其誕謾似莊周其愛身自利類楊朱故書中有楊朱力命二篇迂怪尤甚疑卽古楊朱書而後人勦附之者也劉向謂非一家之言信矣若其書事簡勁宏妙有絕到之語決非秦漢而下作者所可及今刊去荒唐之旨纂其粹者著于篇柳子厚曰好作文者其可廢邪讀焉者慎取之而已

列子題辭畢





百家類纂卷之十四

道家類

列子

天瑞

子列子居鄭圃四十年人無識者國君卿大夫眎之猶衆  
庶也國不足將嫁日旅嫁行於衛弟子曰先生往無反期弟子  
敢有所謁先生將何以教先生不聞壺丘子林之言乎子  
列子笑曰壺子何言哉雖然夫子嘗語伯昏瞀人吾側聞  
之試以告女其言曰有生不生有化不化不生者能生生  
不化者能化化生者不能不生化者不能不化故常生常  
化常生常化者無時不生無時不化陰陽爾四時爾不生  
者疑獨不化者往復往復其際不可終疑獨其道不可窮



黃帝書曰谷神不死是謂玄牝玄牝之門是謂天地之根  
綿綿若存用之不勤故生物者不生物者不化自生自  
化自形自色自智自力自消自息謂之生化形色智力消  
息者非也子列子曰昔者聖人因陰陽以統天地夫有形  
者生於無形則天地安從生故曰有太易有太初有太始  
有太素太易者未見氣也太初者氣之始也太始者形之  
始也太素者質之始也氣形質具而未相離故曰渾淪渾  
淪者言萬物相渾淪而未相離也視之不見聽之不聞循  
之不得故曰易也易無形埒易變而爲一一變而爲七七  
變而爲九九變者究也乃復變而爲一一者形變之始也  
清輕者上爲天濁重者下爲地冲和氣者爲人故天地含

精萬物化生子列子曰天地無全功聖人無全能萬物無全用故天職生覆地職形載聖職教化物職所宜然則天有所短地有所長聖有所否物有所通何則生覆者不能形載形載者不能教化教化者不能違所宜宜定者不出所位故天地之道非陰則陽聖人之教非仁則義萬物之宜非柔則剛此皆隨所宜而不能出所位者也故有生者有生生者有形者有形形者有聲者有聲聲者有色者有色色者有味者有味味者生之所生者死矣而生生者未嘗終形之所形者實矣而形形者未嘗有聲之所聲者聞矣而聲聲者未嘗發色之所色者彰矣而色色者未嘗顯味之所味者嘗矣而味味者未嘗呈皆無爲之職也能陰



能陽能柔能剛能短能長能圓能方能生能死能暑能涼  
能浮能沈能宮能商能出能沒能玄能黃能甘能苦能羶  
能香無知也無能也而無不知也而無不能也

生者理之必終者也終者不得不終亦如生者之不得不  
生而欲恒其生畫其終惑於數也精神者天之分骨骸者  
地之分屬天清而散屬地濁而聚精神離形名歸其真故  
謂之鬼鬼歸也歸其真宅黃帝曰精神入其門骨骸反其  
根我尚何存人自生至終大化有四嬰孩也少壯也老耄  
也死亡也其在嬰孩氣專志一和之至也物不傷焉德莫  
加焉其在少壯則血氣驕溢欲慮充起物所攻焉德故衰  
焉其在老耄則欲慮柔焉體將休焉物莫先焉雖未及嬰

孩之全方於少壯間矣其在死亡也則之於息焉反其極矣

孔子遊於太山見榮啓期行乎郕之野鹿裘帶索鼓琴而歌孔子問曰先生所以樂何也對曰吾樂甚多天生萬物唯人爲貴而吾得爲人是一樂也男女之別男尊女卑故以男爲貴吾旣得爲男矣是二樂也人生有不見日月不免襁褓者吾旣已行年九十矣是三樂也貧者士之常也死者人之終也處常得終當何憂哉孔子曰善乎能自寬者也

子貢倦於學告仲尼曰願有所息仲尼曰生無所息子貢曰然則賜息無所乎仲尼曰有焉耳望其曠<sub>音</sub>如也宰



如也墳如也鬲如也則知所息矣子貢曰大哉死乎君子  
息焉小人伏焉仲尼曰賜汝知之矣人胥知生之樂未知  
生之苦知老之憊未知老之佚知死之惡未知死之息也  
晏子曰善哉古之有死也仁者息焉不仁者伏焉死也者  
德之徼也古者謂死人爲歸人夫言死人爲歸人則生人  
爲行人矣行而不知歸失家者也一人失家一世非之天  
下失家莫知非焉有人去鄉土離六親廢家業遊於四方  
而不歸者何人哉世必謂之爲狂蕩之人矣又有人鍾賢  
世矜巧能脩名譽誇張於世而不知已者亦何人哉世必  
以爲智謀之士此二者胥失者也而世與一不與一唯聖  
人知所與知所去

杞國有人憂天地崩墜身亡所寄廢寢食者又有憂彼之  
所憂者因往曉之曰天積氣耳亡處亡氣若屈伸呼吸終  
日在天中行止柰何憂崩墜乎其人曰天果積氣日月星  
宿不當墜邪曉之者曰日月星宿亦積氣中之有光耀者  
只使墜亦不能有所中傷其人曰柰地壞何曉者曰地積  
塊耳充塞四虛亡處亡塊若踏步跣蹈終日在地上行止  
柰何憂其壞其人舍釋下然大喜曉之者亦舍然大喜長  
廬子聞而笑之曰虹蜺也雲霧也風雨也四時也此積氣  
之成乎天者也山岳也河海也金石也火木也此積形之  
成乎地者也知積氣也知積塊也奚謂不壞夫天地空中  
之一細物有中之最巨者難終難窮此固然矣難測難識



此固然矣憂其壞者誠爲大遠言其不壞者亦未爲是天地不得不壞則會歸於壞遇其壞時奚爲不憂哉子列子聞而笑曰言天地壞者亦謬言天地不壞者亦謬壞與不壞吾所不能知也雖然彼一也此一也故生不知死死不知生來不知去去不知來壞與不壞吾何容心哉

舜問乎烝曰道可得而有乎曰汝身非汝有也汝何得有夫道舜曰吾身非吾有孰有之哉曰是天地之委形也生非汝有是天地之委和也性命非汝有是天地之委順也孫子非汝有是天地之委蛻也故行不知所往處不知所持食不知所以天地強陽氣也又胡可得而有邪

齊之國氏大富宋之向氏大貧自宋之齊請其術國氏告

之曰吾善爲盜始吾爲盜也一年而給二年而足三年大  
穰自此以往施及州閭向氏大喜喻其爲盜之言而不喻  
其爲盜之道遂踰牆鑿室手目所及亡不探也未及時以  
賊獲罪没其先居之財向氏以國氏之謬已也往而怨之  
國氏曰若爲盜若何向氏言其狀國氏曰嘻若失爲盜之  
道至此乎今將告若矣吾聞天有時地有利吾盜天地之  
時利雲雨之傍潤山澤之產育以生吾禾殖吾稼築吾垣  
建吾舍陸盜禽獸水盜魚鼈亡非盜也夫禾稼土木禽獸  
魚鼈皆天之所生豈吾之所有然吾盜天而亡殃夫金玉  
珍寶穀帛財貨人之所聚豈天之所與若盜之而獲罪孰  
怨哉向氏大惑以爲國氏之重罔已也遇東郭先生問焉



東郭先生曰若一身庸非盜乎盜陰陽之和以成若生載若形况外物而非盜哉誠然天地萬物不相離也認而有之皆惑也國氏之盜公道也故亡殃若之盜私心也故得罪有公私者亦盜也亡公私者亦盜也公公私私天地之德知天地之德者孰爲盜邪孰爲不盜邪

### 黃帝

列姑射山在海河洲中山上有神人焉吸風飲露不食五穀心如淵泉形如處女不偎不愛仙聖爲之臣不畏不怒愿慤爲之使不施不惠而物自足不聚不歛而已無愆陰陽常調日月常明四時常若風雨常均字育常時年歲常豐而土無札傷人無夭惡物無疵厲鬼無靈響焉

列子師老商氏友伯高子進二子之道乘風而歸尹生聞之從列子居數月不省舍因間請斬其術者十反而十不告尹生懟而請辭列子又不命尹生追數月意不已又往從之列子曰汝何去來之頻尹生曰曩章戴有請於子子不我告固有憾於子今復脫然是以又來列子曰曩吾以汝爲達今汝之鄙至此乎姬音將告汝所學於夫子者矣自吾之事夫子友若人也三年之後心不敢念是非口不敢言利害始得夫子一眄而已五年之後心更念是非口庚言利害夫子始一解頰而笑七年之後從心之所念庚無是非從口之所言庚無利害夫子始一引吾並席而坐九年之後橫心之所念橫口之所言亦不知我之是非



百家類纂卷之四  
利害歟亦不知彼之是非利害歟亦不知夫子之爲我師  
若人之爲我友內外進矣而後眼如耳耳如鼻鼻如口無  
不同也心凝形釋骨肉都融不覺形之所倚足之所履隨  
風東西猶木葉幹音乾殼竟不知風乘我邪我乘風乎今女  
居先生之門曾未浹時而懟憾者再三女之片體將氣所  
不受汝之一節將地所不載履虛乘風其可幾乎尹生甚  
忤屏息良久不敢復言

列子問關尹曰至人潛行不空蹈火不熱行乎萬物之上  
而不慄請問何以至於此關尹曰是純氣之守也非智巧  
果敢之列例姬魚吾語女凡有貌像聲色者皆物也物與  
物何以相遠也夫奚足以至乎彼將處乎不深之度而藏

乎無端之紀游乎萬物之所終始壹其性養其氣含其德  
以通乎物之所造夫若是者其天守全其神無卻隙物奚  
自入焉夫醉者之墜於車也雖疾不死骨節與人同而犯  
害與人異其神全也乘亦弗知也墜亦弗知也死生驚懼  
不入乎其習是故還音物而不懼彼得全於酒而猶若是  
而况得全於天乎聖人藏於天故物莫之能傷也

周宣王之牧正有役人梁鴛者能養野禽獸委食於園庭  
之內雖虎狼鷃鷦之類無不柔馴者雄雌在前孳尾成羣  
異類雜居不相搏噬也王慮其術終於其身令毛丘園傳  
之梁鴛曰鴛賤役也何術以告爾懼王之謂隱於爾也且  
一言我養虎之法凡順之則喜逆之則怒此有血氣者之



性也然喜怒豈妄發哉皆逆之所犯也夫貪虎者不敢以生物與之爲其殺之之怒也不敢以全物與之爲其碎之之怒也時其饑飽達其怒心虎之與人異類而媚養已者順也故其殺之逆也然則吾豈敢逆之使怒哉亦不順之使喜也夫喜之復也必怒怒之復也常喜皆不中也今吾心無逆順者也則鳥獸之視吾猶其儕也故游吾園者不思高林曠澤寢吾庭者不願深山幽谷理使然也

顏回問乎仲尼曰吾嘗濟乎觴深之淵矣津人操舟若神吾問焉曰操舟可學邪曰可能游者可教也善游者數能乃若夫沒人則未嘗見舟而謾操之者也吾問焉而不告敢問何謂也仲尼曰譖譖吾與若玩其文也久矣而未達

其實而固且道與能遊者可教也輕水也善游者之數能也忘水也乃若夫沒人之未嘗見舟也而謾操之也彼視淵若陵視舟之覆猶其車卻也覆卻萬物方陳乎前而不得入其舍惡往而不暇以瓦樞口侯反者巧以鈎樞者憚以黃金樞者昏巧一也而有所矜則重外也凡重外者拙孔子觀於吕梁懸水三十仞流沫三十里鼃鼃魚鼈之所不能游也見一丈夫游之以爲有苦而欲死者也使弟子並流而承音拯之數百步而出被髮行歌而游於棠行孔子從而問之曰請問蹈水有道乎曰亡吾無道吾始乎故長乎性成乎命與齊俱入與汨偕出從水之道而不爲私焉此吾所以道之也孔子曰何謂始乎故長乎性成乎命也



曰吾生於陵而安於陵故也長於水而安於水性也不知  
吾所以然而然命也

仲尼適楚出於林中見痾僂者承蜩猶掇之也仲尼曰子

巧乎有道邪曰我有道也五六月繫罔音九二而不墜則失

者錙銖繫三而不墜則失者十一繫五而不墜猶掇之也

吾處也若檠株駒吾執臂若槁木之枝雖天地之大萬物

之多而唯蜩翼之知吾不反不側不以萬物易蜩之翼何

爲而不得孔子顧謂弟子曰用志不分乃凝於神其痾僂

丈人之謂乎

海上之人有好漚鳥者每旦之海上從漚鳥游漚鳥之至

者百住音數而不止其父曰吾聞漚鳥皆從汝游汝取來吾

玩之明日之海上漚鳥舞而不下也故曰至言去言至爲無爲齊智之所知則淺矣

楊朱南之沛老聃西遊於秦邀於郊至梁而遇老子老子

中道仰天而歎曰始以汝爲可教今不可教也楊朱不荅

至舍進涓音湫涓音瘦巾擲脫履戶外膝行而前曰請問其過

老子曰而睢睢而盱盱而誰與居大白若辱盛德若不足

楊朱蹙然變容曰敬聞命矣其往也舍者迎將家公執席

妻執巾櫛舍者避席煬者避竈其反也舍者與之爭席矣

楊朱過宋東之於逆旅逆旅人有妾二人其一人美其一

人惡惡者貴而美者賤楊子問其故逆旅小子對曰其美

者自美吾不知其美也其惡者自惡吾不知其惡也楊子



曰弟子記之行賢而去自賢之行安往而不愛哉

天不有常勝之道有不常勝之道常勝之道曰柔常不勝之道曰彊二者亦知而人未之知故上古之言彊先不已若者柔先出於已者先不已若者至於若已則殆矣先出於已者亡所殆矣以此勝一身若徒以此任天下若徒謂不勝而自勝不任而自任也弼子曰欲剛必以柔守之欲彊必以弱保之積於柔必剛積於弱必彊觀其所積以知禍福之鄉彊勝不若已至於若已者剛柔勝出於已者其力不可量老聃曰兵彊則滅木彊則折柔弱者生之徒堅彊者死之徒

狀不必童

同

而智童智不必童而狀童聖人取童智而遺

童狀衆人近童狀而疏童智狀與我童者近而愛之狀與  
我異者疏而畏之有七尺之骸手足之異戴髮含齒倚而  
趣者謂之人而人未必無獸心雖有獸心以狀而見親矣  
傳翼戴角分牙布爪仰飛伏走謂之禽獸而禽獸未必無  
人心雖有人心以狀而見疏矣庖犧氏女媧氏神農氏夏  
后氏蛇身人面牛首虎鼻此有非人之狀而有大聖之德  
夏桀殷紂魯桓楚穆狀貌七竅皆同於人而有禽獸之心  
而衆人守一狀以求至智未可幾也黃帝與炎帝戰於阪  
泉之野帥熊羆狼豹貙虎爲前驅鴈鵠鷹鳶爲旗幟此以  
力使禽獸者也堯使夔典樂擊石拊石百獸率舞簫韶九  
成鳳皇來儀此以聲致禽獸者也然則禽獸之心奚爲異



人形音與人異而不知接之之道焉聖人無所不知無所不通故得引而使之焉禽獸之智有自然與人童者其齊欲攝生亦不假智於人也牝牡相偶母子相親避平依險違寒就溫居則有羣行則有列小者居內壯者居外飲則相攜食則鳴羣太古之時則與人同處與人並行帝王之時始驚駭散亂矣逮於末世隱伏逃竄以避患害今東方介氏之國其國人數數解六畜之語者蓋偏知之所得太古神聖之人備知萬物情態悉解異類音聲會而聚之訓而受之同於人民故先會鬼神魑魅次達八方人民未聚禽獸蟲蛾言血氣之類心智不殊遠也神聖知其如此故其所教訓者無所遺逸焉

宋有狙公者愛狙養之成羣能解狙之意狙亦得公之心  
損其家口充狙之欲俄而匱焉將限其食恐衆狙之不馴  
於已也先誑之曰與若芋音朝三而暮四足乎衆狙皆起  
而怒俄而曰與若芋朝四而暮三足乎衆狙皆伏而喜物  
之以能鄙相籠皆猶此也聖人以智籠羣愚亦猶狙公之  
以智籠衆狙也名實不虧使其喜怒哉

紀渚子爲周瑄養鬪鷄十日而問鷄可鬪已乎曰未也方  
虛驕而恃氣十日又問曰未也猶應影嚮十日又問曰未  
也猶疾視而盛氣十日又問曰幾矣鷄雖有鳴者已無變  
矣望之似木鷄矣其德全矣異鷄無敢應者反走耳

周穆王



周穆王時西極之國有化人來入水火貫金石反山川移  
城邑乘虛不墜觸實不硌音硌千變萬化不可窮極既已變  
物之形又且易人之慮穆王敬之若神事之若君推路寢  
以居之引三牲以進之選女樂以娛之化人以爲王之宮  
室卑陋而不可處王之廚饌腥蝼而不可饗王之嬪御臞  
惡而不可親穆王乃爲之改築土木之功赅聖之色無遺  
巧焉五府爲虛而臺始成其高千仞臨終南之上號曰中  
天之臺簡鄭衛之處子娥媼靡曼者施芳澤正蛾眉設笄  
珥衣阿細錫細布曳齊紈粉白黛黑珮玉環雜芷若以滿之  
奏承雲六瑩九韶晨露以樂之月月獻王衣旦旦薦王食  
化人猶不舍然不得已而臨之居亡幾何謁王同游王執

化人之祛音墟騰而上者中天乃止暨及化人之宮化人移

之王若碩虛焉既寤所坐猶嚮者之處侍御猶嚮者之人

視其前則酒未清肴未睇王問所從來左右曰王默存耳

由此穆王自失者三月而復更問化人化人曰吾與王神

游也形奚動哉王大悅不恤國事不樂臣妾肆意遠游命

駕八駿之乘右服華騶而左騶耳右騄赤驥而左白縶

義主車則造父為御音離音陶音為右次車之乘右服渠黃

而左踰輪左騄盜驪而右山子柏天主車參百為御奔戎

為右馳驅千里至于巨蒐氏之國巨蒐氏乃獻白鵠之血

以飲王具牛馬之漣以洗王之足及二乘之人已飲而行

遂宿于崑崙之阿赤水之陽別日升崑崙之丘以觀黃帝



之宮而封之以詒後世遂賓于西王母觴于瑤池之上西  
王母爲王謠王和之其辭哀焉乃觀日之所入一日行萬  
里王乃歎曰於乎予一人不盈于德而諧於樂後世其追  
數吾過乎穆王幾諳神人哉能窮當身之樂猶百年乃徂  
世以爲登假遐焉

老成子學幻於尹文先生尹文先生揖而進之於室屏左  
右而與之言曰昔老聃之徂西也顧而告予曰有生之氣  
有形之狀盡幻也造化之所始陰陽之所變者謂之生謂  
之死窮數達變因形移易者謂之化謂之幻造物者其巧  
妙其功深固難窮難終因形者其巧顯其功淺故隨起隨  
滅知幻化之不異生死也始可與學幻矣吾與汝亦幻也

奚湏學哉老成子歸用尹文先生之言深思三月遂能存  
亡自在備校四時冬起雷夏造冰飛者走走者飛終身不  
著其術故世莫傳焉子列子曰善爲化者其道密庸其功  
同人五帝之德三王之功未必盡智勇之力或由化而成  
孰測之哉

覺有八徵夢有六候奚謂八徵一曰故二曰爲三曰得四  
曰喪五曰哀六曰樂七曰生八曰死此者八徵形所接也  
奚謂六候一曰正夢二曰噩夢三曰思夢四曰寤夢五曰  
喜夢六曰懼夢此六者神所交也不識感變之所起者事  
至則惑其所由然識感變之所起者事至則知其所由然  
知其所由然則無所怛一體之盈虛消息皆通於天地應



於物類故陰氣壯則夢涉大水而恐懼陽氣壯則夢涉大火而燔炳陰陽俱壯則夢生殺甚飽則夢與甚饑則夢取是以以浮虛爲疾者則夢揚以沈實爲疾者則夢溺藉帶而寢則夢蛇飛鳥噉髮則夢飛將陰夢火將疾夢食飲酒者憂歌僂者哭子列子曰神遇爲夢形接爲事故晝想夜夢神形所遇故神凝者想夢自消信覺不語信夢不達物化之往來者也古之真人其覺自忘其寢不夢幾音虛語哉周之尹氏大治產其下趣役者侵晨昏而弗息有老役夫筋力竭矣而使之彌勤晝則呻呼而即事夜則昏憊而熟寐精神荒散昔昔夜夜也夢爲國君居人民之上總一國之事遊燕宮觀恣意所欲其樂無比覺則復役人有慰喻其

懃者役夫曰人生百年晝夜各分吾晝爲僕虜苦則苦矣  
夜爲人君其樂無比何所怨哉尹氏心營世事慮鍾家業  
心形俱疲夜亦昏憊而寐昔昔夢爲人僕趨走作役無不  
爲也數罵杖撻無不至也眠中吟嚙呻呼徹旦息焉尹氏  
病之以訪其友友曰若位足營身資財有餘勝人遠矣夜  
夢爲僕苦逸之復數之常也若欲覺夢兼之豈可得邪尹  
氏聞其友言寬其役夫之程減已思慮之事疾並少間  
鄭人有薪於野者遇駭鹿御而擊之斃之恐人見之也遽  
而藏諸隍中覆之以蕉不勝其喜俄而遺其所藏之處遂  
以爲夢焉順塗而詠其事傍人有聞者用其言而取之既  
歸告其室人曰向薪者夢得鹿而不知其處吾今得之彼



直直夢者矣室人曰若將是夢見薪者之得鹿邪詎有薪  
者和今真得鹿是若之夢真邪夫曰吾據得鹿何用知彼  
夢我夢邪薪者之歸不獸音慙失鹿其夜真夢藏之之處又  
夢得之之主爽旦案所夢而尋得之遂訟而爭之歸之士  
師士師曰若初真得鹿妄謂之夢真夢得鹿妄謂之實彼  
真取若鹿而與若爭鹿室人又謂夢認人鹿無人得鹿今  
據有此鹿請二分之一以聞鄭君鄭君曰嘻士師將復夢分  
人鹿乎

宋陽里華子中年病忘朝取而夕忘夕與而朝忘在塗則  
忘行在室則忘坐今不識先後不識今闔室毒之謁史而  
卜之弗占謁巫而禱之弗禁謁醫而攻之弗已魯有儒生

自媒能治之華子之妻子以居產之半請其方儒生曰此  
固非卦兆之所占非祈請之所禱非藥石之所攻吾試化  
其心變其慮庶幾其瘳乎於是試露之而求衣饑之而求  
食幽之而求明獨與居室七日從之莫知其所施爲也而  
積年之疾一朝都除華子既悟乃大怒黜妻罰子操戈逐  
儒生宋人執而問其以華子曰曩吾忘也蕩蕩然不覺天  
地之有無今頓識既往數十年來存亡得失哀樂好惡擾  
擾萬緒起矣吾恐將來之存亡得失哀樂好惡之亂吾心  
如此也湏臾之忘可復得乎

秦人逢

音麗

氏有子少而惠及壯而有迷罔之疾聞歌以爲

哭視白以爲黑饗香以爲朽嘗甘以爲苦行非以爲是意



之所之天地四方水火寒暑無不倒錯者焉其父之魯過  
陳遇老聃因告其子之證老聃曰汝庸知汝子之迷乎今  
天下之人皆惑於是非昏於利害同疾者多固莫有覺者  
且一身之迷不足傾一家一家之迷不足傾一鄉一鄉之  
迷不足傾一國一國之迷不足傾天下天下盡迷孰傾之  
哉向使天下之人其心盡如汝子汝則反迷矣哀樂聲色  
臭味是非孰能正之且吾之言未必非迷而况魯之君子  
迷之郵者焉能解人之迷哉榮棄也汝之糧不若遄歸也  
燕人生於燕長於楚及老而還本國過晉國同行者誑之  
指城曰此燕國之城其人愀然變容拮社曰此若里之社  
乃喟然而嘆指舍曰此若先人之廬乃涓涓然而泣指壠

曰此若先人之冢其人哭不自禁同行者啞然大笑曰予昔紿若此晉國耳其人大慙及至燕真見燕國之城社真見先人之廬冢悲心更微

仲尼

子夏問孔子曰顏回之爲人奚若子曰回之仁賢於丘也曰子貢之爲人奚若子曰賜之辯賢於丘也曰子路之爲人奚若子曰由之勇賢於丘也曰子張之爲人奚若子曰師之莊賢於丘也子夏避席而問曰然則四子者何爲事夫子曰居吾語汝夫回能仁而不能反賜能辯而不能訥由能勇而不能怯師能莊而不能同兼四子之有以易吾吾弗許也此其所以事吾而不貳也



初子列子好游壺丘子曰游何所好列子曰游之樂所玩  
無故人之游也觀其所見我之游也觀其所變游乎游乎  
未有能辨其游者壺丘子曰務外游不知務內觀外游者  
求備於物內觀者取足於身取足於身游之至也求備於  
物游之不至也於是列子終身不出自以爲不知游壺丘  
子曰游其至乎至游者不知所適至觀者不知所眡物物  
皆游矣物物皆觀矣是我之所謂游是我之所謂觀也故  
曰游其至矣乎游其至矣乎

季梁之死楊朱望其門而歌隨梧之死楊朱撫其尸而哭  
隸人之生隸人之死衆人且歌衆人且哭目將眇者先睹  
秋毫耳將聾者先聞蚋飛口將爽者先辨淄澠鼻將窒者

先覺隳朽體將僵者先亟奔佚心將迷者先識是非故物至者則不反

公儀伯以力聞諸侯堂谿公言之於周宣王王備禮以聘之公儀伯至觀形懦夫也宣王心惑而疑曰女之力何如公儀伯曰臣之力能折春螽之股堪秋蟬之翼王作色曰吾之力者能裂犀兕之革曳九牛之尾猶憾其弱女折春螽之股堪秋蟬之翼而力聞天下何也公儀伯長息退席曰善哉王之問也臣敢以實對臣之師有商丘子者力無敵於天下而六親不知以未嘗用其力故也臣以死事之乃告臣曰人欲見其所不見視人所不窺欲得其所不得修人所不爲故學眎者先見與薪學聽者先聞撞鐘夫有



易於內者無難於外於外無難故名不出其一家今臣之名聞於諸侯是臣違師之教顯臣之能者也然則臣之名不以負其力者也以能用其力者也不猶愈於負其力者乎列子論堯治天下五十年不知天下治歟不治歟不知億兆之願戴已歟不願戴已歟顧問左右左右不知問外朝外朝不知問在野在野不知堯乃微服游於康衢聞兒童謠曰立我烝民莫匪爾極不識不知順帝之則堯喜聞曰誰教爾爲此言童兒曰我聞之大夫問大夫大夫曰古詩也堯還宮召舜因禪以天下舜不辭而受之

關尹喜曰在已無居形物其著其動若水其靜若鏡其應若響故其道若物者也物自違道道不違物善若道者亦

不用耳亦不用目亦不用力亦不用心欲若道而用視聽  
形智以求之弗當矣瞻之在前忽焉在後用之彌滿六虛  
廢之莫知其所亦非有心者所能得遠亦非無心者所能  
得近唯默而得之而性成之者得之知而忘情能而不爲  
真知真能也發無知何能情發不能何能爲聚塊也積塵  
也雖無爲而非理也

湯問

天地亦物也物有不足故昔者女媧氏煉五色石以補其  
闕斷鼇之足以立四極其後共工氏與顓頊爭爲帝怒而  
觸不周之山折天柱絕地維故天傾西北日月星辰就焉  
地不滿東南故百川水潦歸焉



荆之南有冥靈者以五百歲爲春五百歲爲秋上古有大  
椿者以八千歲爲春八千歲爲秋朽壤之上有菌芝者生  
於朝死於晦春夏之月有蠓蚋者因雨而生見陽而死  
終髮北之北有溟海者天池也有魚焉其廣數千里其長  
稱焉其名爲鯢有鳥焉其名爲鵬翼若垂天之雲其體稱  
焉世豈知有此物哉大禹行而見之伯益知而名銘之夷  
堅聞而志之

吳楚之國有大木焉其名爲櫟柚碧樹而冬生實丹而味  
酸食其皮汁已憤厥之疾齊州珍之渡淮而北而化爲枳  
焉鸛鵒不踰濟貉踰汶則死矣地氣然也雖然形氣異也  
性鈞已無相易已生皆全已分皆足已吾何以識其巨細

何以識其脩短何以識其同異哉

夸父不量力欲追日影逐之於隅谷之際渴欲得飲赴飲河渭河渭不足將走北飲大澤未至道渴而死棄其杖尸膏肉所浸生鄧林鄧林彌廣數千里焉

大禹曰六合之間四海之內照之以日月經之以星辰紀之以四時要之以太歲神靈所生其物其形或夭或壽唯聖人能通其道夏革曰然則亦有不待神靈而生不待陰陽而形不待日月而明不待殺戮而夭不待將迎而壽不待五穀而食不待繒纊而衣不待舟車而行其道自然非聖人之所通也

南國之人祝髮而裸北國之人鞞巾而裘中國之人冠冕



而棠九土所資或農或商或田或漁如冬裘夏葛水舟陸車默而得之性而成之

詹何以獨繭絲爲綸芒鉞爲鈎荆篠爲竿剖粒爲餌引盈車之魚於百仞之淵汨流之中綸不絕鈎不伸竿不撓楚王聞而異之召問其故詹何曰臣聞先大夫之言蒲且子之弋也弱弓纖繳乘風振之連雙鵠於青雲之際用心專動手均也臣因其事放而學鈎五年始盡其道當臣之臨河持竿心無雜慮唯魚之念投綸沈竿手無輕重物莫能亂魚見臣之鈎餌猶沈埃聚沫吞之不疑所以能以弱制彊以輕致重也大王治國誠能若此則天下可運於一握將亦奚事哉楚王曰善

瓠巴鼓琴而鳥舞魚躍鄭師文聞之葉家從師襄遊柱指  
鈞絃三年不成章師襄曰子可以歸矣師文舍其琴歎曰  
文非絃之不能鈞非章之不能成文所存者不在絃所志  
者不在聲內不得於心外不應於器故不敢發手而動絃  
且小假之以觀其後無幾何復見師襄師襄曰子之琴何  
如師文曰得之矣請嘗試之於是當春而叩商絃以召南  
呂涼風忽至草木成實及秋而叩角絃以激夾鐘溫風徐  
迴草木發榮當夏而叩羽音以召黃鐘霜雪交下川池暴  
洏及冬而叩徵絃以激蕤賓陽光熾烈堅冰立散將終命  
宮而總四絃則景風翔慶雲浮甘露降澧泉涌師襄乃撫  
心高蹈曰微矣子之彈也雖師曠之清角鄒衍之吹律亡



以加之彼將挾琴執管而從子之後耳

薛譚學謳於秦青未窮青之技自謂盡之遂辭歸秦青弗  
止餞於郊衢撫節悲歌聲振林木響遏行雲薛譚乃謝求  
反終身不敢言歸秦青顧謂其友曰昔韓娥東之齊匱糧  
過雍門鬻歌假食既去而餘音繞梁欂<sub>音麗</sub>三日不絕左右  
以其人弗去過逆旅逆旅人辱之韓娥因曼聲哀哭一里  
老幼悲愁垂涕相對三日不食遽而追之娥還復爲曼聲  
長歌一里老幼喜躍抃舞弗能自禁忘向之悲也乃厚賂  
發之故雍門之人至今善歌哭效娥之遺聲

伯牙善鼓琴鍾子期善聽伯牙鼓琴志在登高山鍾子期  
曰善哉哉我兮若泰山志在流水鍾子期曰善哉洋洋兮

若江河伯牙所念鍾子期必得之伯牙游於泰山之陰卒逢暴雨止於巖下心悲乃援琴而鼓之初爲霖雨之操更造崩山之音曲每奏鍾子期輒窮其趣伯牙乃舍琴而歎曰善哉善哉子之聽夫志想像猶吾心也吾於何逃聲哉

甘蠅古之善射者教弓而獸伏鳥下弟子名飛衛學射於甘蠅而巧過其師紀昌者又學射於飛衛飛衛曰爾先學不瞬而後可言射矣紀昌歸偃臥其妻之機下以目承牽挺二年之後雖錐末倒背而不瞬也以告飛衛飛衛曰未也必學視而後可視小如大視微如著而後告我昌以鼃音懸蠹於牖南面而望之旬日之間浸大也三年之後如車輪焉以覩餘物皆丘山也乃以燕角之弧朔蓬之簫射



之貫蟲之心而懸不絕以告飛衛飛衛高蹈拊膺曰汝得之矣

造父之師曰泰豆氏造父之始從習御也執禮甚卑泰豆三年不告造父執禮愈謹乃告之曰古詩言良弓之子必先爲箕良冶之子必先爲裘汝先觀吾趣趣如吾然後六轡可持六馬可御造父曰唯命所從泰豆乃立木爲塗僅可容足計步而置履之而行趣走往還無跌失也造父學之三日盡其巧泰豆歎曰子何其敏也得之捷乎凡所御者亦如此也曩汝之行得之於足應之於心推於御也齊輯乎轡銜之際而急緩乎脣吻之和正度乎胃臆之中而執節乎掌握之間內得於中心而外合於馬志是故能進

追履繩而旋曲中規矩取道致遠而氣力有餘誠得其術也  
得之於銜應之於轡得之於轡應之於手得之於手應之於心  
則不以目視不以策驅心閑體正六轡不亂而二十四蹄所投  
無差迴旋進退莫不中節然後輿輪之外可使無餘轍馬蹄之  
外可使無餘地未嘗覺山谷之嶮原隰之夷視之一也吾術窮矣  
其識之

周穆王大征西戎西戎獻昆吾之劍火浣之布其劍長尺有咫  
練鋼赤刃用之切玉如泥焉火浣之布浣之必投於火布則火  
色垢則布色出火而振之皓然凝乎雪皇子以爲無此物傳之者  
妄蕭叔曰皇子果於自信果於誣理哉

力命



力謂命曰若之功奚若我哉命曰汝奚功於物而欲比朕  
力曰壽夭窮達貴賤貧富我之力所能也命曰彭祖之智  
不出堯舜之上而壽八百顏淵之才不出衆人之下而壽  
十八仲尼之德不出諸侯之下而困於陳蔡殷紂之行不  
出三仁之上而居君位季札無爵於吳田恒專有齊國夷  
齊餓於首陽季氏富於展禽若是女力之所能奈何壽彼  
而夭此窮聖而達逆賤賢而貴愚貧善而富惡邪力曰若  
如若言我固無功於物而物若此邪此則若之所制邪命  
曰旣謂之命奈何有制之者邪朕直而推之曲而任之自  
壽自夭自窮自達自貴自賤自富自貧朕豈能識之哉朕  
豈能識之哉

北宮子謂西門子曰朕與子並世也而人子達並族也而人子敬並貌也而人子愛並言也而人子庸並行也而人子誠並仕也而人子貴並農也而人子富並商也而人子利朕衣則裋音豎褐食則粢糲居則蓬室出則徒行子衣則文錦食則梁肉居則連櫪出則結駟在家熙然有棄朕之心在朝諤然有敖朕之色請謁不相及遨遊不同行固有年矣子自以德過朕邪西門子曰予無以知其實汝造事而窮予造事而達此厚薄之驗歟而皆謂與予並汝之顏厚矣北宮子無以應自失而歸中途遇東郭先生先生曰汝奚往而反偶偶而步有深愧之色邪北宮子言其狀東郭先生曰吾將舍汝之愧與汝更之西門氏而問之曰汝



奚辱北宮子之深乎固且言之西門子曰北宮子言世族  
年貌言行與予並而賤貴貧富與予異予語之曰予無以  
知其實汝造事而窮予造事而達此將厚薄之驗歟而皆  
謂與予並汝之顏厚矣東郭先生曰汝之言厚薄不過言  
才德之差吾之言厚薄異於是矣夫北宮子厚於德薄於  
命汝厚於命薄於德汝之達非智得也北宮子之窮非愚  
失也皆天也非人也而汝以命厚自矜北宮子以德厚自  
愧皆不識夫固然之理矣西門子曰先生止矣予不敢復  
言北宮子既歸衣其短褐有狐貉之溫進其菰菽有稻粱  
之味庇其蓬室若廣厦之蔭乘其輶輅若文軒之飾終身  
適然不知榮辱之在彼也在我也東郭先生聞之曰北宮

子之寐久矣一言而能寤易怛也哉

管夷吾鮑叔牙二人相友甚戚同處於齊管夷吾事公子糾鮑叔牙事公子小白小白既立脅魯殺子糾召忽死之管夷吾被囚鮑叔牙謂桓公曰管夷吾能可以治國桓公曰我讐也願殺之鮑叔牙曰吾聞賢君無私怨且人能爲其主亦必能爲人君如欲霸王非夷吾其弗可君必舍釋之遂召管仲魯歸之齊鮑叔牙郊迎釋其囚桓公禮之而位於高國之上鮑叔牙以身下之任以國政號曰仲父桓公遂霸管仲嘗歎曰吾少窮困時嘗與鮑叔賈分財多自與鮑叔不以我爲貪知我貧也吾嘗爲鮑叔謀事而大窮困鮑叔不以我爲愚知時有利不利也吾嘗三仕三見逐



於君鮑叔不以我爲不肖知我不遭時也吾嘗三戰三北  
鮑叔不以我爲怯知我有老母也公子糾敗召忽死之吾  
幽囚受辱鮑叔不以我爲無耻知我不羞小節而耻名不  
顯於天下也生我者父母知我者鮑叔也此世稱管鮑善  
交者小白善用能者然實無善交實無用能也實無善交  
實無用能者非更有善交更有善用能也召忽非能死不  
得不死鮑叔非能舉賢不得不舉小白非能用讐不得不  
用

鄧析操兩可之說設無窮之辭當子產執政作竹刑鄭國  
用之數難子產之治子產屈之子產執而戮之俄而誅之  
然則子產非能用竹刑不得不用鄧析非能屈子產不得

不屈子產非能誅鄧析不得不誅也可以生而生天福也  
可以死而死天福也可以生而不生天罰也可以死而不  
死天罰也可以生可以死得生得死有矣不可以生不可  
以死或死或生有矣然而生生死死非物非我皆命也智  
之所無奈何故曰窈然無際天道自會漠然無分天道自  
運天地不能犯聖智不能干鬼魅不能欺自然者默之成  
之平之寧之將之迎之

生非貴之所能存身非愛之所能厚生亦非賤之所能夭  
身亦非輕之所能薄故貴之或不生賤之或不死愛之或  
不厚輕之或不薄此似反也非反也此自生自死自厚自  
薄或貴之而生或賤之而死或愛之而厚或輕之而薄此



似順也非順也此亦自生自死自厚自薄夫信命者亡壽  
夭信理者亡是非信心者亡逆順信性者亡安危則謂之  
都亡所信都亡所不信真矣慤矣奚去奚就奚哀奚樂奚  
爲奚不爲黃帝之書云至人居若死動若械亦不知所以  
居亦不知所以不居亦不知所以動亦不知所以不動亦  
不以衆人之觀易其情貌亦不謂衆人之不觀不易其情  
貌獨往獨來獨出獨入孰能礙之

死生自命也貧窮自時也怨夭折者不知命者也怨貧窮  
者不知時者也當死不懼在窮不戚知命安時也其使多  
智之人量利害料虛實度人情得亦中亡亦中也半其少智  
之人不量利害不料虛實不度人情得亦中亡亦中量與

不量料與不料度與不度奚以異唯亡所量亡所不量則全而亡喪亦非知全亦非知喪自全也自亡也自喪也魏人有東門吳者其子死而不憂其相室曰公之愛子天下無有今子死不憂何也東門吳曰吾常無子無子之時不憂今子死乃與嚮無子同巨奚憂焉農赴時商趣利工追術仕逐勢勢使然也然農有水旱商有得失工有成敗仕有遇否命使然也

楊朱

凡爲名者必廉廉斯貧爲名者必讓讓斯賤管仲之相齊也君淫亦淫君奢亦奢志合言從道行國霸死之後管氏而已田氏之相齊也君盈則已降君歛則已施民皆歸之



因有齊國子孫享之至今不絕若實名貧僞名富曰實無  
名名無實名者僞而已矣昔者堯舜僞以天下讓許由善  
卷而不失天下享祚百年伯夷叔齊實以孤竹君讓而終  
亡其國餓死於首陽之山實僞之辯如此其省也

楊朱曰百年壽之大齊得百年者千無一焉設有一者孩  
抱以逮昏老幾居其半矣夜眠之所弭晝覺之所遺又幾  
居其半矣痛疾哀苦亡失憂懼又幾居其半矣量十數年  
之中適然而自得亡介焉之慮者亦亡二時之中爾則人  
之生也奚爲哉奚樂哉爲美厚爾爲聲色爾而美厚復不  
可常厭足聲色不可常翫聞乃復爲刑賞之所禁勸名法  
之所進退遑遑爾競一時之虛譽規死後之餘榮偶偶爾

慎耳目之觀聽惜身意之是非徒失當年之至樂不能自肆於一時重囚纍梏何以異異哉太古之人知生之暫來知死之暫往故從心而動不違自然所好當身之娛非所去也故不爲名所勸從性而遊不逆萬物所好死後之名非所取也故不爲形所及名譽先後年命多少非所量也

楊朱曰伯夷非亡欲矜清之郵以放餓死展季非亡情矜貞之郵以放寡宗清貞之誤善之若此

楊朱曰原憲窶於魯子貢殖於衛原憲之窶損生子貢之殖累身然則窶亦不可殖亦不可其可焉在曰可在樂生可在逸身故善樂生者不窶善逸身者不殖

楊朱曰古語有之生相憐死相捐此語至矣相憐之道非



唯情也勤能使逸饑能使飽寒能使溫窮能使達也相捐之道非不相哀也不含珠玉不服文錦不陳犧牲不設明器也

楊朱見梁王言治天下如運諸掌梁王曰先生有一妻一妾而不能治三畝之園而不能芸而言治天下如運諸掌何也對曰君見其牧羊者乎百羊而群使五尺童子荷箠而隨之欲東而東欲西而西使堯牽一羊舜荷箠而隨之則不能前矣且臣聞之吞舟之魚不游枝流鴻鵠高飛不集污池何則其極遠也黃鐘大呂不可從煩奏之舞何則其音疏也將治大者不治細成大功者不成小此之謂

楊朱曰生民之不得休息爲四事故一爲壽二爲名三爲

位四爲貨有此四者畏鬼畏人畏威畏刑此謂之遁人也  
可殺可活制命在外不逆命何羨壽不矜貴何羨名不要  
勢何羨位不貪富何羨貨此之謂順民也天下無對制命  
在內故語有之曰人不婚宦情欲失半人不衣食君臣道  
息周諺曰田父可坐殺晨出夜入自以性之恒啜菽茹藿  
自以味之極肌肉麤厚筋節崦急一朝處以柔毛綈幕薦  
以梁肉蘭橘心痛體煩內熱生病矣商魯之君與田父伴  
地則亦不盈一時而憊矣故野人之所安野人之所美謂  
天下無過者昔者宋國有田夫常衣縵黻僅以過冬暨春  
東作自曝於日不知天下之有廣廈隩室綿纊狐貉顧謂  
其妻曰負日之暄人莫知者以獻吾君將有重賞里之富



室告之曰昔人有美戎菽甘泉莖芹萍子者對鄉豪稱之鄉豪取而嘗之蜚於口慘於腹衆哂而怨之其人大慙于此類也

楊朱曰豐屋美服厚味姣色有此四者何求於外有此而求外者無厭之性無厭之性陰陽之蠹也忠不足以安君適足以危身義不足以利物適足以害生安上不由於忠而忠名滅焉利物不由於義而義名絕焉君臣皆安物我兼利古之道也鬻子曰去名者無憂老子曰名者實之賓而悠悠者趨名不已名固不可去名固不可賓

說符

子列子學於壺丘子林壺丘子林曰子知持後則可言持

身矣列子曰願聞持後曰顧若影則知之列子顧而觀影形枉則影曲形正則影正然後枉直隨形而不在影屈伸任物而不在我此之謂持後而處先

關尹謂子列子曰言美則響美言惡則響惡身長則影長身短則影短名也者響也身也者影也故曰慎爾言將有和之慎爾行將有隨之是故聖人見出以知入觀往以知來此其所以先知之理也度在身稽在人人愛我我必愛之人惡我我必惡之湯武愛天下故王桀紂惡天下故亡此所稽也稽度皆明而或不道也譬之出不由門行不從徑也以是求利不亦難乎嘗觀之神農有炎之德稽之虞夏商周之書度諸法士賢人之言所以存亡廢興而非由



百家類纂卷之二十一  
此道者未之有也

列子曰色盛者驕力盛者奮未可以語道也故不班白語道失而况行之乎故自奮則人莫之告人莫之告則孤而無輔矣賢者任人故年老而不衰智盡而不亂故治國之難在於知賢而不在自賢

宋人有爲其君以玉爲楮葉者三年而成鋒殺莖柯毫芒繁澤亂之楮葉中而不可別也此人遂以巧食宋國子列子聞之曰使天地之生物三年而成一葉則物之有葉者寡矣故聖人恃道化而不恃智巧

子列子窮容貌有饑色客有言之鄭子陽者曰列禦寇蓋有道之士也居君之國而窮君無乃不爲好士乎鄭子陽

即令官遺之粟子列子出見使者再拜而辭使者去子列子入其妻望之而拊心曰妾聞爲有道者之妻子皆得佚樂今有饑色君遇而遺先生食先生不受豈不命也哉子列子笑謂之曰君非自知我也以人之言而遺我粟至其罪我也又且以人之言此吾所以不受也其卒民果作難而殺子陽

晉文公出會欲伐衛公子鋤仰天而笑公問何笑曰臣笑鄰之人有送其妻適私家者道見桑婦悅而與言然顧視其妻亦有招之者矣臣竊笑此也公寤其言乃止引師而還未至而有伐其北鄙者矣

晉國苦盜有郟雍者能視盜之貌察其眉睫之間而得其



情晉侯使視盜千百無遺一焉晉侯大喜告趙文子曰吾  
得一人而一國盜爲盡矣奚用多爲文子曰吾君恃伺察  
而得盜盜不盡矣且邾雍必不得其死焉俄而羣盜謀曰  
吾所窮者邾雍也遂共盜而殘之晉侯聞而大駭立召文  
子而告之曰果如子言邾雍死矣然取盜何方文子曰周  
諺有言察見淵魚者不祥智料隱匿者有殃且君欲無盜  
莫若舉賢而任之使教明於上化行於下民有恥心則何  
盜之爲於是用隨會知政而羣盜奔秦焉

趙襄子使子新稗穆子攻翟勝之取左人中人使遽人求  
謁之襄子方食而有憂色左右曰一朝而兩城下此人之  
所喜也今君有憂色何也襄子曰夫江河之大也不過三

日飄風暴雨不終朝日中不須臾今趙氏之德行無所施於積一朝而兩城下亡其及我哉孔子聞之曰趙氏其昌乎夫憂者所以爲昌也喜者所以爲亡也勝非其難者也持之其難者也賢主以此持勝故其福及後世齊楚吳越皆嘗勝矣然卒取亡焉不達乎持勝也唯有道之主爲能持勝孔子之勁能拓國門之關而不肯以力聞墨子爲守攻公輸般服而不肯以兵知故善持勝者以彊爲弱宋人有好行仁義者三世不懈家無故黑牛生白犢以問孔子孔子曰此吉祥也以薦上帝居一年其父無故而盲其牛又復生白犢其父又復令其子問孔子其子曰前問之而失明又何問乎父曰聖人之言先迺後合其事未究



百家類纂卷之十四  
姑復問之其子又復問孔子孔子曰吉祥也復教以祭其  
子歸致命其父曰行孔子之言也居一年其子又無故而  
盲其後楚攻宋圍其城民易子而食之析骸而炊之丁壯  
者皆棄城而戰死者太半此人以父子有疾皆免及圍解  
而疾俱復

秦穆公謂伯樂曰子之年長矣子姓有可使求馬者乎伯  
樂對曰良馬可形容筋骨相也天下之馬者若滅若沒若  
亡若失若此者絕塵弭蹶臣之子皆下才也可告以良馬  
不可告以天下之馬也臣有所與共擔纏薪菜者有九方  
臯此其於馬非臣之下也請見之穆公見之使行求馬三  
月而反報曰已得之矣在沙丘穆公曰何馬也對曰牝而

黃使人往取之牡而驪穆公不說召伯樂而謂之曰敗矣  
子所使求馬者色物牝牡尚弗能知又何馬之能知也伯  
樂喟然太息曰一至於此乎是乃其所以千萬臣而無數  
者也若皋之所觀天機也得其精而忘其麤在其內而忘  
其外見其所見不見其所不見視其所視而遺其所不視  
若皋之相者乃有貴乎馬者也馬至果天下之馬也

楚莊王問詹何曰治國奈何詹何對曰臣明於治身而不  
明於治國也楚莊王曰寡人得奉宗廟社稷願學所以守  
之詹何對曰臣未嘗聞身治而國亂者也又未嘗聞身亂  
而國治者也故本在身不敢對以末楚王曰善

狐丘丈人謂孫叔敖曰人有三怨子知之乎孫叔敖曰何



謂也對曰爵高者人妬之官大者主惡之祿厚者怨逮之  
孫叔敖曰吾爵益高吾志益下吾宮益大吾心益小吾祿  
益厚吾施益博以是免於三怨可乎孫叔敖疾將死戒其  
子曰王亟封我矣吾不受也爲我死王則封汝汝必無受  
利地楚越之間有寢丘者此地不利而名甚惡楚人鬼而  
越人機可長有者唯此也孫叔敖死王果以美地封其子  
子辭而不受請寢丘與之至今不失

虞氏者梁之富人也家充殷盛錢帛無量財貨無訾登高  
樓臨大路設樂陳酒擊博樓上俠客相隨而行樓上博者  
射句明瓊張中反聲兩楯當作鱗反魚而笑飛鳶適墜其腐  
鼠而中之俠客相與言曰虞氏富樂之日久矣而常有輕

易人之志吾不侵犯之而乃辱我以腐鼠此而不報無以立謹於天下請與若等戮力志率徒屬必滅其家爲等倫皆許諾至期日之夜聚衆積兵以攻虞氏大滅其家

東方有人焉曰爰旌目將有適也而餓於道狐父之盜曰丘見而下壺餐以饋之爰旌目三饋而後能視曰子何爲者也曰我狐父之人丘也爰旌目曰譖汝非盜邪胡爲而食我吾義不食子之食也兩手據地而歐之不出喀喀音然然遂伏而死狐父之人則盜矣而食非盜也以人之盜因謂食爲盜而不敢食是失名實者也

楊朱曰利出者實及怨往者害來發於此而應於外者唯請是故賢者慎所出



大道以多岐亡羊學者以多方喪生學非本不同非本不一而末異若是唯歸同反一爲亡得喪

楊朱之弟曰布衣素衣而出天雨解素衣衣緇衣而反其狗不知迎而吠之楊布怒將扑之楊朱曰子無扑矣子亦猶是也嚮者使汝狗白而往黑而來豈能無怪哉

楊朱曰行善不以爲名而名從之名不與利期而利歸之利不與爭期而爭及之故君子必慎爲善

邯鄲之民以正月之旦獻鵠於簡子簡子大悅厚賞之客問其故簡子曰正旦放生示有恩也客曰民知君之欲放之競而捕之死者衆矣君如欲生之不若禁民勿捕捕而放之恩過不相補矣簡子曰然

齊田氏祖於庭食客千人中坐有獻魚鴈者田氏視之乃  
歎曰天之於民厚矣殖五穀生魚鳥以爲之用衆客和之  
如響鮑氏之子年十二預於次進曰不如君言天地萬物  
與我並生類也類無貴賤徒以小大智力而相制迭相食  
非相爲而生之人取可食者而食之豈天本爲人生之且  
蚊蚋嗜膚虎狼食肉豈天本爲蚊蚋生人虎狼生肉者哉  
人有亡鈇者意其鄰之子視其行步竊鈇也顏色竊鈇也  
言語竊鈇也動作態度無爲而不竊鈇也俄而相古掘字其  
谷而得其鈇他日復見其鄰人之子動作態度無似竊鈇  
者

昔齊人有欲金者清旦衣冠而之市適鬻金者之所因攫



其金而去吏捕得之問曰人皆在焉子攫人之金何對曰  
取金之時不見人徒見金



百家類纂列子卷終





其金而去使銅質之類可人故在子或人之金  
取金之時不見人徒見金



百家類纂列子卷之







